


BULONGAMÈ BWÀ ÈKÈLEEZIYA

 Mwab'ewu, batu mene baciteemesha—baciteemesha bishi? Eyowa's, uh-huh...?.. [Katupa kàà mukaba wa mèyi munda mutupu—Muf.] Ikalaayi badìlongolole bwa kubijima. Pashiishe, dìbà adi, mèmè ki wanuleeja ne mutu, mushindu ewu. Nwamonu anyi? Nwamonu anyi? Ekelekele, nnuleeja ne mutu's. Nwènù. . . [Mwanèètù wa balùme kampanda ùdi wàmba ne: “Udi muswe bwa mèmè kucyenza dìbà kaayi?” Mwanèètù wa balùme kampanda ùdi wàmba ne: “Yèyè's wàmbi ne: ‘Cìteemèshaayi.’”]

Bànà beetu, tudi babiikidìshe bwa kwenza didisangisha edi mwab'ewu diloolo edi mu kiipacila kàà kumanya mushindu wa kwendesha Ekeleeziya wa Nzambi udi ne mwoyi, bu mùdibi ne, tudi twitabuuja ne twètù tudi citupa cya mwine Ekeleeziya ewu.

² Ndi muswe, bwa kumpalampala, ndi muswe kwamba ne mu ngendu yanyi pa buloba bujima, bwa ku dyanyi pàànyì dimanya, ewu ngumwe wa ku myaba ya mitambe kwikala ya nyuma mùdì umvwa Nyuma wa Nzambi kutamba mwaba mukwabo kanà wònsò wùndiku pàànyì mumanye. Mvwa mu meeji àànyì ne myaba mikwabo yibidi yìvwà pa ciibidilu ya nanku, kadi patùdì twakulangana apa kabicyena bimweka bu ne tudi—tudi tumona miine myaba ayi to; umwe wa ku yôyi mmukabwele mu bulongolodi, ne mukwabo wòwò kaayi wènji—wènji bu ne mmudishinde.

³ Pa nanku bàvwa bambiikile makeelela awu ne—ne bangambile ne nwènù bònsò nuvwa dijinga ne disangisha bwa kungeela nkonko eyi ya yitangila midimu yenu mu ekeleeziya ewu, ne mèmè. . . bwa ciine aci ki bündi muvwile kaaba aka diloolo edi, mbwa. . . ne bwa—bwa kuteeka ekeleeziya, anyi bwa kunupeesha bintu bìndi mèmè ngeela meeji ne—ne mbya mushinga wa menemene bwa kufikisha ekeleeziya ewu ku diya kumpala.

⁴ Bànà beetu, ndi mutwishibwe ne nwènù nudi bamanye nanku, pângãmbi dîyi dya ne ewu mwaba ngwà nyuma apu. Kî mmwaba wa mutambe bunene bwa buloba bujima to, ne kî mmwaba wutùdì ne misambu ya mitambe búngì, ne mbila ya mitambe búngì, ne mikunda ya mitambe búngì, anyi dyakula dya mu myakulu dya dipite búngì, ne bikwabo to, kî nnanku to, kadi nngiikàdìlù wa Nyuma ùdi ùkwàta mudimu mu tabernacle emu. Ne, too ne mpindyewu ewu, ndi muswe kwela Mwanèetu Neville kààlumbandi ne kumwela twasakidila, ne—ne nwènù bànà beetu bàdì mwaba ewu aba, balubuludi, ne balami, ne mulombodi wa kalaasa kàà Dyalumingu, ne bònsò, bwa—bwa binùdì benze bwa kwambulwisha bwa ne cyòci eci cilamiibwe mushindu ewu.

Civwa ndisambila dyanyi dya ntanta mule, ne dijinga dya kacya ku bwâna, dya kumonaku ekeleeziya muteeka mu bulongame ne mulama mu bulongame.

⁵ Mpindyewu, patwàkalàmbulà ekeleeziya, ngâkanwàmbila ne: “Paanyima pàà katanci ndambu mvwa ne cintu kampanda cya mêmè kuyiikilanganaku neenu pa cyôci, mushindu wa kuteeka cintu eci mu bulongame, mushindu wùvwàbi bikengela bwa kwikalaci cilombòdiibwe.” Nenku nwâkatwàdija... paanyima pàà mêmè muumuke kaaba aka, tuvwa ne bambi ne bikwabo. Kadi mpindyewu, bu mùvwà Mwaneetu Neville mucikàle anu mutekete munkaci mwetu, pààkalwàye munkaci mwetu apu, ngâkadyàmbidila ne bìvwa bifwanyineku kwikala bîmpè bwa Mwaneetu Neville kwikalaye mutambe kushindama bîmpè menemene mu Diitabuuja kumpala kwa mêmè kutwala bintu bya bwena bìndì pabwîpì ne kwenza mpindyewu ebi. Kadi mpindyewu, paanyima pàà mêmè mumane kusangana ne ùdi wenda ushindama bîmpè mu Diitabuuja, ne mwikàle umvwa cìdì Dilongesha, ne—ne yêyè wâkwâci mudimu wa ntemu wa lulamatu bwa Kilisto ne ùshàala kacya wâkwàta citùdì twitabuuja ne ki Bulelela aci, ngeela meeji ne dîbà dyâkànyì mpindyewu, difwanyine kwikala cikondo cîmpè, cya kwakulaku nende mu...ne munkaci mwenu nwênù bakulu ne bikwabo bàà ekeleeziya, bwa nwamona mwa kwangata mêmè matuma aa ne kwikala kuàvùluka ne, ngàà ku dyanyi pàànyì dimanya kumpala kwa Nzambi. Ne pashiishe ndi ne ditekemena dya ne nenuteeke bintu ebi mu cyenzedi mu mushindu wùndì mbyamba ewu, bwalu bìdì bikengelaku bwa muntu kampanda kwikalaye mutu kaaba aka. Bìdì bikengela bwa nwênù kwikala ne... .

⁶ Mpindyewu, ncyêna nteeta kunyenga bukookeshi anyi cintu kampanda cya mushindu awu nansha, kadi, nudi numona's, muntu anyi cintu kanà cyònsò eci cyôci ciikàle ne mitu yibidi, kacyna—kacyna cimanya mushindu mwine wa kuya to. Kacya Nzambi kàtu mupeeshe Ekeleeziya Wende mitu yibidi to, kacya Yêyè kàtukù mwanji kwenza aci to, citu anu mutu wumwepele. Yêyè ùkaadikù anu mukwatekwate mudimu misangu yònsò mu lukongo ne lukongo lwònsò mushindu wutùdì balonge mu Mifundu ne, kùtu misangu yònsò anu muntu-nkààyà umwepele utuYe ukwata nende mudimu. Bwalu panùdì ne bantu babidi, nudi ne mmwenenu yibidi. Nenku bìdì bikengela cikafike ku cyeyemenu cya ndekeelu cimwepele, ne cyanyi cyeyemenu mêmè cìdì n'Dîyì, Bible. Ne mêmè bu mpaasata wa ekeleeziya kaaba aka, cyanyi cyeyemenu mêmè cìdì n'Dîyì, ne ndi muswe... .ndi mumanye ne, nwênù bânà beetu, nutu mu mushindu kampanda nuntangila mêmè ne ndi cyeyemenu cyenu pa bìdì bìtàngilà... . pìikalàbì ne mêmè ndi ndonda Nzambi bu mwâkambà Pòlò mu Mifundu ne: “Ikalaayi nundonda mêmè, bu mùndì mêmè ndonda Kilisto.”

7 Nénku díbà adi ndi mufwanyine kutekemena ne nwènú bânà beetu, pa díbà kanà dyònsò dinùdi nummona nseesuka ku Mufundu ewu, bwa ulwe kúndi peetu pàà babidi bwa ungambile ne mmwaba kaayi wúndi mutupakeene. Nansha byòbì ne udi umwe wa ku balubuludi anyi wa ku...anyi ní udi mulami wa ku ntempelu, nansha wèwè mwikàle nganyi, udi mwenzejiibwe bwa kulwa kúndi, bu kùdi mwaneenu mu Kìlìsto, bwa kungambila pândi mutupakane pa bìdi bitàngilà Mifundu. Pìikalàku lukonko kampana, tusombele panshi bwa kupetaku dyandamuna, cyapamwe.

8 Nénku ki bwa cinyi nudi balwe, múndi ncinka, kúndi diloolo edi, bamfikishe mwaba ewu, mbwalu kùdi nkonko kaaba aka yìdi yimweka bu ne yìdi yediibwa mu meeji enu bwa bintu bìndi naabi—naabi kaaba aka. Mpindyewu vùlukàayi, bânà beetu, mèmè ncyèna mumanye to...kakwena mènà mafunda nansha pa kamwe kàà ku tubeji etu to, kadi...kadi mmifunda, ne mèmè ncyèna mwa...ncyèna mumanye ne udi muyifunde nganyi to, kadi nnkonko yìdi mu meeji enu amu, ne mèmè ndi kaaba aka bwa kuyandamuna ku dyanyi pàanyi dimanya.

9 Ne vùlukàayi ne, Nzambi mmutekemene bwa mèmè kwenza bwa ne nshaale mu Díyì. Ne mèmè ndi mutekemene ne nwènú nwénzè ne nwikalè nuteeka Díyì mu cyenzi, nwamonu's, nwamonu's, mu ekeleeziya ewu. Nénku nùmulamàayi wa nyuma, bwalu, vùlukàayi ne, makole ònsò a—a bukalenge bwa mîdimà bwa Sataana neikalè matangija kunùdi bwa kunulwisha panùdi nubanga kukola mu Mukalenge. Nénku nudi ne cya kwikala masalaayi, kanùyi anu masalaayi a baadiikidì to. Nukàadi masalaayi makulumpe mpindyewu, ne malongeshiibwe bwa kulwa mvita. Ne Sataana nealwe munkaci mwenu, neanufikishe ku dikokangana muntu ne mukwende bu yèyè mwa kupeta mushindu. Numwipataayi dyakamwe; nwènú nudi bânà bàà muntu; ne yèyè mmwena lukuna. Ne twètù tudi kaaba aka mbwà kwikala bakwate dibendela mu cikondo eci cya Bukènkè bwa diloolo, bwa ne, pàdi mîdimà mibwikile buloba ne bukalenge bujima bwa ekeleeziya mukanci mwa kubwela mu Nsangilu wa Maekeleeziya apa. Nénku abidi mmale asatu mmîpi nebateete kulamika citaata ku ciibi eku ne: "Mukàngìbwe!" Ne díbà adi nebikengele bwa twètù kwikala tudisangishila mu myaba ya cyanànà, bwalu ncyà bushuwa ne nebakange ekeleeziya eyi dimwe dya ku matuku àdi panshi aa twètù babenge kwangata cimanyinu cya nyama wa lwonji. Nénku butùdi naabu mbwà kushààla ne lulamatu kùdi Nzambi too ne pààtùlekelelà lufu, ne cyòci aci ki citùdi ne meeji a kwenza.

10 Mpindyewu buludi ku...Nénku ndi muswe kulomba ne, díbà kanà dyònsò díikalà cyònsò cya ku bintu ebi mwa kwediibwa mpatà, mukaba wa mèyi ewu wediibwe kumpala kwa bidimba bya ekeleeziya ewu, nwamonu's, mu masangisha enu, anyi kumpala kwa disangisha, anu kumpala menemene

ne disangisha kubangadi. Nukangule cisanji nwèlè mukaba wa mèyì ewu! Nenku beena mu disangisha edi biikalèku bumvwe ne bantu aba mbeena dibanza kùdì Nzambi, bu mucipu wabo mu ekeleeziya ewu, bwa kwambulwisha ku dilama dya mèyì makulu aa. Wèwè udi mwa kubengangana naabo bôbò ku mèyì; kadi bu mêmè mwa kukulekela umulombola wèwè, dîbà adi mêmè's ki wabengangana neebe ku mèyì. Bìdì bikengela bwa twikalèku ne mushimi kampanda mu mwaba kampanda mùdì mwa kusanganyiibwa nkamisha kampanda. Nenku pa mwîmpè menemene wûndîku mêmè mumanye, ki wûndì nnupeesha ku Nyuma Mwîmpè ewu, mwikàle ngenza bwa ne Yèyè ikalè wanyi Nkamisha. Nenku mukaba wa mèyì ewu wikalè wenù nkamisha pa bìdì bitàngilà nkonko eyi.

Mpindyewu, lwà kumpala lùdì ne:

220. Ekeleeziya neikalè wenza maalu bishi pa bìdì bitàngilà malomba a dyambulwisha mu mfranga a . . . bwa byakudya ne bya kuvwala? Ncyenzi kaayi—kaayi, ncinyi—ncinyi civwà cikèngelà bwa ekeleeziya kwenzaye?

¹¹ Mpindyewu tudi bamanye ne ekeleeziya mmwambule bujitu bwa bende yèyè, bwa bidimba byetu twètù bya ekeleeziya kaaba aka, tudi bambule bujitu bwònsò nkòong patùdì anu ne mushindu wa kubakumbajila majinga awu. Tudi bambule bujitu bwa beetu twètù, mbwena kwamba ne, bidimba bya tabernacle ewu bya bishimate, bitù bilwa mwaba ewu ku musangu ne ku musangu ne bikuukwila neetu. Tudi beena dibanza kùdìbo, bôbò bu bàna beetu bàà balume ne bàà bakaji bàkaadi bafile cijaadiki cya ne mbidimba byetu bya disangisha edi.

¹² Mpindyewu, tudi bamanye ne kùdì mìllyô diloolo edi bàdì kabàyi ne byakudya to, kabàyi ne bya kuvwala to, ne twètù tudi bafwanyine kunanga bwa kwikalaku bakumbane bwa kwambulwisha cisumbu cyabo cijima aci, bwa kwenza cyònsò citùdiku peetu bakumbane bwa kwenza aci; kadi pa bìdì bitàngilà mfranga katwena ne mushindu wa kwenza nanku to, katwena mwa kwambulwisha buloba bujima to. Kadi tudi beena dibanza kùdì beetu twètù. Ne ndi ngeela meeji ne, mu cyòci aci, ne dîbà adi bu twètù mwa kwikala ne kantu kashàale kanùdì nujinga kwambulwisha naaku bantu bàdì kabàyi bidimba bya bya ekeleeziya ewu kaaba aka, cintu kampanda cinùdì baswe kubapeesha, bìvwa bikengela bwa aci kutangidiibwaci kùdì kasumbu kàà balami.

¹³ Balami ki bàdì—bàdì bakumbane mwa kusùnga mvita ayi, anyi bwalu abu, eyowa's we; mbwalu mu Bible pàakajuukàku dikokangana pa bwalu bwa byakudya ne bivwàlù, ne bikwabo, mu Mukanda wa Byenzi, bàakabìikidisha bapostolo pa bwalu abu, ne bôbò bàakamba ne: “Ndàayi nukadikebele nwènù biine balume mwandamutekete bàdìbo bafidila bujaadiki ne mbàà kweyemena, ne bùle tente ne Nyuma Mwîmpè bwa bôbò

bààmòna mwa kudifila ku bintu ebi. Bwalu twêtù netùdifile dîbà dyònsò ku Diyì dya Nzambi ne ku disambila.”

¹⁴ Nenku kî mmudimu wa mpaasata wa kudifila ku . . . ku byakudya ne ku bikwabo abi to. Cidi ne cya kwenjiibwa kùdì balami. Kî mbalubuludi to, mmudimu wa balami bwa kwenza cyôci eci. Nenku dîbà adi bìvwa bikengela bwa cyôci eci kwikalaci. . . Vùlukàayi ne mu Bible, bàvwa bambulwisha bààbò bôbò, beena Ngelika ne beena—ne beena Yuda, pàakajuukà dikokangana dya ne bamwe bàvwa bapeta byàbûngì ndambu kutamba bakwabo, kadi bàvwa mbantu bàvwa bapàane bintu byabo byònsò ne babifile ku ekeleeziya bwa dikwacishangana, ne dîbà adi bwa—bwa kubyabanyinganabwa munkaci mwaba nzevu mwongo. Kadi kujuukaku ndambu wa dikokangana, nenku apu ki patùdì bapetele balami beetu bàà nzànzànzà. Ne awu ki wumwe wa ku midimu yabo, ngwà kwenza cyôci aci.

¹⁵ Ndi ngeela meeji ne, bwa beetu twêtù, bwa bantu beetu twêtù, bìvwa bikengela twikalè tutangila bwalu bwabo. Ne bìvwa bikengela bwa kwikala kufila bwalu abu, didyabakeena kanà dyònsò, kùdì mulombodi wa kasumbu kàà balami, ne dîbà adi bìvwa bikengela kucitangilabo kùdì kasumbu kàà balami bwa kumonabo ne cidìbo mwa kwenza ncinganyi pa bwalu abu. Nenku bintu byònsò ebi bìdì biikàle bivwàlù, ne byakudya, ne dyambulwisha dya ne mfranga, anyi ní ncinyi cyònsò, bìvwa bikengela bwa kupicilabi kùdì balami. Pashiishe balami, pàdìbo bangata dipangadika dya ne bàdì—dya ne bàdì . . . ciikalàbo mwa kwenza pa bwine bwalu abu aci, pashiishe bìvwa bikengela bwa kufidiibwaci dîbà adi kùdì—kùdì mulami wa cibucilu, bwa kumona ní mulami wa cibucilu pa diene dîbà adi mmukumbane mwa kufuta bûngì bwa mfranga ebu anyi, anyi—anyi kusumba biine bivwàlù ebi, anyi ní ncinyi cyònsò pa bwalu abu. Kadi bìvwa bikengela bwa kasumbu kàà—kàà balami kudisangishaku bwa bwalu abu, ne kaciyena ciya kùdì balubuludi anyi kùdì mpaasata to. Bwalu abu mbwa balami, cyònsò mu kaabujima.

Mpindyewu, pashiishe, lukonko lwibîdì.

221. Mbikumbane bwa kwambila pa bùtookà ku cyambilu ne bìvwa bikengela bwa dyakula dya mu myakulu ne dyandamuna kwikalabi byenjiibwa mu didisangisha kampanda kumpala kwa disangisha anyi?

Alu ndukonko lwibîdì lwa pa kabeji kândi naaku mwaba ewu aka, kadi kaakarta kakese aka.

¹⁶ Mpindyewu, eci neifwanyine kwikala citangila mpaasata mwaba ewu, nwamonu's. Bwalu yêyè—yêyè, twamb'eku twamb'eku, ngudi kumutu kwa citupa cya maalù a nyuma, yêyè ki udi mfumu wa cyôci aci. Balami bôbò mbampulushi mu ekeleeziya, bwa kwikalabo bàlama bulongame ne batableela bintu ebi, ne bàdiisha bapele, ne bikwabo. Balubuludi bàdi batangila lupetu ne citanda; ki bìdì bikengela kwikalabo

batangila mbyôbì abi. Kadi mpaasata ngudi kumutu kwa—kwa ditangila dya citupa cya maalû a nyuma, nenku bìvwà bikengela bwa eci kuyaci kûdì wêwè, Mwaneetu Neville.

¹⁷ Mpindyewu, kùdì...kùkaadi cikondo kampanda pàvwà bulongame buteekiibwe, ekeleeziya. Mémè ntu bulelela ngiitabuuja dyakula dya mu myakulu, ne dyandamuna, ne mapà malenga ônsò a Nyuma àdì Nzambi muteeke bwa kwikalawu mu ekeleeziya awu. Kadi tudi tusanganyibwa ne mwoyi mu dituku didì menemene anu bu dya cikondo cya Bible, mùdì maeeleeziya...Mpindyewu, monaayi Pòlò, wàkajuula ekeleeziya ku Efeso, ekeleeziya wa beena Efeso awu, uvwa ekeleeziya mushindamija bîmpè awu. Nukààvwakù bamone anyi? Tudi twitabuuja ne Pòlò, ne yêyè wàkamba yêyè mwine nanku ne, ùvwa wàkula myakulu yàbûngì, ne tudi bamanye ne yêyè ùvwa ne mapà a myakulu. Kayiyi yìvwàye mulonge ayi to, kadi yìvwàye mupeeshiibwe mu mushindu wa nyuma ayi, bwalu mmùdiye ùcyàmba mu Kolinto amu. Nenku bwa kulaminyina dîbà, ncyèna anu mbuulula mu Bible bwa mémè kunubadilaci to, bwalu ncifwanyine kutufikisha ku—ku dishààla kaaba aka ntanta mupitepite bule diloolo edi, bu mùndì neiyi ne dîbà dipitepite bûngì to. Nenku mpindyewu...kadi anu bwa nufike ku dimona bitooke tòd.

¹⁸ Mpindyewu, kacya kabyakakengelaku bwa Pòlò kwakulaye ne ekeleeziya wa beena Efeso anyi ne ekeleeziya wa beena Loomo, anyi nansha umwe wa ku mikwabo ekeleeziya ayi, pa mapà abo a Nyuma, pa mushindu wa kuàtèèka mu bulongame to. Kadi ncyà bushuwa ne byakakengela bwa yêyè kwakula mu mushindu wa kashendende pa bwalu abu ne beena Kolinto, bwalu bôbò bàkaavwa bacivwije cilumbu cya bakokangana dîbà dyônsò. Ki Pòlò kwambaye, pààkafikàye munkaci mwabo ne, bôbò bapete ne kùvwa muntu mwikàle ne mwakulu ne mukwabo mwikàle ne musambu, ne yêyè wàkasàkidila Mukalenge bwa mapà abo ônsò malenga ne bikwabo bintu bya mushindu awu abi. Nenku bu nwènù mwa kumona mu nshapita wa kumpala anyi mwibìdì wa Kolinto amu, Pòlò ùvwa ubambila, bilondeshile myaba, civwàbo mu Kilisto, mùvwàye...mùvwàbo mu Kilisto bilondeshile myaba.

¹⁹ Pashiishe pàakamanàye kubambila, dîbà adi byenze bu mùdì tààtù ki kubangaye kulekelela mfimbu pambidì pààbò, ne kwambaye ne: “Ndi muumvwe ne nudi ne makokyanganyi munkaci mwenu, ne ndi muumvwe ne nudi nukwacika maala ku meesa a Mukalenge.” Yêyè kààkabànyènga bwena Kilisto bwabo to; ne nwènù bânà beetu kanwenjiku nanku awu to, kubanyenga bwena Kilisto bwabo, kàdì bwalu mbwà mushindu wùdìbo bàditwàla mu nzubu wa Nzambi. Ki mwaba wùdì bwalu ngwòwò awu.

²⁰ Mpindyewu, ndi mufwanyine kwamba nunku, anu mùvwà Pòlò wa kale mwambe amu, ne: “Panùdì nudisangisha,

umwe yêyè wakula, mukwabo andamune. Kwôkò kakùyì mwandamunyi to, díbà adi nupuwayi. Kadi kwôkò kwikàle mwandamunyi. . .”

²¹ Mpindyewu, nkàadi mutangile ekeleeziya ewu, ne nkàadi mumone ne nukàadi nukola, ne nkàadi mumone mapà a Nyuma àbûngì akwata mudimu munkaci mwenu. Bwa kwamba menemene, byakakengela bwa mémè kulwa kùdì Mwaneetu Neville ne Díyì kampanda dya kùdì Mukalenge bwa dimwe dya ku ôwò, bwa kumulongolola pa cintu kampanda cìvwàye wènza.

²² Nenku bu ne mémè . . . pìikalàbi ne Mukalenge udi . . . Nyuma Mwimpè mmumvwije mutangidi wa Cisumbu cya mikooko, díbà adi's mmudimu wanyi bwa kunwambila Bulelela. Nenku ndi ne disakidila dyàbûngì kùdì Mwaneetu Neville, mùdiye mubawule maci ku Bulelela. Mémè ndi mwa kuBwamba anu mùdìYe Yèyè ungambila amu.

²³ Mpindyewu, pa bwalu ebu, pângãmònu ekeleeziya wenu wenda ukola, nenku ki mémè kucimona's. Nenku mu ekeleeziya, mushindu wutùwà tucyenza ku cibangidilu ngwôwò ewu, ne wôwò mushindu ewu ki wutùdì—wutùdì baciswe cyakabidi.

²⁴ Mpindyewu, nwênù kanùyì nutangila to, pàdì bânà bàà mu maboko . . . Cintu cya kumpala cidi mwànà wa mu diboko wenza nkuteeta kwakula kadi pende kàyì mumanye mwa kwakula to. Nwamonu anyi? Ùdi wènza ditùtuka bûngì cyanàànà, ne mutooyi, ne—ne bikwabo, kadi ùdi wèla meeji ne yêyè udi anu . . . ùdi mwa kupita ne muyiishi ku dyakula pa díbà adi. Ee, tudi tusangana aci kî ng'anu mu nsòmbelu wa mubidi to, kadi tudi tusangana aci ne mu nsòmbelu wa nyuma kabidi. S'mmwànà *mukese*. Kadi wêwè muteete kulongolola mwine mwànà awu ne kumunangulaku ndambu wa mapì ku tutàku aku ne bwalu nyawu “ùsàmanana ne mwadi” kadi ùteeta mwa kwakula, s'neunyangé mwànà awu. Nwamonu's, ne neumutape ku mwoyi. Nenku mbitambe bwimpè bwa kulekela mwànà awu ùkolakù ndambu too ne pààmányàye cya bushuwa mwa kushindumuna myaku yende bilenga, ne díbà adi kumwambila *dìbà* dya kwakula. “Kí mpàdì papa wàkula apu anyi pàdì maman wàkula apu to.” Kadi pàkaadìbi mu cikondo cikumbane, umulekele akule. Nudi bangumvwe anyi? Mpindyewu, umulekele akule pàdì cikondo cyende cya kwakula cìlwa.

²⁵ Mpindyewu, pìikalàbi ne nkàadikù mémè ewu mupete cintu kampanda cìtù bu dyèbà mu musunya wanyi, mu masangisha a pântù mpatuka, mpàtù muntu ujuuka pândì munkaci mwa kuyiisha apu ne díbà adi yêyè ufile mukenji mu myakulu ne mwikàle ukosa Nyuma ku díyì. Ncidi mfuminaku mu disangisha kampanda mu New York ne mu myaba mishiileshilangane mùtù bambi balekela bya nanku awu bitungunuka, ku musangu ne ku musangu, ne ciine aci's cidi anu—anu cibwejàkàjì pa cyòci. Nwamonu's, pàdì Nzambi

munkaci mwa kukwata mudimu mu lùpòndà lumwepele lwa meeji, Yèyè . . . aci ncifwanyine kwikala—ncifwanyine . . . Yèyè's mmufwanyine kwikala munkaci mwa kunyangakaja kiipacila Kende Yèyè mwine, piikalàYe uteeta bwa kukufikishila wèwè lùpòndà kampanda lwà meeji, kufikishila disangisha, bwa kwenza dibiikila dya ku cyoshelu kadi cintu kampanda cilwa ciimanyika.

²⁶ Cileejilu, bu mùdì eci. Tudi basòmbe ku meesa, tuyiikila, biikàle munkaci mwa kwakula bwa Mukalenge. Kadi Junior ubwela lubilu ulwa ku meesa aku, ne lukasa lwònsò, ùtùùmusha ntema yònsò ku citùdì munkaci mwa kwenza aci, nenku, ùtuuta mukobolo, wèla lubila lukole ne: “Papa! Maman! Ekelekele! Ekelekele! S'ndi mfuma ku dyela ndundu ku dinaya kwaka! Ne tudi munkaci mwa kwenza *bikampanda*, *bikansanga*, ne *bikankenga's*!” Kadi peetu biikàle batukine mu cyena-bwalu cinsantu menemene's. Mpindyewu, yèyè mwele ndundu, abi's mbîmpè; mu ndundu wa baseball, aci kaayi ncîmpè. Kadi mmwenze cya cyanàànà pàdiye ukabwelakana mu bwalu bùdì kabùyi bumutangile pa bìdì bitàngilà mukenji wutùdì twètù twakwila. Mbîmpè yèyè kwindila too ne pàalwà dyende dîbà nenku dîbà adi kaayi yèyè àtwāmbilè cìdìye mwenze mu dinaya dya ndundu wa baseball.

²⁷ Mpindyewu, ncintu anu cimwecimwe aci menemene citùdì tusangana mu mapà leelu ewu. Ki bwa cinyi Nzambi kènàku mwa kufila mapà a Nyuma mapitepite bûngì kùdì bantu to, kî mbamanye mwa kuàkòntonona to. Ki lutatu lùdiku leelu ewu ndwòlò alu, cìdì cyènza bwa katùyi naawu mapite pa atùdì naawu aa.

²⁸ Ne ncyà bushuwa ne tudi tusangana ditentula bûngì cyanàànà dya mapà a Nyuma. Kadi mêmè ncyèna ngeela meeji ne bìdì *nanku* mwab'ewu mu wetu ekeleeziya ewu to. Ndi ne kusakidila bwa bwalu abu. Ncyèna ngeelaku meeji ne nditentula nansha kakese to. Ndi ngiitabuujja ne tudi ne mapà mashuwashuwale, kadi tudi ne cya kumanya mushindu wa kukontonona ôwò mapà awu.

²⁹ Ne pashiishe paùdì uditwa mu dyenza dya cintu kampanda cya cîmpè . . . Mbyenze anu bu wèwè munkaci mwa kukwacila mfumwebe mudimu kampanda ne wèwè mubange kwenza mudimu webe wa kumpala ne mwikàle ne budiswilè bwa kwakidila mèyi matuma, dîbà adi mfumwebe wa mudimu awu's neikalè ne dyeyemena kùdì ne neatungunuke ne kukubàndisha myânzù ne wènza kukupà mwânzù mubāndile misangu yònsò.

³⁰ Mpindyewu, ndi ngeela meeji ne dîbà adi dyākànyì bwa Branham Tabernacle, dya kumanya cìdì . . . dya kwangata mapà adi Nzambi utupeesha, mùdì Nzambi mwa kufila kutùdì mene cintu kampanda citambe citùdì naaci bunene. Kadi katwena mwa kutungunuka . . . kadi nwènù biikàle numona muntu udi

misangu yônsò bikengela anu kwikala kumwambila ne bikwabo byônsò. Nenukù nùvulukàayi ne: “Nyuma wa baprofeta ùtu ukookela muprofeta,” mùdì Mifundu yamba. Panùdì numona muntu mulume udibi bikengela anu nwênù kwikala kulongolola, anyi muntu mukaji, kadi muntu awu upatuka mu bulongame, kadi peenu biikàle numwambila Bulelela bwa mu Mifundu, dîbà adi bìdì bìleeja ne nyuma udi pambidi pende awu kî ngwa kùdì Nzambi to. Bwalu Bible mmwambe ne: “Nyuma wa baprofeta,” anyi, “kwamba kwa ciprofeta,” mbwena kwamba ne, kufila kwa bujaadiki, kuyiisha, kwakula kwa mu myakulu, anyi nî ncinyi cyônsò, bwalu dyakula dya mu myakulu dyôdì dyandamunyiibwe didi nciprofeta. Pa nanku cidi cikookela muprofeta, ne Diyì ki yèyè muprofeta awu. Pa nanku tudi—tudi tumona ne nkwikala pambelu pàà bulongame dîbà didì muntu mulume anyi mukaji ùtùpika uya muulu ne ufila mukenji, nansha byôbì ne mmuswe kucyenza bishi, dîbà dicidì muyiishi mu cyambilu adi.

³¹ Mpindyewu ndi nganji kwamba eci bwa Branham Tabernacle, bwa ne bu mùdì etu—etu mapà atùdì tusangana aa . . . Ne twètù biine tudi ne bantu bàà maalù mîmpè menemene kaaba aka bàdì ne mapà. Mpindyewu, dyônsò dya ku mapà awu mmudimu wa bwambi wa pabwàwù. Àdi mmapà, anu mùdì kuyiisha kwikàle dipà, mùdì dyondopa diikàle dipà, mùdì bintu bikwabo abi biikàle mapà amu, ôwò aa mmapà, mmidimu ya bwambi ya pabwàyi. Ne muntu ne muntu mmulombiibwe bwa kwikalaye windila mudimu wende wa bwambi sungasunga.

³² Ki bwa cinyi Branham Tabernacle alombodiibwe mushindu ewu, ne ciine aci mu dituku edi, nangananga mu dituku ditùdì babipete bùngì cyaànàà edi (ncyèna muswe kwamba cyôcì eci to, kadi), bya budìngìbudìngì bùngì cyaànàà. Katwena twètù baswe bya budìngìbudìngì abi to. Muntu nansha umwe, muntu wa kweyemena nansha umwe kàtu muswe kwikala ne bya budìngìbudìngì to. Tudi . . . Twètù katùyì . . . katùyì mwa kwikala ne cilelela to, katwikadi naaci to nansha cya bishi, twindilàayi too ne patwapeta cilelela aci. Mpindyewu, ndi ngiitabuuja ne nwênù—nwênù aba nudi bafwanyine kwitaba aci. Katwena baswe cintu nansha cimwe cya budìngìbudìngì to. Bànà beetu, katwena mwa kubangila pa cintu kampanda cya budìngìbudìngì kadi kuumuka pa buloba ebu to. Bìdì bikengela bwa twikalè ne cidì cilelela, ne cidì cishuwashuwale. Twètù katùyì naaci to, twindilàayi too ne patwacipeta apu, ne dîbà adi twàmbè cintu kampanda pa bwalu abu. Nwamonu anyi?

³³ Mpindyewu, ndi mufwanyine kwamba, bantu balume ne bakaji bônsò bàdì bààkulà mu myakulu, ne bàmba biprofeta, ne bàfila mikenji aba . . . Nenukù ndi—ndi mêmè ngiitabuuja pamwe neenu ne mbishuwashuwale. Mpindyewu, Bible mmwambe ne: “Nùkenketè bintu byônsò; ne nukwate bikole ku cidì cîmpè.” “Bwalu ku mishiku yidì yikukuminà ne mu myakulu mikwabo

mmûNgààkwilà ne bantu aba ne, ki diikisha ndyôdi edi dimvwà Mèmè mwambe ne mmüvwàbi bikengela bwa bôbò kubwela,” mu Mukanda wa Yeshààyi amu.

³⁴ Mpindyewu, ndi mufwanyine kwanji kwamba eci bwa mu mwaba wa cijila emu bakwatemu mudimu anu kùdi dipà dimwepele ku musangu, bwalu cìdi citwàluja cyakabidi buludi mu bulongame bwa cìndi nteeta kwamba eci ne: pàdi muntu wàkula, nyuma wa baprofeta akookele muprofeta. Nudi bumvwe anyi? Mpindyewu, aba bàdi ne mudimu kampanda wa bwambi bwa Mubidi wa Kilisto. . . Ne mpindyewu udibi byàmbiibwa ewu, mpindyewu byènjiibwè. Aba bàdi ne mudimu kampanda wa bwambi bwa Mubidi wa Kilisto biikalè bindila mudimu wabo wa bwambi, bwalu mmudimu wa bwambi wa kùdi Kilisto bwa ekeleeziya. Kadi kanwena mwa kukwata mudimu bônso musangu umwe to, bìdi bikengela ciikalè muntu umwepele ku musangu.

³⁵ Branham Tabernacle neikalè mushindu ewu. Aba bàdi bààkulà mu myakulu, ne aba bàdi bàdamunà myakulu, ne aba bàdi ne ciprofeta cìdi cikèngelà kufila kùdi ekeleeziya abu, balwe pàà nkààyabò kumpala kwa dîbà mu. . . kumpala kwa disangisha kubangadi, bàdisangishile mu cibambalu cikaadi cimana kulongolola, ne bindilè mudimu wa bwambi wa Mukalenge.

³⁶ Anu mùdibi bikengela bwa mpaasata yêyè mwine kwenzaye kumpala kwa kubwelaye mu mwaba wùdi bateeleji; ùdi ne cya kwangata Bible, kulonga mu cinyàànyà cya mu cibambalu cyende amu, mu Nyuma, bwa kwikalaye mulaaba bwa kulwaye kumpala kwa bateeleji bwa kuyiishaye. Kàyi mwenze nanku to, neikalè mwa kupeta cibwejàkàji pààlwàye muntwamu. (Mulume yônso ne mukaji yônso, udi ne dipà dya Nyuma awu, alwe kumpala kwa Mukalenge.) Ne bu mùdibi ne mpaasata udi ne mudimu wa bwambi wa nkààyendè, yêyè mmuprofeta; mwaku wa mu Anglais ewu, *muyiishi*, wùdi wumvwija ne “muprofeta,” mbwena kwamba ne mwambi wa patooke wa Dìyi.

³⁷ Aba bàdi ne midimu ya bwambi yìdi yikèngelà kwikalayi miswikakaja kùdi muntu mukwabo abu, bu mùdi wà kwakula kwa mu myakulu ne mukwabo wà kwandamuna awu, bàdi bindila *pamwe* mudimu wabo wa bwambi awu. Kabeena bôbò mwa kushààla mu bìrò bya pàà nkààyààbo wàkula mu myakulu kadi pashiishe kulwa kwambila mukwende cidiye mwambe aci to, bwalu aci yêyè's mmufwanyine kwikala ne byônso bibidi dyakula dya mu myakulu ne dyandamuna. Nwamonu anyi? Mpindyewu, yêyè naabi, s'mbilenga be, tudi baswe kucipeta mushindu awu. Ne tudi baswe bwa ekeleeziya atuucile dyakalenga ku mapà àdi mu ekeleeziya wetu aa. Nzambi ngudi mututuminewu, ne bìdi. . . tudi baswe bwa ekeleeziya wetu atuucile dyakalenga ku mapà a Nyuma aa. Pa nanku muntu udi wakula mu myakulu awu, ne ewu udi wandamuna, ne ewu udi

ufila biprofeta, bàdisangè kumpala mene kwa—kwa ekeleeziya kàyi mwanji kudisangisha to. Bàdisangìshilè mu cibambalu kampanda pàà nkààyaabò, bindile mudimu wa bwambi wa Mukalenge bwa ekeleeziya. Mbyumvwiike anyi?

³⁸ Nenku díbà adi, mushindu ewu, bu Mwaneetu Neville, twámbe ne, ee, mpindyewu anji ndekelaayi, numfwileku luse, ndekelaayi ngámbe nunku: Mwaneetu Collins yêyè wàkula mu myakulu ne Mwaneetu Hickerson ùfila dyandamuna, díbà adi bàdi ne mudimu wa bwambi wa *benzela pamwe* bwa ekeleeziya. Mpindyewu, awu kí mmudimu wa bwambi wa Mwaneetu Neville to; awu mmudimu wa bwambi wenu *nwênù* bwa ekeleeziya. Ndi mfila eci bu cileejilu. Díbà adi bivwa bikengela bwa nwênù bânà beetu nwikalèku basankishiibwe bwa kuteeka mudimu wenu wa bwambi awu pa kaaba kààwù mu nzubu wa Nzambi anu mùdì mpaasata musankishiibwe bwa kuteeka wende pende amu, bwalu bìdi mbya mushinga wàbùngì bu nwênù mwa kucyenza. Kadi kanwena mwa kucyenza muntu pàà nkààyendè mu cibambalu cyende yêyè mwine to, panwikalà *wèwè* wakula ne *wèwè* wandamuna, bìdi bikengela bwa nwênù kudisanga pamwe. Mpindyewu, nulwayi kudisangishila mu ekeleeziya, ku luseke mu cibambalu cya pàà nkààyeenù, bwalu nudi ne mudimu wa bwambi wa pàà nkààyeenù. Kí mmudimu wa nwenza bantu bitwilangane to, ngwà kwambulwisha naawu ekeleeziya. Nwamonu anyi? Ncintu kampanda bwa kwambulwisha ekeleeziya, kadi kí ngwà wènjiibwa mu disangisha dya bantu bônso to, anu mushindu wùngiikalà mèmè mwa kunwambila ne bìdi bikengela bwa kwenjiibwawu awu. Nwamonu anyi? Díbà adi, cyônso cidi Mwaneetu Collins wàmba, ne cidi Mwaneetu Hickerson ùfila mu dyandamuna aci, mbu cileejilu's, díbà adi Mwaneetu *Kampanda* acifunde, mùdìci amu. Ne pashiishe piikalàci cilwa . . .

³⁹ Mpindyewu, twètù bônso tudi bamanye ne Mukalenge ulwalwa, bwa aci tudi bamanye. Kadi bu Mwaneetu Neville mwa kwikala kujuuka diloolo dyônso anu ne: “Monaayi, Mukalenge ulwalwa! Monaayi, Mukalenge ulwalwa!” aci ncifwanyine kwikala anu cimpè, nwamonu's. Kadi aci ùdi ùcyàmba (mmpaasata) ku cyambilu, bwalu yêyè ngudi ne Díyì bwa cyôci aci. Nenku yêyè piikalàye mpaasata, muprofeta bwa ekeleeziya . . . anyi mpaasata's we, eyowa, bùdiye naabu mbwà kulonga Díyì dya Mukalenge ne kunwambila cidi cifundiibwe mu Díyì dya Mukalenge pa bìdi bitàngilà dilwa dya Mukalenge, nenku nudi nudimwijiibwa ku cyôci aci. Mudimu wa bwambi wa cyanàànà (bwa ekeleeziya) wùdiye kàyi mufwanyine kwikala muswikakane naawu to, ndyakula dya mu myakulu, dyandamuna dya myakulu (cidi ciikàle ciprofeta), anyi muprofeta mwikàle wàkula, aci ncintu kampanda cidi kaciyi cifunda mu Díyì to. Cidi cifunda mu Díyì, bìdi bikengela bwa *yêyè* acitwale; kadi cidi kaciyi cifunda mu Díyì to, aci ncidi

cikèngelà bwa *wêwê* kumwambila. Bu mùdì, cileejilu: “Ambila Mwaneetu Wheeler, EMU MMÜDÌ MUKALENGE WÀMBA: ‘Mààlabà, mu ciina cyende cya lusenga amu, kàyikù to, bwalu nekwikalè mashinyi a cisemuna ìkalà mwa kubunguluka,’” anyi cintu kampanda cya mushindu awu, ne bidi bikengela cyènzekè. Nenku wêwê wacyãmbi ne yêyè wácýãndàmùnù, ne pashiishe nuciteeke pa cyambilu paanyima pàà mudimu wenu wa bwambi awu mumane kujika, dîbà adi, mu diloolo adi, paanyima pàà ekeleeziya (musambu) mubange kwimba misambu ne bikwabo; mudimu wenu wa bwambi wôwò mumane kujika dîbà adi, balwe ne cìdì cìfidiibwe mu ciprofeta aci.

⁴⁰ Ne ncyêna ngeela meeji ne tudi ne . . . Anyi panwikalà naaci, nùcyèlè mwòmò amu. Pàdì bantu aba bàdisangisha, aba bàdì ne lungenyi bãnji kulwa dyambedi. Bwalu, nudi numona’s, muntu yêyè mwakule mu myakulu ne mufile dyandamuna bilondeshile Mifundu, aci kacýena mwa kwitabuujiibwa pàdici kaciyi cipete bujaadiki bwa bantu babidi anyi basatu to, bantemu bakwabo babidi anyi basatu, nwamonu’s, bikengela bacifidile bujaadiki, bwa ne bàdì biitabuuja ne n’Dîyì dya Mukalenge. Bwalu . . . Ne misangu mikwabo mu midimu ya bwambi ya mu bukesè eyi, anu mùdìbi mu mudimu mukwabo wa bwambi kanà wónsò ewu, nudi nusanganamu nyuma ya mashimi; nwamonu’s, yidi yìbuuka yikabwelamu. Kadi twêtu katwenaku baswe bya nanku nansha. To. Tudi baswe bwa yôyi midimu ya bwambi eyi yikalè midilongolole bwa kuleejiibwayi patooke piikalàbi bikengela bwa kuyitandulabo, bwalu cintu kanà cyónsò cya kùdì Nzambi cìdì mwa . . . kwena ulubakana bwa ne kabàlù kucitandula to, ndi muswe kwamba ne, neci—necitambe diteeta bukole, piikalàci cya kùdì Nzambi.

⁴¹ Anu mùdì mpaasata, muntu yêyè mumwele kadyombo pa bìdì bitàngilà Dìyì, kabyena bikengela bwa kutwaye cìmpìngà pa bwalu abu to, yêyè’s mmumanye anu menemene cìdiye wàmba aci ne: “Vwilabi apa.” Nwamonu anyi? Nenku mbya mwomumwe anu ne midimu mikwabo ya bwambi eyi, bikengela biikàle mushindu wumwewumwe awu.

⁴² Mpindyewu, muntu yêyè—yêyè wàkula mu myakulu ne ùfila mukenji. . . Mpindyewu, bamwe bantu bàtu bààkulà mu myakulu pàdìbo anu “bàdìkolesha bôbò biine,” mùdì Bible mwambe, bàdì anu bàdìcyônkomoja cyanàànà. Bàdì bààkula mu myakulu, bàdì bàdyùmvwa nanku. Ne bàdì bààkula mu myakulu *cya bushuwa*, bàdì bulelela bààkula mu myakulu, ne Nyuma ngudi ucyenza awu. Kadi byôbì ne nkusômba mu bateeleji mwamwa, mwikàle wàkula mu myakulu, ùdikolesha anu yêyè mwine, dîbà adi kî ncintu cìdì ne dikwacisha nansha dikese kùdì ekeleeziya to; muntu mulume awu ùdì ùdikolesha yêyè mwine, anyi mukaji, anyi nî nganyi yónsò udi munkaci mwa kucyenza awu. Nwamonu anyi?

43 Kwakula kwa mu myakulu ndipà dya kùdi Nzambi bwa dikoleshangana, mùdi Pòlò wàmba mu Mifundu, bwa ne mbwà kukolesha ekeleeziya. Pa nanku bìvwa bikengela kwikalaci mukenji wa buludi wa kùdi Nzambi mutumina ekeleeziya, pambelu pàà bìdi bifunda mu Bible emu. Nwamonu anyi? Ncintu kampanda cìdi. . .

44 Bu wêwè mwa kunkonka ne: “Mwaneetu Branham, ndi ne cya kubatijjibwa bishi?” S’ndi mufwanyine kukwambila ne lukasa lwònsò. Kabyena bikengela bwa wêwè kwakula mu myakulu bwa wêwè kungambila aci to, ncifunda mwab’ewu mene mu Bible bwa cya dyenza pa bwalu abu. Nwamonu anyi? Kabyena bikengela bwa mèmè ku- . . . kabyena bikengela bwa wêwè kwela nkonko pa bwalu abu ne kwambila muntu bwa akule mu myakulu bwa kukwambilaye to. Wamonu’s, aci ncimana kufunda.

45 Kadi wêwè mwambe ne: “Mwaneetu Branham, cìndi ne cya kwenza ncinyi? Ndi ne dipangadika mwab’ewu dìdi dikèngelà bwa mèmè kwangata bwa ne bìvwa bikengela bwa mèmè kusungula ewu ekeleeziya anyi kuya ku mukwabo ekeleeziya,” anyi cintu cya mushindu awu. Anyi ne: “Bìvwa bikengela bwa mèmè kwenza *cikampanda*, *cikansanga* anyi?” Mpindyewu, bìvwa bikengela bwa aci kufuminaci kùdi Nzambi. Nwamonu’s, bikengela bwa Nzambi Yêyè àtwàmbilè aci. Kadi aci bikengela cifumine ku mudimu mukwabo wa bwambi, bwalu Dìyì kadyena dyàmba ne: “Orman Neville umuke mu Branham Tabernacle aye ku Fort Wayne Gospel Tabernacle” to. Nwamonu’s, kì mbambe aci mu Dìyì emu to, nwamonu’s, pa nanku ki mudimu wa mapà aa ngwòwò awu.

46 Byenze mùdi muntu ulwa apa wàmba ne: “Wêwè udi witabuuja dyondopa dya kùdi Nzambi anyi?” Aci’s ncitùtu tuyiisha, tutu tucitabuuja, tutu twitabuuja dilaabangana dya maanyi, maanyi.

47 Kadi ki muntu kampanda ewu wàmba mùdiye “Kàyi mwa kufika ku dituuta dya dyakalenga, bwalu bùdi cinyi?” Dìbà adi bìdi bikengela Nzambi, ku dyakula dya mu myakulu, ku dyandamuna, ku ciprofeta, anyi mushindu kampanda wa dibwela mu nsòmbelu wa muntu awu ne kujoomona cintu cìdìye mwenze aci, ne kumwambilaci. Awu mmudimu wa bwambi wùdi kawùyì wa mpaasata to, ngwà mapà a midimu ya bwambi aa, kadi kabyena bikengela bwa kwenjiibwayi mu mwaba wùdi bateeleji awu to. Nwamonu anyi?

48 Mpindyewu, kacya kabyakakengelaku musangu nansha umwe bwa Pòlò kwambilaye bòbò—kwambilaye bòbò beena ekeleeziya wa Efeso abu kantu nansha kamwe pa ciine aci to, bòbò bàvwa mu bulongame, ekeleeziya wa Loomo, anyi nansha umwe wa ku mikwabo ekeleeziya ayi; anu ekeleeziya wa Kolinto, ne bòbò kabàvwakù mwa kuditeeka bòbò biine. . . Mpindyewu,

Pòlò ùvwa witabuuja dyakula dya mu myakulu. Ùvwa ne dyakula dya mu myakulu mu ekeleeziya wa Efeso, anu dimwedimwe òvwa naadi mu ekeleeziya wa Kolinto adi, nwamonu's, kadi ùvwa mwa kwakula ne beena Efeso pa maalu manene matambe bya anu dyakula dya mu myakulu cyanààna, ne dyandamuna dya myakulu abi.

⁴⁹ Mpindyewu, díbà adi muntu yéyè mufunde mukenji mufila ku dyakula dya mu myakulu anyi mufila mu ciprofeta, ne muwuteeke pa cyambilu, wùdi ne cya kubadiibwa kùdi mpaasata kumpala kwa disangisha kubangadi, wa “EMU MMÜDÌ MUKALENGE WAMBÀ” wa kùdi bantu biine bàdi baakùle ne bandàmùne aba. Nenku aci cyòci cyenzèke anu menemene mùdi dyandamuna dyambe amu, tudi twela byanza muulu ne twela Nzambi twasakidila bwa Nyuma Wende munkaci mwetu. Cyòci kacìyi cyenzèke to, díbà adi kanùcyènjìku kabidi to too ne piikalà nyuma mubi awu muumuke munkaci mwenu. Nzambi kàtu ùshima to, Yèyè ùtu misangu yònsò anu bulelela.

⁵⁰ Díbà adi, nudi numona's, nukàadi mpindyewu bakole mu mushindu mukumbane bwa nwènù kwikala nwenzaku maalu bu bantu bakulumpe, kabiyi bu bânà batekete to (“guu, guu, guu”), bikengela wikalèku ne cintu kampanda cyùdi wamba cìikalè ne cìdici cyumvwija.

⁵¹ Ekeleeziya mpindyewu, pàkaadiye wènda ùshàalakù mu bulongame apa, afikeku ku bulongame *ebu*. Muntu yéyè mwambe díyì dya ciprofeta. . . Muntu yéyè mulwe munkaci mwenu, kàyi mulongeshiibwe to, kadi nwènù nwakula mu myakulu, wèwè's newikalè musenji kùdiye yéyè, kí mmumanye cyùdi wamba aci to. Nwamonu anyi? Ne bushuwa leelu wa Ndaya ewu udikù cibwejàkàjì búngìci pa ciine aci, s'cidi cìfila cilendwishi. Kadi umwe akule mu myakulu, ne mukwabo andamune ne afile mukenji, ne bàwùbadilè ku cyambilu eku, bwa cìikalà mwa kwenzeka aci, ne pashiishe cyènzèkè, nudi numona cìdi cyènzèkà. Nubāmbilè ne: “Māālabā pa díbā *kampanda*,” anyi “lumingu lūlwalwā elu pa díbā *kampanda*, nekwenzeke cintu *kampanda*,” díbā adi mwena bupidya ùdi musòmbe mwaba awu ìkalè muteeleje cyòci aci ne amone ne ncidyanjila kwamba kumpala kwa kwenzekaci. Díbà adi yéyè neamanye ne nyuma udi munkaci mwenu nnyuma kaayi, necìikalè Nyuma wa Nzambi. Ki cyākambā Pòlò ncyòci aci ne: “Díbā adi bu muntu mwa kwamba ciprofeta ne kusokolola maalu masokome, disangisha dijima kadyakudyelaku panshi, anyi, mwena bupidya, wamba ne: ‘Nzambi ùdi munkaci mwenu’ anyi?” Nwamonu anyi? Bwalu kaciyena mwa kwikala. . .

⁵² Kadi mpindyewu katwena baswe. . . “Patùcìvwā mwānā,” mùdi Pòlò mwambe, “mvwa ngenza maalu bu mwānā,” mwākambilāye beena Kolinto mwaba awu, “mvwa ngaakula

bu mwânà.” Ûwva ne meeji a bwânà. “Kadi pângààlu muntu mukulumpe, ngâtèèki ku luseke maalu a bwânà.”

⁵³ Mpindyewu, ndi nwwambila nwênù bônso, nwamonu’s. Mpindyewu, kùkaadi ndambu wa bidimu, nuwva bânà ne mapà aa, nunaya nwâtwa kumpala nwâtwa paanyima. Kadi nudi bapicile mu kalaasa kàà matuku àbûngì mpindyewu, dîbà dyákànyì dya nwênù kwikala bantu bakulumpe, kanùyì mwa kukwata naawu mudimu anu bwa kunaya naawu to. Mapà aa, mmasantu, ngàà kùdì Nzambi, nenku kanwena nunaya naawu to. Tushiilayi Nzambi kaaba akwate naawu mudimu. Ki cìdì mudimu wenu wa bwambi muswe kwikala ncyôci aci. Mushindu wa kuteeka Branham Tabernacle mu mudimu ngwôwò awu. Ne—ne cyôci eci pìikalàbo mwa kucyela mpatà, nansha dîbà kaayi, mukaba wa mêyi ewu wùshaalè bu ntemu wa ne mushindu wa kucyenza mu Branham Tabernacle ngwôwò awu.

⁵⁴ Bu kwôkù mwa kubwela mwenyi, bwalu nutu naabo dîbà dyônso, bu mùdibi ne ewu tabernacle kàtu wa usungulujangana bilondeshile mangumba to, kùtu kùbwela bantu bàtu kabàyi bapetè dilongesha edi bilenga, kabeena naadi to, kî mbamanye ciine cya nsongo to. Ne wabò mpaasata mwine, bôbò nebatupike bàya muulu ne bàkòsoloja mukenji wende, ne banyangakaja dibiiikila dya ku cyoshelu, ne bàakula mu myakulu ne bikwabo byônso mushindu awu. Nwênù nudi bantu bàdì balongeshiibwe bîmpè kutamba abi. Nwamonu anyi? Nenku paanyima pàà disangisha, yèyè mupatuke mu njila wa bulongame, dîbà adi mmudimu wa mulami bwa kuya kùdiye. Kabikengedi bwa mpaasata wenu kucyenzaye to amba anu bikafike mu mushindu wa kakùyì mulami nansha umwe mwaba ewu, kadi mulami ngudi ne cya kutangila bwalu abu. Nwamonu anyi?

⁵⁵ Mpindyewu, paanyima pàà disangisha. . . Muntu awu yèyè anu ùjuuka ne ùfila mukenji, mpaasata, pìikalàye muswe kwanji kwimana ndambu bwa kushiisha kutungunuka, mbilenga be, nwamonu’s, aci ncitangile mpaasata. Kadi pashiishe dyakamwe, kumpala kwa muntu awu kupatukaye mu citanda, mulami amwangate aye nende ku luseke ne ayiikilangane nende pa bwalu abu.

Kadi yèyè mucyèlè mpatà, nda nende ku mukaba wa mêyi ewu wàmbe ne: “Èci ncìdì mwepiskopo, anyi, mutangidi wa ekeleeziya. . .” (Kî cìdì *mwepiskopo*, ne. . . mutangidi kanà yônso ewu, nwamonu’s, ki mùdìbo bacibiikila mu Bible ne, “bwepiskopo,” nwamonu’s, pa nanku ki yèyè awu udi mukulu—mutangidi wa ekeleeziya.) “nenku. . . mêyi matuma ki ôwò aa ne mushindu wùdì ekeleeziya wetu ubyenza. Mpindyewu, tudi banange bwa wèwè kwikalà kulwa kufila mukenji webe. Kadi wèwè ne mukenji wa kùdì Mukalenge kadi mwikàle. . . wùdì mwa kufidiibwa, wèwè ùbandè kuneeku uwuteeke pa cyambilu cyetu apa, nenku mwambi wetu neàwùbadilè disangisha, mukenji bwa disangisha edi.”

Kadi kacyna ne cya kwikala anu dyambulula dya Mifundu to, ne bintu bya mushindu awu. Cìdi ne cya kwikala mukenji wa buludi wa bàmbila bantu, wa cintu kampanda cìdì cyàmba kwenzeka, anyi cintu kampanda cìwà cikengela bwa bôbô kwenza. Mbyumvwike anyi? Eyo.

222. Mpindyewu, kùdikù mushindu kampanda mwîmpè wa kulama bulongame mu ekeleeziya ùdiku mutambe kwikala kuvulwija bantu ku—ku dyambulula dya balami bilondeshile cyòci aci anyi?

To, aci, s'nyawu ngáfumu ku dicyumvwija. Alu ndukonko lwisâtu.

⁵⁶ Nwênù balami, wênù mudimu ngwà kulama bulongame mu ekeleeziya, ne musangeelu ne ngiikàdilù wa bulunda. Ne dîbà adi ki cinùdi ne cya kwenza, pàdì muntu ùpàtuka mu bulongame mu ekeleeziya, anyi ùbwela mwaba ewu mwenze bu muntu mukwacike maala, anyi muntu kampanda ùbwela.

⁵⁷ Byenze bu mwàkaasàbo mwambi awu cingoma pa cibumba cya ku cyambilu diloolo adi kuntu kwaka. S'nuvwa bumvwe bwalu abu, muntu ùvwa mukwacike maala awu ubwelamu ne cingoma cya tundimba cya mbungu yibidi. Ùvwa wèla mbila mikole ùbîikila mukajende, ne—ne mwikàle ukeba mukajende, kadi kuyaye buludi mutangile kùdì mpaasata. Ki mpaasata kumuleejaye mukajende musòmbè mwaba awu, kadi yèyè ùvwa muswe kumwashila cingoma anu mu ekeleeziya mene amu, ki mpaasata kubangaye kwakula nende. Kadi pamutu pàà—pamutu pàà. . . Muntu awu ne—ne cingoma kadi kùkùdimukayè e kwashilaye mpaasata anu ku cyambilu aku, ne pashiishe kwasaye mukajende, ne pashiishe kudyasaye yèyè mwine.

⁵⁸ Mpindyewu, bu ne kùvwakù musùmbà wa balami mwaba awu pààkabwelà muntu awu ku ciibi aku ne cingoma aci apu, nunku's mbamwele kâpa, bamunyenge cingoma aci mu cyanza cyende amu. Nwamonu anyi? Nwamonu's, abu's ki—abu's ki balami bakwaci bàà mudimu ne bulongame. Nenku mpindyewu, bintu ebi nyewu biye mu mushindu wùyaayàbi mpindyewu ewu, s'nudi bafwanyine kutekemena anu cintu kanà cyònsò. Kadi, vulukaayi ne, balami mbampulushi bàà Nzambi mu nzubu wa Nzambi, cidi muntu mukwabo kanà yònsò wela meeji nansha ciikàle cinyi. Misangu mikwabo mpulushi kàtu muswe kujuuka kuya bwa kakwata muntu kampanda to, pàmwäpa umwe wa ku balunda bende, kadi yèyè mmudicipe bwa mudimu awu, bùdiye naabu mbwà kucyenza nansha bishi. Awu ngwèndè mudimu wùdìye wènzela cimenga cyende. Nwamonu anyi?

⁵⁹ Ki mudimu wa mulami wùdiye wènzela ekeleeziya ngwòwò awu. Nenku pàkaadi muntu ùtùpika wîmana ùbanga bwa kwimanyika mpaasata, anyi cintu cikwabo cya mushindu awu, mpaasata pende mwikàle mu diyiiisha dyende, balami bàdi ne cya kuya kùdì bantu abu, babidi anyi basatu, kwamba ne: “Tudi

mwa kuyiikilaku neebe anyi, mwaneetu wa balume?” Nwamonu anyi? Kupatuka nende pambelu pàà ekeleeziya, kubwela nende mu birô, *emu* nunku anyi mu birô bikwabo kampanda, nenku kuyiikila nende pa bwalu abu, kwamba ne: “Kabyena bikengela bwa wêwê kwimanyikangana to.” Nudi bamanye’s, ncibawu cinènè cya—cya bakukosela ku tubàdi nansha bishi bwa wêwê mwimanyike disangisha. Nwamonu anyi? Kadi bamwe bantu, bu mùdi muntu mwenzavi anyi cintu kampanda, wa ùlwa munkaci mwenu, nudi bamanye’s, ne—ne mukoleshi wa maalu kampanda wa mu maalu a ntendeleelu, wa—wa ùbanga kwenza bintu bya lukutukutu, dîbà adi balami. . . Ne piikalà—ne piikalà balami kabàyi bamweka bu bàdi ne bukole bwa kucifùdisha, dîbà adi kasumbu kàà balubuludi anyi muntu kampanda mukwabo kanà yônsò mu ekeleeziya ùdi mwa kjuuka bwa kwambulwisha muntu bu nanku. Aci nudi bamanye.

⁶⁰ Nenku—nenku mpindyewu ngànji ngeelululebi lukonko alu mwaba ewu.

Kùdikù mushindu kampanda mwîmpè wa kulama bulongame mu ekeleeziya ùdiku mutambe divulwija dya bantu ku dyambulula dya balami, mpindyewu, ku musangu anyi?

⁶¹ Mpindyewu ndi ngeela meeji ne—ne mpaasata, ku musangu ne ku musangu. . . Anyi kwela mukaba wa mēyi ewu, kwenza bwa kushààlawù bu ntemu. Balami mbampulushi, ne dīyī dyabo mmukenji ne dīyī dituma. Nwamonu anyi? Ne bôbò bàdi ne bukookeshi bwa kùdi ekeleeziya ne nansha mene kùdi mikenji ya ditunga bwa kuvwija nzubu wa Nzambi awu mwaba mujaalame. Nenku muntu nansha bamwamba ne nganyi mudidinge anu mubengangane ne mulami ku mēyi mushindu awu, ngwa bakosela bidimu kuumukila ku—ku bibidi too ne ku dikumi bya buloko bwa cinsangàngà. Wêwê mumwambile bwa kuya kadi yêyè kàyi uya to, anyi cintu kampanda cya mushindu awu, muntu kampanda wa nsòmbelu wa cimvundu, kēna anu mumanye cidiye wenza aci to bwa. . . Ùdi ùdizanjika yêyè mwine, anyi mukumbanyine yêyè mwine manyooka a bibawu bya mishindu yônsò, cintu kanà cyônsò.

⁶² Ne pashiishe pàkaadibi bikafika ku ne muntu kampanda. . . Mpindyewu, bu mùdi. . . Nenku muntu yêyè ùkàtamuka ùbanga nsòmbelu wa cimvundu. . . Pàmwāpa anu kwakula kwa mu myakulu cyanààna eku anyi cintu kampanda, mēmè ncyēna mufwanyine kwelamu dīyī to. Nwamonu’s, numulekelaayi atungunuke, bwalu pàmwāpa nī mmwenyi. Bôbò biikāle beetu twètù, dîbà adi nulekele anu, diloolo dyàlondà, nwènù balami nwangate anu mukaba wa mēyi ewu, nwāmbè ne: “Mpindyewu, netwélè mukaba wa mēyi matuma a ekeleeziya kumpala kwa twètù kubanga disangisha, ndi muswe bwa bantu bônso bàwūmvwè.” Nenku nwènù bampaasata ne nwènù bônso nudi mwa kukwacishangana mu mudimu mushindu awu.

223. Mpindyewu, Mwaneetu Branham, kadi bishi bwa kalaasa kàà Dyalumingu? Mwaneetu Branham, pa bidi bitàngilà kalaasa kàà Dyalumingu (eyo), bìvwa bikengela bwa kwikalaku kumpala kwa diyiiisha anyi?

⁶³ Eyowa, ki mushindu wutùtù tukènza misangu yònsò ngwòwò awu. Ikalaayi nwenza kalaasa kàà Dyalumingu kumpala kwa diyiiisha. Nenku aci cidi cipeeshaku bânà batekete bàtù bàbwelà mu kalaasa kàà Dyalumingu mushindu, bwa kutangalajabo tulaasa twabo atu. Nenku bôbò—nenku bôbò baswe. . .nenku bânà batekete kabàtu babyumvwa to, ne byôbì bikengela bwa kushàalabò basòmbè mutanci wònsò wa diyiiisha awu ne pashiishe kubwelabo mu kalaasa kàà Dyalumingu, bânà batekete's bàdi bàcyòka. Kalaasa kàà Dyalumingu kikalè kènzeka kumpala, ikalaayi ne dîbà dimana kukosa, anu pa dîbà kampanda dikosa dîdì kalaasa kàà Dyalumingu kabwela. Mulombodi wa kalaasa kàà Dyalumingu ngudi ne cya kutangila bwalu abu, bwa ne kalaasa kàà Dyalumingu aka kàbwelè pa dîbà kampanda, dîbà dikosa. Ne kàdi katangalaka pa dîbà kampanda. Kalaasa kàà Dyalumingu kajimà, ikalaayi bakose cikondo kampanda bwa cyôci aci, ne pashiishe kàtangalake.

224. Bìvwa bikengela bwa mulongeshi wa kalaasa kàà bakulumpe kwikalaye muntu kampanda mukwabo udi kàyi mpaasata anyi?

⁶⁴ Pùikalàbi ne ki munùdì bumvwangane nanku's. Mpaasata yêyè muswe kulongesha kalaasa kàà Dyalumingu ne pashiishe kùlwa kuyiisha diyiiisha paanyima, abi mbilenga ne bimpè be pùikalàye muswe kubambakaja midimu yibidi ayi. Kadi yêyè kàyi muswe to, dîbà adi ikalaayi ne mulongeshi wenu wa kalaasa kàà Dyalumingu kàà bakulumpe, nwamonu's, bwa kalaasa keenu kàà bakulumpe. Nenku dîbà adi mpaasata yêyè—yêyè ne muntu kampanda mukwabo mu meeji, ne mwine muntu awu muswe kucyenza, ikalaayi badikosele nwènù biine tusuna makumi asatu, anyi bûngì bwònsò bunwikalà mwa kukosela kalaasa keenu kàà Dyalumingu abu, tusuna makumi asatu anyi makumi asatu ne tutaanu, anyi makumi anaayi, cyònsò cùikalàku aci.

⁶⁵ Nenku bìvwa bikengela kwikalaku ngonga muteeka kaaba aka. Ne pàdì anu ngonga awu wediibwa, mbwena kwamba ne. . .anyi ngonga wa ekeleeziya, pàdiye wediibwa pambelu, ki ditangalaja dya kalaasa kàà Dyalumingu ndyôdì adi. Nenku pàdì anu ngonga awu ùdila, mbwena kwamba ne byònsò bìbwelè mu bulongame anu mwaba awu mene.

⁶⁶ Kwikalè cikondo bule kampanda dîbà adi bwa musambu umwepele anyi yibidi, cyònsò cinwikalà mwa kwimba aci. Kî ndîbà dipitepìte bûngì to, nenucyokeshe bantu pa kubalama ntanta mupitepìte bule, nwamonu's. Nenku elàayi anu ngonga cyaànà, nwîmbè musambu ne cyònsò cinwikalà mwa kwenza

aci, ne pashiishe nutume tulaasa twenu mu myaba yatu. Nenku dyakamwe pàdi anu cikondo aci cikumbana, twámbe ne neciikalè pa—pa díbà dikumi jaaaja, anyi dikumi ne tusunsa makumi asatu, anyi dikumi ne tusunsa dikumi ne tutaanu, cyònsò cidiku aci, bélé ngonga awu ne mulongeshi yònsò údi utangalaja kalaasa kende, úlwa mu bateeleji emu. Nenku díbà adi. . . Nenku nufile mulubu, mulubu wa kalaasa kàà Dyalumingu, ne pashiishe nutangalaje cintu cyònsò aci, ne bònsò bàdi baswe kushààla bwa diyiisha bálondelè bóbò. Nwamonu's, díbà adi bìdi mu bulongame.

Ndukonko anyi? **Mbúngi kaay-. . .** [Mwanèètù wa balùme kampana údi ukonka Mwanèètù Branham ne: “**Nenku díbà adi's tudi ne tulaasa tutàpulula's, mu ngaakwilù mukwabo?**”—Muf.]

⁶⁷ Kaa, eyowa's, bìvwa bikengela bwa nwènù kwikala naatu nanku. Mwànà wa—wa bidimu bisatu kèna mwa kuumvwa bìdi wa bidimu dikumi ne binaayi mufwanyine kuumvwa to. Ngeela meeji ne ndi ne lukonko alu kumpala eku ndambu.

225. Bivwa bikengela kwikalaku tulaasa búngi kaayi?

⁶⁸ Bivwa bikengela bwa nwènù kuteeka tulaasa twenu mu. . . Bu mùdi kalaasa kàà twànà tukese twa menemene tùdi tükèba bwa kwikalaku ne bimfwanyi, aci's ndutatu lukole be bwa mwànà wa balume anyi wa bakaji wa bidimu dikumi ne binaayi. Nwamonu anyi? Bivwa bikengela bwa nwènù kwikalaku ne muntu kampana bwa kwangataye yèyè kalaasa aku bwa bânà bàà bakese bàà mu maboko abu, maamù kampana mukulumpe anyi kampana udi mumanye mwa kubabeeja. Tukwabo tulaasa, ngeela meeji, bìvwa bikengela kwikalatu ne muntu kampana mutambe kukumbanyina bwa kutwala Díyì. Nwamonu anyi? Nenku bivwa bikengela bwa kwikalaku tulaasa. Twánjìbi kwamba mpindyewu ne, nkufwanyine kwikala kalaasa bu kàà kuumukila ku. . . Tulaasa tusatu bwa twòtò tukese.

⁶⁹ Bivwa bikengela bwa kwikalaku kalaasa kàà bânà bakese menemene, bìvwa bikengela bwa kwikalamu bàà bidimu bya byumukila bu pa bitaanu nanku. Nenku bakwabo bònsò bàà mwinshi mwa bidimu abi bìvwa bikengela kwikalabo babalame kùdi baamamwàbò, ne kwikalabo baya naabo mu mwaba wa dibààmushila mabeele pùikalàbi bikengela nanku munda mwa díbà dya—dya diyiisha adi, bóbò babangè mukodi. Ki katèèkèlè kàà mwaba wa dibààmushila mabeele muntwamu nkòkò aku.

⁷⁰ Nenku ndi ngeela meeji ne bìvwa bikengela bwa—bwa tulaasa atu kwikalatu tulongolola bwa bânà bakese bu mùdi bàà kuumukila pa bidimu bya biipacila ku bitaanu anyi bisambombo, too ne ku bidimu mwandamukulu anyi citeema, dikumi, cintu bu nanku awu. Ne pashiishe bàà kuumukila ku bidimu dikumi too ne ku dikumi ne bitaanu bìvwa bikengela kwikalabo mu—mu kalaasa kàà bansongà. Ne pashiishe kalaasa

kàà bakulumpe bàà bidimu bipite pa dikumi ne bitaanu, bwalu bôbô bàdi . . . bôbô ne cipimu cikumbane cya—cya . . . mu matuku etu aa's bàdi mwa kupeta mudimu ne bàjinga mwa kwenza masungulangana pàkaadibo bwine bukole abu, pabwìpì ne pòpò apu; pa nanku bivwa bikengela bwa bôbô—bôbô kwikala bakumbane bwa kuteeleja Dìyì, kadi kulwabo mu cibambalu cinènè ne kuteelejabo byôbì abi.

226. Bivwa bikengela bwa balongeshi kwikalabo banganyi?

⁷¹ Kadi's ki bwalu mbwôbù abu, disungula dya balongeshi beenu nwênù biine ndinutangile anu nwênù. Nenku bivwa bikengela bwa nwênù kwenza aci, kubateekamu, kupeta muntu kampanda. Nenku kudisangisha ne ekeleeziya, kwamba ne: “Nganyi udikù. . . Nganyi udikù mwaba ewu mudyũmvwè mulombodiibwe kùdì Mukalenge?” Nenku dîbà adi kwangata mulongeshi wa mukumbanyine awu. Nenku pashiishe aci cyenjiibwe. Bìdì bikengela cùikalè bwalu bwa dîsù dikole, bânà beetu. Mulongeshi awu yêyè kàyi mwa kwikala mukumbanyine bwa cyôci aci to, dîbà adi nushintululaayi balongeshi.

⁷² Pààkùmbanà cikondo, ku bulombodi bwa Nzambi, mêmè muumvwe ne Orman Neville kaciyena kabidi mukumbanyine bwa kwikala mpaasata mwaba ewu to, nêngiikalè mwa kucyambila ekeleeziya. Pângiikalà mumone cintu kampanda cimwepele kaaba aka, ngeela meeji ne nwênù balami kanwena bafwanyine kukumbanyina kwikala balami, nêngiikalè mwa kucyambila ekeleeziya, ne: “Ndi musangane ne kùdì mulami kampanda mwaba ewu wenza cintu kampanda civwà kaciyi cikengela kwenzaye to, ne kèna ulama mwaba wende wa mudimu to,” ne bikwabo bya mushindu awu, anyi mulubuludi anyi nì nganyi yònsò. Kì mmêmè udi mwa kwenza disungula bwa kuciitaba anyi kucibenga to, bìdì bikengela bwa ekeleeziya kwenzaye yêyè aci, kadi ncyà bushuwa ne mêmè nêncileejè kumpala kwa ekeleeziya. Nwamonu's, bwalu civwà cikèngelà kwenza ncyôci aci. Kì cîndì mêmè ne kwikala ncyôci aci, mêmè bu mutangidi, ndi ne cya kutangila bwa kumona ne cìdì munkaci mwa kwenzeka ncinganyi. Twêtù aba mutuyààya's mmu Dyulu, kì mmu mwaba kampanda lwà pambelu apa ku didikungwija kampanda anyi cintu kampanda bwa kwenza bikàsà bùngì cyaànà ne kudyatangana muntu ne mukwende, ne kunaya ndundu wa baseball nansha. Tudi mwaba ewu bakwate mu byanza byetu cintu cya citambe kwikala cya mushinga mukole cidiku pa buloba, Dìyì dya Nzambi, ne bìdì bikengela bwa kucikumbaja mu bulongame bwa cijila.

Bivwa bikengela bwa balongeshi kwikalabo banganyi?

⁷³ Dibasobola ndinutangile anu nwênù. Kadi mêmè ndi mufwanyine kwangata, bwa bânà bakese abu, ndi mufwanyine kwangata mukaji mukulumpe, wa bwena udikù mwa kwenza ciine aci. Kadi bwa bansongà, ndi mufwanyine kwangata

mulongeshi wa dísù dikole, kàyi wa wènza anu kupatuka pambelu apa ùya kadya minyiinyi mikàlanga nansha. Mbifwanyine kwikala anu bilenga yêyè muswe kwikala ùya kadya minyiinyi mikàlanga, kadi cintu cyònsò yêyè mucitume anu ku bya nanku. . . Nucitumaayi ku Diyì, nuteeke muntu udi mukumbane bwa kukwata Diyì. Ne nebyenzeke ne, ekeleeziya ewu kàyi utwaku nyama ku mikolo. . . Kudya kwa minyiinyi mikàlanga kùdi anu kulenga, ne—ne twine tuupikìnikì tukese tukese tunùdi anu bajenge kwikala kuya kenza panùdi nusangila bwa kwenza bwobumwe atu, s'bidì anu bilenga, aci—aci ncìvwà cikengela kwenza bwa nwènù kucyonkomoja bânà. Kadi mu ewu mwaba muneemu *emu*, eci n'Diyì dya Nzambi. Kudya kwa minyiinyi mikàlanga mpanùdi nudisanga, anyi cintu kampanda cya bu nanku, kadi kî mmu nzubu wa Nzambi emu to. Ne bôbò aba mbamanye, mu bushuwa bwa bwalu twètù aba tudi bamanye ne katwena twitabuuja lukutukutu lwa bya—bya—bya maafètes elu ne byònsò bya nanku awu mwaba ewu nansha, twètù—twètù. . . nwènù's nudi bamanye cìdi cìmpè kupita abi.

227. Bivwa bikengela bwa nganyi kwikalaye kumutu kwa kalaasa kàà Dyalumingu bwa kukàlamayè mu bulongame?

⁷⁴ Mutangidi wa kalaasa kàà Dyalumingu. Nenku ki wèndè mudimu ngwòwò awu. Yêyè kèna ne cya dyenza nansha cimwe ne balami, ne balubuludi, ne bampaasata, anyi ne muntu mukwabo nansha umwe to, yêyè ùdi ne mudimu anu wende yêyè sungasunga. Mulongeshi wenu wa kalaasa kàà Dyalumingu nansha yêyè mwikàle nganyi, mèmè ncyèna mumanye to. Kadi mulongeshi wa kalaasa kàà Dyalumingu awu ùdi ne cya kwenza bwa ne kalaasa ne kalaasa kònsò kùkalè pa mwaba waku, ne mulongeshi yònsò ìkalèpu, anyi kupingaja mulongeshi mukwabo pa kaaba kàà yêyè mulongeshi awu piikalàye kàyipù dituku adi.

⁷⁵ Nenku anu kumpala kwa Dyalumingu. . . Pàcìdi anu—anu maleesona munkaci mwa kulongeshiibwa apu, bìdi bikengela bwa mutangidi wa kalaasa kàà Dyalumingu kuvwilapu bwa kwangata milambu yidìbo basangishemu ayi (milambu yabo misangisha ya kalaasa kàà Dyalumingu ayi), ne mulubù wa búngì bwa bàvwàmù, búngì bwa Bibles yivwàbo naayi mu kiine kalaasa aku, ne bikwabo, ne kwezayè mulubù wa byòbì abi. Ne pashiishe kwimana kumpala kwa bateeleji kumpala menemene kwa diyiiisha, pàdìbo bamupeeshe cipoolo cya dîbà bwa kucyenzayè, pàdìbo benza mulubù wa kalaasa kàà Dyalumingu paanyima pàà kalaasa kàà Dyalumingu kamane kujika apu, kwamba búngì bwa balongeshi, búngì bwa bàvwàmù, búngì bwa bantu bònsò basanga ntete bàvwà mwine mu kalaasa kàà Dyalumingu amu, milambu yònsò—yònsò búngì bwayi, ne bikwabo bya mushindu awu. Balami, balubuludi, bampaasata, kabeena bôbò ne cya kwenza aci nansha. Kabeena ne cintu nansha cimwe cya dyenzamu to, awu mudimu ngwà mutangidi wa kalaasa kàà Dyalumingu.

⁷⁶ Ne pashiishe yèyè mumone ne kalaasa kàà Dyalumingu kadi kakengela bintu kampanda, bìdi bikengela dîbà adi bwa yèyè kubileeja kùdì—kùdì kasumbu kàà balubuludi, ne balubuludi bàdi bànji kwenza cisangilu pa bwalu abu, dyambedi. Ne pashiishe balubuludi, bôbô basangâne ne mu cibucilu mùdi mfranga mikumbane ne bikwabo, kupicila kùdì mulami wa cibucilu, dîbà adi byôbì abi bìdi mwa kusùmbiibwa; yèyè ùkèba cikwabo cintu bwa mikanda ya kubala, anyi nî ncinyi cyônsò, anyi ndambu wa Bibles anyi cintu kampanda, pàdîbo baswe kusùmbila muntu kampanda Bible, nudi bamanye's, udi mwa kupeta myaku yàbûngì menemene awu ne kuteela Mifundu ya yàbûngì menemene awu, matapishi kampanda anyi cintu kampanda ciikalàbo mwa kupeeshangana aci, matapishi, ne biikàle bàswa kuwùsùmba ku mfranga ya ekeleeziya. Dîbà adi aci cileejii bwe kùdì—kùdì—kùdì—kùdì balami. . . ne pashiishe bôbô bakebe bwa kumanya ní mùdi—ní mùdi—ní mùdi kantu mu cibucilu. Nwamonu anyi?

⁷⁷ Nenku dîbà adi ngeela meeji ne aci ncifileku dyandamuna ku nkonko yitaanu ayi pa bwalu abu.

Mpindyewu lùdi lulondèle alu, lùdi ne:

228. Mwaneetu Branham, pa bìdi bitàngilà bulongame bwa ekeleeziya, tudi baditacishe bwa kwenza bilondeshile mushindu wutùdi tuumvwa mēyi matuma mafidiibwe dîbà dya dilambula dya ekeleeziya mupyamupya. Kadi mu kwenza kwa nanku, bamwe mbafike too ne ku difiika dya munda buumuke ne mu ekeleeziya. Ne bakwabo kî mbasweku kuteeleja kantu nansha kamwe katùdi twamba to, nangananga bânà. Tudi baakùle ne baledi pa bìdi bitàngilà bânà bààbò balela, kadi kî mbaswe kutangala bwalu bwa bânà biine abu to. Mpindyewu, twètù mbàdi bumvwe bibi anyi? Anyi, tudi tucyenza mu mushindu wùdi kawùyi wôwò? Twasakidila.

Mpindyewu, ngănji ngandamune elu mu mushindu ùdiyi yenda yilondangana ewu.

Pa bìdi bitàngilà bulongame bwa ekeleeziya, tudi baditacishe bwa kwenza bilondeshile mushindu wutùdi bacyümvwè cifiidiibwe dîbà dya dilambula dya ekeleeziya mupyamupya.

⁷⁸ Mpindyewu, aci's mmu cyôci, nudi nwenza bu mùdici. Mpindyewu, elu lùdi ne cya kwikala lwa balami, mûndì ncinka, bwalu cidi mwaba ewu mene, mmudimu wa bulami. Eyo.

Kadi mu kwenza kwa nanku, misangu yàbûngì tudi. . . misangu yàbûngì bantu mbafike too ne ku ditufiikila twètù munda.

⁷⁹ Ne mēmè, bàtu bamfiikila pàanyi munda! Nebafiikile muntu kanà yônsò munda. Nwamonu anyi? Muntu udi wenza nanku awu awu, kùdi cintu kampanda cipampalamuke mu muntu awu.

Yèyè awu kèna bîmpè kumpala kwa Nzambi to, bwalu Nyuma wa Kilisto ùdi ukookela dilongesha dya Kilisto, nzubu wa Kilisto, bulongame bwa Kilisto. Nwamonu anyi? Ne muntu mulume kanà yònsò udi . . . anyi muntu mukaji kanà yònsò, anyi bantu kanà bònsò, bânà, bàdi bafwanyine kufiikila mulami wa difwana dya Nzambi munda udi muswe kubambila bwa kwikalabo . . . ne, anyi muledi kanà yònsò udi mufwanyine kufiikila mulami munda . . . Cya bushuwa, tudi baswe bantu bònsò batùdi mwa kupeta mu ekeleeziya ewu balwe; kadi aci cyôci cifwanyine kufila anu ndululu mwaba mukwabo kampanda, kùdi dyèbà anyi “kabwe kavùngila mu lukonyi,” mutùvwà ne ciibidilu cya kucyamba. Muntu awu kèna bîmpè to.

⁸⁰ Yèyè muumuke muye, kùdi cintu anu cimwepele cya dyanza: kumulekela kuyaye, kadi kumusambidila. Nwamonu anyi? Dìbà adi pàmwàpa bamwe bàà ku balami bàye ku ekeleeziya wend- . . . anyi, bàya kumbelu kwende musangu kampanda, bwa kuya kamanya ne mmumuke bwa cinyi, ne kumukonka ne bubuwa pa cinyi. Dìbà adi, ne yèyè . . . Àteetè bwa kumona ní ùdikù mwa kumupungisha. Yèyè kàyi mwa kumupungisha to, dìbà adi angate bantemu babidi anyi basatu bakamufile, bwa bààfikakù ku dibumvwa bôbò. Dìbà adi bôbò kabàyi mwa kubumvwa to, dìbà adi cyàmbiibwè kumpala kwa ekeleeziya pìikalàye cidimba cya ekeleeziya mwaba ewu. Dìbà adi ùdi . . .

⁸¹ Nenku dìbà adi bôbò kabàyi bidimba bya ekeleeziya to, mu bushuwa bwa bwalu bôbò kabàyi bidimba bya disangisha edi to, bìvwa bikengela *kubafikisha* ku dikookeshiibwa. Nwamonu's, bìdi bikengela bwa bôbò—bwa bôbò kuteeleja mèyi etu matuma a kaaba aka, bwalu ôwò aa ki mèyi matuma a ekeleeziya. Ebi mbintu bitùdi katùyi baswe kwenza to, bintu bìndi mème nciyi munange kwenza to, kadi ki bintu mene bìdi ne cya kwenjiibwa. Nenku ndi ndifileeja mème mwine: ne ndi mbambila mwaba ewu ku mukaba wa mèyi ewu ne, mmèmè, bàdi mwa kungumvwa ngaakula ne kumanyabo ne mmèmè, kí nwènù abu to. Unùdi beele nkonko eyi *mmèmè*, ne ki mème ewu nzwambilabi ne mwanyì mwònsò mùndì pàànyì mumanye bilondeshile Dìyi dya Nzambi.

⁸² “Mpindyewu, bantu abu bôbò bafiike munda ne bapatuke munkaci mwenu, Mifundu yidi yamba cinyi pa bwalu abu, Mwaneetu Branham?”

⁸³ “Mbatatuke munkaci mwetu bwalu kabàvwa bàà kutùdi to.” Nenku aci's cidi cikosa bwalu. “Bapàtùke mu ekeleeziya,” cidibo benze's ncyôci aci. Eyo.

Bakwabo kî mbasweku kuteeleja kantu nansha kamwe katùdi twamba to, nangananga bânà.

⁸⁴ Bânà bàdi ne cya kumanya dikazamuna, bìvwa bikengela kudipetelabo kwabo kumbelu. Kadi nansha byôbi ne mbàànyì mème, bânà bàànyì's bàtu bàbwela mwab'ewu dìbà kanà

dyônsò, bôbò babangè nsòmbelu wa cimvundu, ncyêna muswe bwa nwênù kwenza kansungansunga nansha kakese to; Sarah, Rebekah, Joseph, Billy, anyi nî nganyi yônsò udi mufwanyine kwikalaku awu. Nungambilaayi mêmè, nêntangilè bwalu abu. Bôbò kabàyi mwa kuditwala bilenga to, dîbà adi nebashaale kule ne ekeleeziya too ne pàâyilàbo mwa kuditwala bilenga. Eci kî ncipalu cya manayi to, eci nnzubu wa Nzambi. Ewu kî mmwaba wa dinayila, ne dinyeemena ne bisabaata bya tukata, ne difundilangana dya tubeji, ne dikenyinamu ku mênù, ne dyelelamu bilela to, ewu nnzubu wa Nzambi; ngwà dyenzelamu maalu ne cijila cyônsò.

⁸⁵ Nudi nulwa mwab'ewu mbwà kukuukwila, kî nnansha bwa kumonangana to. Eci kî—eci kî ncipalu cya dyenzela pikiniki to, ewu kî mmwaba wa dilwa kukumbwilanganamu to; ewu mmwaba wa Nyuma Mwîmpè wa dilwa kukenketangana, ikalaayi nuteelaja cidîYe naaci cya kwamba, kabîyi bya muntu wambila mukwende to. Katwena tulwa apa bwa kubwela mu bwobumwe muntu ne mukwende to, tudi tulwa apa mbwà kubwela mu bwobumwe ne Kilisto. Ewu nnzubu wa dikuukwilamu. Nenku bânà bàdi ne cya kukazamunyiibwa, ne bôbò biikàle...kùdî baledi. Bîmanyiibwè ne balami aba... baledi bàà bânà aba bôbò kabàyi baswe kuteeleja cidî balami bambe to, dîbà adi baledi aba bidî bikengela kubalongololaku bôbò biine.

Tudi baakùle ne baledi pa bìdî bìtàngilà bânà, kadi kî mbaswe kutangila bwalu bwabo to.

⁸⁶ Pîikalàbo bidimba bya ekeleeziya ewu, dîbà adi bìvwa bikengela bwa nwênù kwangata bantu babidi anyi basatu ne kubiikila muledi awu nùdisangîshè mwaba wa nkààyeenù, mu bimwe bya ku maabîrô. Nansha yèyè mwikàle nganyi, nansha mwikàle mêmè, nansha mwikàle Mwaneetu Neville, nansha mwikàle Billy Paul ne mwanende mukese wa balume, nansha mwikàle Mwaneetu Collins ne umwe wa ku bânà bende, anyi nî nganyi wa kunùdî nwênù bakwabo abu. Tudi...Tudi banangangane muntu ne mukwende, kadi tudi beena dibanza kùdî Nzambi ne kùdî Dîyî edi. Yèyè mwikàle Doc, ki...nansha yèyè mwikàle nganyi, bidî bikengela bwa twètù kubiikilangana ku luseke muntu ne mukwende ne kwikala ne meeji matooke muntu kùdî mukwende. Mmunyi mùdî Nzambi mufwanyineku kukwata neetu mudimu, patwîkalà katùyî ne meeji matooke muntu kùdî mukwende? Netwîkale ne meeji matooke kùdîYe munyi? Nwamonu anyi?

⁸⁷ Edi ndiyî dituma, tudi ne cya kulama nzubu wa Nzambi! Ne balami bàdi ne cya kumanya mwa kwenza cyôci aci. Nwamonu anyi? Nenku ki bwa cinyi ndi nnwambila mpindyewu ne, nùtabaleelàayi maalu awu. Nenku eci, paùdî wambila baledi kadi kabàyi baswe kuteeleja eci, kabàyi baswe kuciteeleja to, dîbà adi angata mulami mukwabo anyi umwe wa ku balubuludî,

anyi muntu kampanda wa mwîmpè wa mu ekeleeziya ewu, nenku ubiikile . . . angata mulubuludi wen- . . . Angata kasumbu keenu kàà balami, balami beenu bônso ubakungwije, wâmbè ne: “Mwaneetu Jones, Mwaneetu Henderson, Mwaneetu Jackson,” anyi ní nganyi udi mufwanyine kwikalaku awu, nwamonu’s, “bânà bààbò balela bàdi bàditwàla bibi, tudi babâmbile misangu yibidi anyi yisatu pa bìdi bitàngilà bânà bààbò balela abu, kadi kî mbaswe kuciteeleja to.”

⁸⁸ Dìbà adi nudi nubii kidisha Mwaneetu Jones, anyi Mwaneetu *Nî-nganyi-apa*, ne nwamba ne: “Mwaneetu Jones, tudi bakubii kidishe mwab’ewu kwa cisangilu. Tudi bakunange, ne tudi . . . udi citupa cya ku twètù, udi umwe wa kutùdi. Itabaku ngânji anu kwela mukaba kampanda wa mêtù ewu bwa uteeleje cidi Mwaneetu Branham mwambe pa bwalu abu, wamonu’s. Mpindyewu, tukàadi bakwambile bwa wêwè kwambila bânà abu bwa kuditwalabo mu mushindu mwîmpè. Wamonu anyi? Pàdibo kabàyi baswe kuditwala mu mushindu mwîmpè, ne wêwè peebe kùyi mwa kubafikisha ku diditwala mu mushindu mwîmpè mu ekeleeziya to, ikalà ubashiya ne muntu kampanda paùdi wêwè ulwa mu ekeleeziya too ne piikalàbo bayiile mwa kuditwala mu mushindu mwîmpè mu nzubu wa Nzambi.” Nwamonu anyi? Kadi eci ndiyi dituma, bìdi bikengela bwa kuteekiibwadi mu cyezede! Nwamonu anyi?

Mpindyewu, lukonko lukwabo alu lùcidi lutungunuka.

Mpindyewu, twètù mbàdi bumvwe bibi anyi?

⁸⁹ To, mukalenge. Kanwena bumvwe bibi to, aci cidi mu cyôci. Nyewu ncyambulula, mêtù matuma awu. Mu busalaayi, kabeena bakunkona ne: “*Udikù mwa kuswa* bwa wêwè kuya kenza cintu kampanda anyi?” to. Wêwè mu busalaayi, udi *mwenzejiibwe* bwa kucyenza. Nwamonu anyi? Nenu mushindu awu ki wùdibi mu . . . Mêmè ndi mwenzejiibwe bwa kuyiisha Evanjeeliyo. Ndi mwenzejiibwe bwa kutwa Cyôci eci nyama ku mikolo nciyi ntanga cidi bakwabo bantu bàanyi mêmè ne bânà beetu ne bakwabo bônso bàmba pa bwalu bwàCì to, ndi mwenzejiibwe bwa kwenza cyôci eci. Bidi bikengela bwa mêmè kutapangana ku mwoyi ne kukosa bantu bitupa bitupa, kadi byôbi ne ndi . . .

⁹⁰ Kwèna muswe kushààla bu Oswald to. Nwamonu anyi? Wêwè kùyi mwa kubengangana ne muntu pa bìdiye wàmba to ne bikwabo, kadi pashiishe kumulabula ku cyanza ne kutungunuka anu ne kwikala ne njiya yimweyimwe ayi kùdiye, dìbà adi kùdi cintu kampanda cipampalamuke mu wêwè amu. Mêmè nciyi mwa kubengangana ne muntu pa bìdiye wàmba to (ne lwonji lwônso, bya nguumukila anu elu luseke nkatwa ku lukwabo) cibi mêmè mutungunuke anu ne kumutwa mushinga wâbûngi mùdi—mùdi Kilisto mufwanyine kumutwa, dìbà adi’s kùdi cintu kampanda cipampalamuke mu nyuma wanyi, ncyèna ne Nyuma wa Kilisto to. Nwamonu anyi?

⁹¹ Yêyè wàmba ne: “Ee, Mwaneetu Branham, ndi—ndi ngeela meeji ne dilongesha dyebe didi *bikampanda, bikansanga.*”

⁹² “Eyo, mwaneetu, lwâku tusombe tunanebi lungenyi kaaba kamwe, wêwè ne mêmè. Netuditangidileci twêtù biine. Netukabwele mu cibambalu emu pàà nkààyeetù, tubuyiikile.” Kadi yêyè mwikàle anu ùnkòsolola mu tutupa, ne bikengela bwa mêmè pàànyi kumwandamuna bintu kampanda. Munda mwa mwoyi wanyi mêmè ncìyi mwa kudyumvwa mushindu wumwewumwe awu bwende yêyè to, bwa ne “yêyè ùcìdi anu mwaneetu ne ndi nteeta bwa kumwambulwisha,” dîbà adi ncyadyakumwambulwishaku to, kakwenaku mushindu wa mêmè kumwambulwisha to. Mêmè ncìyi mumunange to, bìdi ne dikwacisha kaayi bwa kuyamu? Umwambile ne: “Dyambedi, Mwaneetu, ncyêna mukunange to, nenku itabaku mpatule aci mu mwoyi wanyi anu mwab’ewu mene kumpala kwa twêtù kubwela muntwamu, bwalu ncyêna mwa kukwambulwisha pândi ncìyi mukunange to.”

⁹³ Ne aci ncyà bushuwa’s, ne ki mushindu ngwôwò awu. Nwamonu’s, nutungunuke naaci, nudi bacyènzè anu mu cyôci menemene, ki mushindu wùvwàbi bikengela kwikalabi ngwôwò awu. Kanùtukù bacyùmfvwè bibi to.

Tudi tucyenza mu mushindu wùdi kawùyi wôwò anyi?

⁹⁴ To, mushindu mujaalame wa dicyenza ngwôwò awu. Diyì ditùma adi dilamiibwè! Bwalu cìdi ku musangu ne ku musangu. . . Mpindyewu, bânà bakese ne baamaamù, bânà bakese bàà mu maboko ne bikwabo, bôbò—bôbò nebàdilè myadi, nenku bôbò badìtwe mu didila dya myadi mipitepite bùngi ne bìimanyika mpaasata wenu kuntu kwaka, nwavulukaayi ne, nwênù nudi bamulami bende, nwênù nudi bamulami bende bàà mu Evanjeeliyo. Nwamonu anyi? Kadi cyôci cìimanyika mukenji wa Mukalenge, dîbà adi’s nwênù mbàdì balami, bìdi bikengela bwa nwènzè cinyi? Mbyenze anu mùdi, muntu wàkula mu myakulu, yêyè’s mmwenzejiibwe. Nenku muntu udi uyiisha awu, mmwena dibanza kùdì Diyì, mmwena dibanza kùdì bintu ebi. Yònsò wa kunùdì mmwena dibanza kùdì mudimu kampanda, nenku aci’s cìdi—nenku aci’s cìdi anu citùdì—citùdì ne cya kwenza mwab’ewu.

⁹⁵ Mpindyewu, katwena baswe kwindila ntanta mupitepite bule to, ne mêmè ndi mumanye ne ndi ne cipungidi kampanda mu tusunsa tukese emu, pa nanku nêngiikalè—nêngiikalè anu mwa kuteeta bwa kulwijakaja ne lukasa lwònsò.

229. Mwaneetu Branham . . .

Kùdi nkonko yisatu, yibidi pa karta aka.

Mwaneetu Branham, bìvwa bikengela bwa ngenzeli wa disangishila bantu milambu mu ekeleeziya kwikalaye cinyi? Bivwa bikengela bwa ciine eci kwikalaci cyenjiibwa mushindu kaayi?

⁹⁶ Ngeela meeji ne kabivwa bikengela bwa disangishila dya bantu milambu mu ekeleeziya kwenjiibwadi to amba anu byôbì ne mbwà mpaasata wenu. Kadi ndi ngeela meeji ne bu muntu kampanda mwa kubwela ùlòmba kàà pa luse, anyi cintu kampanda cya mushindu awu, udi... Anyi muntu kampanda mu—mu lukengelu lwa menemene, bu mùdi umwe wa ku bidimba byetu kaaba aka, mu disangisha dyetu, twâmbè ne umwe wa ku bânà beetu, yêyè ne lutatu kampanda; ee, ndi ngeela meeji ne bivwa bikengela dîbà adi kumanyishiibwaci ku cyambilu, ne mpaasata àcyènzè yêyè, ndi ngeela meeji ne mmudimu wende yêyè bwa kucyenza; mwaneetu kampanda mwikàle mu lukengelu lwa cintu kampanda, yêyè àcyâmbilè ekeleeziya, piikalàbi bikeba bwa mulambu kusangishiibwawu mushindu awu.

⁹⁷ Byôbì ne mmuntu kampanda mu lukengelu ne—ne nwênù dîbà adi kanÿyi baswe kusangishila muntu udi mu lukengelu awu mulambu to, dîbà adi beena tusumbu bàdisangishè bwa kupetanganabo pa bìdi bitàngilà bûngi kampanda bwa mfranga ya mu cibucilu yidibo baswe kupeesha mwine muntu awu. Kadi mfranga ya mu cibucilu ayi yôyi mikese pa diine dîbà adi ne kabâyi ne mushindu wa kukumbaja bwalu abu to, dîbà adi bìdi bikengela bawusangishe, ee, wikalè—wikalè... baciyiikile ne kasumbu, bape mpaasata mêyi, nenku mpaasata alombe yêyè bwa cintu ciine eci. Àmbè ne: “Mpindyewu, diloolo edi (Mwaneetu Jones, mmupete njiwu ya—ya mibi be, nzubu wende mmwoshike yônsò mubutuke.), nenku diloolo edi, twètù bu beena Kilisto, netùdisangè cimuku, muntu ne muntu wa kutùdi netulaye bwa citùdiku mwa kwenza bwa kwambulwisha Mwaneetu Jones bwa kupetululaye nzubu wende.” Nwamonu’s, anyi—anyi cyônsò ciikalàku aci. Nwamonu’s, tudi tu... netwènzè cyôci aci. Bàcyâmbè mu cyambilu, ki mushindu wa kucyenza ngwôwò awu. Ne pashiishe milayi ya mfranga yifidiibwe, ne dîbà adi bayifile kùdi mulami wa cibucilu wa ekeleeziya. Nenku milayi ya mfranga eyi bakayifucile kùdi mulami wa cibucilu wa ekeleeziya awu, ne bamupeeshe yêyè. Ne—ne yêyè apeeshe muntu awu kabeji kàà mfranga bwa bwalu abu, bwalu ncyêna mumanye nî mbya balondolwelangana bwa bitàdi anyi nî kî mbyôbi; ndi ngeela meeji ne mbya nanku bwa cintu cya mushindu awu.

⁹⁸ Mpindyewu, kadi pàkaadibi bya bu mùdi muntu—muntu mwenyi kampanda ùbwela—mwenyi kampanda ùbwela byenze bu ne ùdi... muntu ubwela, mwambe ne: “Ee, nudi bamanye mùdi bwalu anyi? Ndi—ndi—ndi mu lwendu kadi ndundu wa mashinyi mmungeele kàpatà, nenku ndi dijinga ne ndundu mupyamupya. Nsangishilaayiku mulambu diloolo edi bwa mpete ndundu mupyamupya.” Mpindyewu, aci kabivwa bikengela bwa kwenjiibwaci nansha. To, aci kabivwa bikengela bwa kwenjiibwaci to. Kadi byôbì bimwekaku ne—byôbì bimwekaku

ne ncintu cya mushinga, cya muntu kampanda unùdì bamanye, kasumbu nkafwanyineku kudisangisha ne kwamba búngì kampanda bwa mfranga ya kulombesha kùdì mulami wa cibucilu bwa kusùmbila muntu awu ndundu wa mashinyi anyi nì ncinyi ciine aci. Anyi mene piikalà cibucilu cya ekeleeziya cikèpèpè, kadi kasumbu kàngatè dipangadika dya ne yòyi eyi. . . Kabivwa bikengela bwa mpaasata kwikalaye ne cya dyenza mu cyôci aci to, balami bôbô—bôbô mbàdì ne cya kwenza cyôci aci, nwamonu's, anyi tusumbu atu. Nenu mpindyewu piikalà cyôci eci. . . Bôbô bapetangane ku mêyì, dîbà adi kufila bwalu abu kùdì mpaasata, mpaasata ngudi mufwanyine kusangishisha mulambu awu. Kadi, monaayi, piikalàbi ne mmwenyi, ùsanganyibwa mu bwalu bwa lukasalukasa, muntu kampanda ne dijinga dya ndambu mukese wa mfranga ne nwênù nuumvwa ne mbwà kabingila kajaalame, (mpindyewu edi ndyanyi pàanyi dimona's), cyôci ciikàle bwa kabingila kajaalame menemene ne nwênù bamanye ne mbwà kabingila kajaalame. . .

⁹⁹ Mpindyewu, dyambedi, nwênù bayè kuntu kwaka bakatape dîsù mu mikanda yanyi kumbelu, ya bantu bàdì balwaku bàmba ne: “Ndi Révérend *Kampanda* wa mu ekeleeziya *kansanga* ewu, ne ndi—ndi mupete lutatu mu njila emu, ne ndiku—ndiku dijinga ne ndundu ya mashinyi yinaayi ya mwomumwe,” ne mêmè mumanye ne ncivwa anu mfuminaku ku disangisha ne mvwa mupete mulambu kampanda, anyi cintu kampanda cikwabo cya mushindu awu, mvwa mmupeshawu, pamwe ne wónsò awu, bwa kuyaye kapeta ndundu ya mashinyi yinaayi ya mwomumwe. Kadi dya ndwa kutapa dîsù mu bîmvwà mufunde anyi, kacya kakùvwakù mwambi wa nanku awu to, wa ukààdikù musòmbèle mu mwaba bu nanku. Kadi kùdì ndola binunu dikumi anyi makumi abidi pa mikanda ayi ya bidimu bìdì panshi ebi yínkaadi mupeeshangane mushindu awu, ncìyikù mumanye kantu nansha kamwe kàà ne bôbô biine abu bàvwa penyì to. Mêmè kulwa kujandula, bakwabo bambi bàmba ne: “Mona's, yèyè awu's mundye búngì *kampanda* ne búngì *kansanga*.”

¹⁰⁰ Mpindyewu, ekeleeziya ùdì wàmbula bujitu, anu bwa bende yèyè. Ncya bushuwa. Bende yèyè, ki bàdìbo bambwila bujitu.

¹⁰¹ Kadi kwòkò kùmwèka ne kùdì kabingila kàà mushinga, ne dîbà adi nwênù, kùdì, nwênù balubuludi bafwanyine kwamba ne: “Ee, mpindyewu anji indilaayi kakese. Muntu ewu, *nyèyè* wawa, kashinyi kende nkòkò kàka mwaba wawa, eci eci, ncyenzeke cya bushuwa, ne *cikampanda*. Kì ngwa mu disangisha dyetu to, nwamonu's, kadi ncyenzeke.” Dîbà adi bôbô baswe kucyenza mushindu awu, ne bafwanyine kwamba cintu kampanda cya pabwàcì bwa muntu wa pambelu. . .

¹⁰² Kadi, bwa beetu twètù to, nwamonu's, bwa bantu beetu twètù to, bwa beetu twètù bìdì bikengela kusangisha anu kaaba aka mene munkaci mwa bààbò—bààbò bôbô, bànà bààbò kaaba aka, nwamonu's.

103 Kadi yêyè mwikàle muntu kampanda wa pambelu, ne muntu kampanda wàmba ne ùdi ne nzala anyi . . . ne muntu kampanda muswe kwela cyanza mu mpaaya bwa kumupeeshaku kàà pa luse, aci's ncikutangile, kadi mémè ndi ngamba bwa cidì cifùminà kùdi ekeleeziya. Ne pashiishe beena mu ekeleeziya bôbò *balòmbùbwe* bwa kupeeshangana kantu, dîbà adi . . .

104 Mpindyewu, nwênù bapete mutangadiki, mu bushuwa bwa bwalu, mwikàle ùyiisha mwab'ewu, dîbà adi kaayi nudi nwangata . . . nwênù . . . aci ncyà dyumvwangana kumpala kwa kulwaye, nudi bamanye's, bwa ne nenumupeshe mulambu kampanda, anyi nenumufute difutu kampanda, anyi cyònsò cyaswaye kwenza aci.

105 Kadi dîbà adi pìikalàbi ne muntu ewu ùdi kaaba aka, ne ciikàle bwa kabingila kajaalame, ne mpaasata . . . ne kasumbu kaswe bwa kupetangana ku mèyi ne kwambila mpaasata bwalu abu, dîbà adi mpaasata àmbè ne: "Muntu *kampanda* mmusòmbe kaaba aka, katwena bamanye muntu awu to, mmubwele ne mutulombe . . . ùdi wàmba mùdi bânà bende ne nzala. Katwena ne dîbà . . . katwena bapete dîbà dya kulondolola cidìye—cidìye—cidìye—cidìye wàmba aci to." Nwamonu anyi?

106 Kwòkò cintu cya mushindu awu, dîbà adi wetù—wetù . . . Kwòkò cintu kanà cyònsò munkaci mwa beetu twètù, balami beetu—beetu twètù nebaye kalondolola bìdiye mwambe abi. Nwamonu anyi? Ne pashiishe cyòci cya mushinga, dîbà adi nùcyènààyi. Cyòci kaciya cya mushinga to, kanùcyènji to, kabyena bikengela bwa nwênù kucyenza to. Kadi mpindyewu yêyè mwikàle muntu mwab'ewu, nushiile—nushiile mpaasata yêyè àmbè ne: "Mpindyewu, kasumbu kàà balubuludi nkangambile ne kí mbamanye muntu ewu to. Kadi muntu awu mmusòmbe kaaba aka, ùdi wàmba ne dyende n'Jim Jones," anyi nî ncinyi cyònsò cidì cifwanyine kwikalaku aci, "ne nyêyè ewu musòmbe kaaba aka mene. Udikù mwa kujuukila kuulu anyi, Mukalenge Jones? Mpindyewu, Mukalenge Jones, kundekeelu kwa disangisha, wimanyine anu ku ciibi cya kumfundu cyacya, paùkaadi upàtuka bwa kuya apu. Nenku bantu kampanda bôbò bumvwe mu myoyi yabo, anyi nî ncinyi cyònsò cinùdiku baswe kwenzela muntu ewu aci, numupeeshaayici panùdi nwenda nupatuka apu." Bwa aci nanku, ncyumvwike mpindyewu anyi?

107 Nudi bakwate aci pa bisanji byenu abi anyi? Bwa aba bàdi bateeleja mukaba wa mèyi . . . Ne umwe wa ku . . . Mwaneetu Collins mmucipangile pa mukaba wende wa mèyi. Ndi muswe bwa kwambulula dîyi dyamba adi pìikalàbi ne . . . bwalu yêyè ngumwe wa ku balami.

108 Kwòkò—kwòkò muntu kampanda wa ku, muntu ùbwela unùdi . . . kadi mwikàle mu bwalu bwa lukasalukasa ne ùjinga mulambu wa kùdi ekeleeziya, balubuludi anyi balami bàdisangishè, nenku . . . bàdisangishè, ne bàngatè dipangadika

edi, ne pashiishe bàmbilè mpaasata ne mbifwanyine kwenjiibwa mushindu *kampanda*. Bôbò abu. . . Mpaasata àmbè, ne: “Muntu *kampanda* ewu,” amuteele mu dîná, “katwena bamumanye to. Kadi wetù ngenzeli kaaba aka wùtu ngwa kulondolola kumpala kwa kusangishila bantu milambu, ne, aci mbwena kwamba ne, bwa beetu twètù. Kadi ewu muntu yèyè, nyewu wàmba ne mmupeteke ne lutatu, mupete bwalu bwa lukasalukasa, ùdi ne bânà bàsaama, yèyè, ùdi ùkèba bwa kupetelaku bânà bende manga,” anyi nî ncifwanyine kwikala cinganyi, bwalu bwa lukasalukasa abu. “Mpindyewu, nyewu mwimane kaaba aka mene. Udikù mwa kujuukila kuulu anyi, mukalenge?” Nwamonu’s, nenku ajuukile kuulu. Nenku àmbè ne: “Mpindyewu nwènù nudi bamone cidì. . . ne yèyè ùdi nganyi. Mpindyewu, kundekeelu kwa disangisha edi muntu ewu neikalè mwimanyine lwà ku ciibi cya kumpala cyacya, nenku bantu mu dipatuka amu, wèwè udyùmvwa ne udi muswe kufilaku dyambulwisha mu bwalu ebu, udi mudishikamine; twètù tudi anu bamanyishe cyanàànà bwalu abu mu ekeleeziya.” Wèwè kwèna munkaci mwa kubwanyisha to, udi wèwè anu ubumanyisha cyanàànà. Nwamonu’s, ki dyakidila dya mwenyi ndyôdi adi. Nwamonu anyi? Bwa mpindyewu nuumvu anyi? Eyo.

¹⁰⁹ Ngeela meeji ne aci ncikose bwalu bwa lukonko alu.

230. Kadi bishi bwa mikaba ya mèyi? Mpindyewu. **Bu mùdì. . . Kadi bishi bwa mikaba ya mèyi?** Lùdi ne cikonkelu. **Bu mùdibi ne, bààbùngì bàdì bàfùndìla bìrò mikanda bakudyula wèwè bwa dipangadika dya bìdì bitàngilà mikaba ya mèyi. Kabidi, bwa bakwabo bàdì mu nyungulukilu wa ekeleeziya bàdì bàsùmbisha mikaba ya mèyi, pìikalàbi ne bìdì bikengela bwa Mukalenge Maguire kwikalaye yèyè ufuta lubèleesà lwa bwena cintu pa yôyi.**

¹¹⁰ Eyo. Mikaba ya mèyi yìdi nku mukanda wa dyumvwangana. Ne pìikalàbi ne mèmè. . . Ncyèna mumanye anu bìmpè menemene ne mukanda wa dyumvwangana awu mmujikile matuku dîbà kaayi to, kadi balubuludi, ebu mbwalu bwa balubuludi; kî mbwà balami to, mbwà balubuludi; kî mbwà mpaasata to, mbwà balubuludi. Balubuludi, ku musangu ne ku musangu, bôbò—bôbò mbàtù bafunda mukanda wa dyumvwangana awu, mùndì mucyùmvwè. Kadi pìikalàbi ne kî—kî mmwòmò to, dîbà adi balubuludi bàlongololè. Balubuludi aba mbenze mukanda wa dyumvwangana ne muntu udi ukwata mikaba ya mèyi, ne mikaba ya mèyi ayi yìdi nku dyanyishila.

¹¹¹ Muntu mukwabo nansha umwe kèna mwa kwenza mikaba ya mèyi to amba anu bamwanyishile kùdì muntu udi ne dyanyishila awu, ne kayeenaku mwa kusùmbishiibwa to amba anu byanyishiibwe kùdì muntu udi ne dyanyishila awu, bwalu aci ki mukenji wa ditunga, nwamonu’s, bwa ne dyanyishila ndidì dicilame. Nwamonu anyi? Nenku pìikalà dyanyishil- . . . ewu udi mulame dyanyishila awu yèyè muswe kulekela *Kampanda* wèza

mikaba ya mèyi, aci ncimutangile yèyè. Yèyè muswe kulekela bantu bônso bènza mikaba ya mèyi, aci ncimutangile yèyè; yèyè muswe bwa bantu bônso kwikalabo bàpàanyisha mikaba ya mèyi, aci ncitangile muntu udi mulame dyanyishila awu. Bivwa bikengela bwa yèyè kwikalaku ne—ne kabeji kakese kafunda katwà cyâlà kùdi muntu udi mulame dyanyishila awu, bwa kwikalaye wènza mikaba ya mèyi ne ùyìpàanyisha, bwalu dîbà adi yèyè mmubinge kumpala kwa mukenji wa ditunga. Bwalu yèyè kâyi mwenze nanku to, muntu awu, udi ne dyanyishila pa cyôci aci awu. . . Bu mùdi mwambule bujitu, wèwè mwine awu, bwa. . . (Bu ne kùvwa muntu wa—wa munwine kutubuke uvwa muswe kukeba katamba kâà kwapuka naaku, yèyè's ùvwa anu mufwanyine kucyenza cya bushuwa.) bwa wèwè kusambuka dyanyishila adi, bwalu aci cidi anu bu bukenji bwa bwena-cintu, nudi numona's, cintu anu cyôci cimwecimwe aci. Kwèna mwanishiibwe bwa kucyenza to; ncibawu cinènè bu wèwè mwa kwenza nanku.

112 Pa nanku pìikalàbi ne bantu bàdi bènza mikaba ya mèyi, pàmwàpa mbapete dyumvwangana dya kùdi Mukalenge Maguire ùdi—ùdi ne. . . ùdi—ùdi wàngata lubèlesà lwa bwena cintu pa mikaba yà mèyi. Nenku mpindyewu. . . ne mèmè ncyèna mumanye pa bìdi bitàngilà aci to, bwalu ncitu ntamba kwikala neenu kaaba aka bwa kumanya mùdi biine bintu ebi ne nganyi udici cifwanyine kwamba to. Ndi ncinka ne Mukalenge Maguire ngucidi naadi, bwalu kwaka naka, ntu mu Californie anyi mu Arizona, mùndi nsanganyiibwa amu, ntu ngumvwa ne bàcitu anu bàsùmba mikaba ya mèyi ya mu Californie. Mwaneetu Sothmann, tatwèndè—mwenu wa Mukalenge Maguire, yèyè udi mmwaneetu mu ekeleeziya emu awu. Ngeela meeji ne Mukalenge Maguire ngucidi naadi, diine—diine dyanyishila adi pa yòyi ayi.

113 Nenku mpindyewu, nkwenzeke madyabakeenyi anu kwine kwônso aku pa bìdi bitàngilà mushindu wùdi mikaba ya mèyi myenjiibwe. Mpindyewu, pàdiku didyabakeena pa cintu kanà cyônso cidi citangile mpetu mu ekeleeziya ewu, ndibanza dyela balubuludi bwa kwenzabo bwa ne cintu aci ncitookeshiibwe bilenga. Nwamonu anyi? Kabivwa bikengela, nansha bya munyi, bwa kwikalaku bwalu nansha bumwe to.

Mpindyewu nudi numona apa, mbambe pa kabeji aka, ne:

Bàdi bàfùndila bìrô mikanda bakudyula wèwè.

114 Bwa kwamba menemene, mèmè ndi mupete mikanda bùngi cyanàànà mimfundila pa bwalu abu, ne mbaswe kumanya bwa cinyi kabeena bapeta mikaba yabo ya mèyi. Mpindyewu nwènù's mbàdi bamanye mukanda wenu wa dyumvwangana ne ewu udi ne dyanyishila, mùndi muumvwe. . . Mikaba ya mèyi, mèmè—mèmè ncyèna muswe kwikala ne cya dyenzamu to, mèmè mwine, pìikalà muntu ukwata mudimu ne mukaba wa mèyi bwa ditancisha dya Evanjeeliyo, "Amen!"

115 Kadi, dyambedi, Mwaneetu Roberson ne bakwabo mbàvwà babange kuyenza, Mwaneetu Beeler ne bààbùngì bàà kùdìbo bààkabanga kuyenza; ki pashiishe nsongàalùmè yibidi ayi, Mwaneetu Mercier ne Mwaneetu Goad, mbayènzè munda mwa bidimu; nenku, mu bushuwa bwa bwalu, pàdì yònsò wa ku biine bantu abu muyènzè, nkupatuke madyabakeenyi pa yònsò wa kùdìbo. Kadi, anu abidi àdì mashààle aa mwab'ewu, mbyenze anu bu ne nkwenzeke didyabakeena dinene bwa dibenga kupeta dya mikaba yabo ya mèyi. Bantu mbambiikile ku telefone eku ne eku kwa ditunga. Ne pashiishe mukwabo, mwikàle ne, mikaba ya mèyi myenzulula yikalà mwa kupatula cintu kampanda munda mwa kasunsa kamwe, kadi dya bawela kasunsa kakwabo, ùpàtula cintu cya cyanàànà, ne pashiishe kabàciyi mwa kumvwa mene ne mbinganyi biine abi to.

116 Mpindyewu, bantu bàdì bàfila mfranga bwa mikaba ya mèyi eyi abu's bìvwa bikengela kupetabo mukaba wa mèyi mushuwashuwale. Cidìbo benza bwa kuyipeta nansha ciikàle cinganyi, tudì baswe kumona baakidiyà beetu ne bàna beetu (bwalu's mbaakidiyà beetu ne bàna beetu, ne bikwabo), bàdì ne cya kupeta mukaba wa mèyi "Wa kapelu." Mpindyewu, nwènù balubuludi ìkalà nutangilaayi bwalu abu, bwa ne bantu aba bìikalè basànkishiiabwe. Bòbò kabàyi basànkishiiabwe to, bàdì ne cya kubàalujila mfranga yabo dyakamwe.

117 Ne muntu kampanda mmumbiikile ku telefone, wàmba ne mmwindile mikaba ya mèyi ngondo ne ngondo. Mpindyewu, ncyèna mumanye ne Mwaneetu Maguire ùdì utangila bwalu ebu bishi to. Mèmè—mèmè ncyèna mumanye ne bìdì bishi to, bu mùndì nciyi mumanye kantu nansha kamwe pa bwalu abu. Nenku ndi. . . Kì ncintangile mèmè bwa kumanya cintu nansha cimwe pa bwalu abu to, ncimutangile yèyè ne bòbò ne balubuludi. Nenku mèmè ncyèna nteeta bwa kwelamu mukolo to, kadi ndi anu nzwambila cidì mukenji wa ditunga bwa cyòci aci. Nwamonu anyi? Mukenji wa ditunga bwa cyòci aci wùdì wàmba ne mikaba ya mèyi eyi, kwangacila anu dībà didìbo bayilombesha adi, mikaba ya mèyi ayi yìdì ne cya kwikala mu njila mu dituku dimwe, anyi matuku asatu, anyi anaayi, anyi ataanu; paanyima pàà bamane kulombesha mikaba ya mèyi ayi, bìdì bikengela bwa kwikalayi mimana keela ku poste anyi dyanyishila ndifwanyine kunyengiibwa dībà kanà dyònsò pàdì mèyi matuma aa kabàyi baàtùmikile. Nwamonu anyi?

118 Mpindyewu, munda mwa ngondo yisambombo yònsò anyi cidimu cyònsò, bìdì bikengela bwa cyòci eci kucyenzululabo, bìdì bikengela bwa dyumvwangana edi kudyenzululabo. Nudi ne cya kutwilangana mu matuku a ngondo bungi *kampanda* àdì dyanyishila dyàmba ne bìdì bikengela bwa nwènù kutwilangana awu. Ne dībà adi bìdì ne cya kwenzeka ne, aci, bakwabo bantu bàdì ne cya kubwela pa dībà adi, ne nwènù nudi ne cya kufunda bwa kumanyisha bakwabo bàtù bèela nkonko pa bìdì bitàngilà

mikaba ya mëyi abu, bwa kulwabo ne dyumvwangana dyabo ne kusombabò bwa kuyiikilangana pa bwalu abu.

¹¹⁹ Mpindyewu, mëyi matuma aa àdi ne cya kuteekiibwa mu cyenzi! Nwamonu anyi? Ne àdi ne cya kuteekiibwa mu cyenzi mu mushindu mujaalame, bwalu's nyawu kùkaadi madyabakeenyi. Bòbò nyawu mbadyábàkèène bwa Leo ne Gene, badyábàkèène bwa muntu ne muntu, s'ndidyabakeena bwa Mwaneetu Maguire adi, ne bòbò's nebadyábàkèène bwa muntu mukwabo yònsò, kadi twànji tujandulàayi ne didyabakeena diine edi didi bishi.

¹²⁰ Mpindyewu, kadi mikaba ya mëyi pàkaadiyi yibanga kuungwila mishiki, misheete mijima, mikanda mitufundila makumi ne makumi yiloka bu mvula, ne bòbò. . .Nwamonu's, bwalu abu kabwena bupona pambidi pàà mwenji wa mikaba ya mëyi to, bùdi bupona pambidi pàanyi mêmè. Bàdi misangu yònsò bantandisha mêmè bwa bwalu abu. Mpindyewu, mmudimu wanyi mêmè bu mwena Kilisto bwa kutabaleela bwa bantu kupetabo cìdibo bàfidila mfranga aci, ne ndi muswe bwa nwènù balubuludi nwènzè bwa bàcipetè. Byòbì bikengela bwa kutwabo mushinga mubànde, petàayi mukaba wa mëyi mutàmbe bwìmpè, petàayi cisanji cya dikwata naaci mëyi citàmbe bwìmpè, tudi baswe bwa muntu udi wenza mukaba wa mëyi awu àwènzè mu mushindu mujaalame. Ki cyetu cidi citusankisha ncyòci aci. Mukaba wa mëyi wùdi ne cya kwenjiibwa mu mushindu mujaalame! Ne kidiyá ùdi ne cya kusankishiibwa, anyi nudi nwimanyika byònsò biine bya dyenza dya mikaba ya mëyi abi, katwakwikala ne mikaba ya mëyi to, nulekele anu muntu kanà yònsò udi muswe awu àyènzè. Kadi piikalàbi ne nebayitwile mushinga, bàtabaleelè aci bwa bàpetè cìdibo bafidile mfranga, bwalu ki bwena Kilisto mbwòbù abu. Kì mbipite bya kwenza. . .

¹²¹ Nenukù pàdibo balwa mwab'ewu bwa kuteejeja Evanjeeliyo, ndi muswe kubapeesha cidi citambe bwìmpè cìndiku pàanyi mumanye mwa kubapeesha aci, nwamonu's, ne pàdibo balwa mwab'ewu ndi muswe bwa nwènù kwenza ne bantu bònsò ne bintu byònsò bitungunukè ne kwenzeka. Ki bwa cinyi ndi nnwambila nwènù balami, balubuludi, ne bampaasata, mwaba ewu diloolo edi ne, nudi ne cya kuteeka cyòci eci mu cyenzi ku dileeta ne ku dileeta, bwalu bantu bàlwalwa kaaba aka mbwa kupeta Nzambi, nenukù bìdi bikengela bwa twètù kwikala ne bintu ebi mu bulongame.

¹²² Ne mikaba ya mëyi kabidi yidì ne cya kuteekiibwa mu mwaba wùdi wukengediibwa. Byòbì bikengela bwa kutwabo mushinga mubànde, mikaba ya mëyi yidìbò bakwata naayi mudimu nì nya mishàadile, dìbà adi kebaayi mikaba ya mëyi yidì mitambe bwìmpè. Byòbì bikengela bwa kuyitwilabo mushinga mukole, nuyitwilaayi mushinga mukole, cibi muntu apete cidi cikumbanangane ne mushinga wùdibo batwe awu.

¹²³ Mémè ncyèna njinga lubèleesà lwa bwena cintu to nansha kakese, dyeyà nansha dimwe, nansha tabernacle pende kèna ùlùjinga to; ncyèna muswe bwa nwènù kwikala nanku to. Kanwikadi nujinga aci to, kùdì—kùdì lubèleesà lwa bwena cintu. Bu bôbò mwa kulufucila, ndi ngeela meeji ne bivwa bikengela bwa nwènù kufucisha kakese bwa lubèleesà lwa bwena cintu bu mùdici cyenjiibwa kaaba aka. Ndi ngeela meeji ne ncintu kampanda cìdìbo bambe, Mukalenge Miller, ne bakwabo, pa bidì bitangila mukenji wa ditunga, wutùvwà bapete wa ne, kufucishaku kantu kampanda kàà lubèleesà lwa bwena cintu anyi bikwabo. Aci ncinutangile nwènù bônsò bwa nwatabaleelaayi bwalu abu. Mémè to, ncyèna ne cya dyenza nansha cimwe mu—mu cìdì cilongolola aci to; nùtabaleelàayi nwènù bônsò bwalu abu. Mémè ncyèna mwa kucitabaleela cyònsò to, ndi mémè nkwambila anu mushindu wùvwàbi bikengela bwa kwikalaci ne wùdici ne cya kulombodiibwa. Aci. . . Nudi bumvwe, ngàm̀bì ne “cìdì ne cya kulombodiibwa.” Pa nanku tudi baswe bwa cyôcì eci kulombodiibwaci mu mushindu mujaalame.

¹²⁴ Nenku pùikalàbi bikengela bwa kwikalabo ne cisanji cya citambe bwìmpè bwa kuyikwata, dìbà adi petàayi cisanji cya citambe bwìmpè. Pùikalàbi bikengela bwa cyôcì kwikala. . . Mpindyewu, ntu mubàmbile, ntu mwambe ne: “Disangisha dyòns-. . . lwendu lwònsò lùndi ngenza pàndì nya mu budimi bwa bwambi, kumpala kwa mémè kuya, nènnumanyishe ne mmayiisha kampanda àngìikalà mwa kayiisha kuntwaku, cintu kampanda cínkaadi mumane. . .” Ne ntu munulaye bònsò, cya bwalu nèngìikalè mwa kucishintulula kabidi mu dyalumingu diloolo, ne: “Kumpala kwa mémè kuyiisha diyiisha dipyadipyà kanà dyònsò, dìvwa mwa kufumina ku tabernacle eku dyambedi, bwalu mbimweneke ne bôbò mbàdì bapeta nkwacilu mulenga wa mikaba ya mèyì.” Nudi bavuluke aci anyi? Dìbà adi ndi ndwa mwab’ewu, nyiisha mayiisha àànyì, pashiishe mpatuka nya ne mmanyisha muntu udi ukwata mikaba ya mèyì awu ne mmasangisha kampanda. Yèyè ùkonka ne: “Ngèpì awu? Cìwikalà mwa kuyiisha ncinyi?” Mémè kumwambila ne: “*Edi* diloolo nènyiiishè *cikampanda*, *edi* diloolo, *cikansanga*,” pa nanku bàdì mwa kwikala naayi mimana kukwata ne milongolola bwa kidiyà kuyipeta anu mwaba awu; mwikàle anu naayi, mukaba wa mèyì wa mwìmpè kutamba wùdìbo bapeta mu disangisha dya pàntù mpatuka, bwalu mbawènzèle apa mene ku tabernacle eku kùdì bipàtudi bya mèyì biikàle bìmpè. Nwamonu anyi?

¹²⁵ Kadi, mpindyewu pàndì nya mu butangadiki bunene ebu apa, cìngìikalà mwa kwenza mpindyewu dyamwamwa dya mbù dyadya ne bikwabo, ncyèna mwa kulaya aci to, nudi numona’s, ncyèna mwa kulaya ne nènyiiishè diyiisha dyanyi dya kumpala mwaba ewu nansha. Bwalu paudì uyiisha eku

ne eku apu, mayiisha awu, bìdi bikengela wikalè ne cintu kampanda cidi. . . Cidi cishààla cisaapuluke kúdi, ne neciikalè mwa kushààla cisaapuluke bwa aba bàdi baciteeleja. Bikengela wènzèku cintu kampanda cya cishiilangane, nudi numona's, ne kutwala Mukenji anu mùdiwu ùkuvwila *kuntwaku*. Kadi bàteekè cisanji cya dikwata naaci mikaba ya mèyi mu budimi bwa bwambi amu, anyi cyònsò cidiku aci, cyàkwatà mikaba ya mèyi eyi mu mushindu mupwàngane.

¹²⁶ Nenku nwènzààyi mukaba wa mèyi mupwangane, ne mukaba wa mèyi wònsò nwànji kuwela ne kuwukontonona kumpala kwa kuyawu, anyi nwimanyikaayi byònsò abi; kanwikadi mene ne cya dyanzamu nansha cimwe to, nulekele muntu ne muntu ùdyènzela yèyè mwine mukaba wende wa mèyi. Nwamonu anyi? Kadi nùbyènzàayi mu mushindu mujaalame, nwamonu's, bwa didyabakeena edi dyamonaku mwa kujika. Katwena baswe madyabakeenyi to nansha kakese. Pàdiku didyabakeena, tütangilàayi bwalu bwàdi, dîbà adi tudi tudijikija.

¹²⁷ Mpindyewu, nèndwìjakajè ne mwanyi mwònsò. Billy ùcìdi ne nkonko mikwabo bu yibidi nanku awu mwab'ewu, anyi yisatu, pashiishe netujikije.

231. Ntoo ne penyi, Mwaneetu Branham, pàdi mulami mwa kuya anyi pàvwàbi bikengela kuyaye bwa kulama bulongame mu ekeleeziya? Bìwva bikengela bwa twètù kulama bulongame anyi kwindila too ne pààtwàmbilà Mwaneetu Neville cidi cikèngelà bwa twètù kwenza?

¹²⁸ Awu kî mmudimu wa Mwaneetu Neville to, awu mmudimu wenu nwènù. Nwamonu anyi? Nwènù kanùtu nwambila Mwaneetu Neville cya kuyiishaye, mushindu wa kuciyiisha to. Nwamonu's, awu mudimu ngwenu, nwènù balami, nwènù mbàdi ne cya kwenza aci. Tangilaayi nwènù bwalu abu. Aci kî ncitangile Mwaneetu Neville mu kantu nansha kamwe to, awu mudimu's ngwenu nwènù. Nwamonu anyi?

¹²⁹ Mpindyewu, mpulushi yèyè ùsanganyibwa pambelu apa mu mùsèèsù ne ùmòna muntu wìba bintu bya bende paanyima pàà kashinyi, bìwva bikengela bwa kubiikilaye mulombodi wa cimenga anyi, wàmba ne: "Mpindyewu, Mulombodi wa cimenga, Wa kuneemekii bwa, mukalenge, mèmè ewu's ndi munkaci mwa kunukwacila mudimu muneemu emu mu bumpulushi; mpindyewu, nyewu ndi musangane muntu kumutu kwa mùsèèsù eku, ùdi—ùvwa munkaci mwa kwiba ndundu ya mashinyi mu kashinyi kampanda makeelela diloolo awu; mpindyewu, ndi anu ndikonka's, dyebe peebe dimona pa bwalu abu dìdi bishi?" Huh! Nwamonu anyi? Nwamonu's, aci kî ncifwanyineku kwikala cya meeji to, mmwòmò anyi? To, mukalenge. Pìikalàbi ne yèyè ùvwa wènza cintu kampanda cya cibi, mukwate's.

¹³⁰ Nenku muntu yêyè wènza cintu kampanda cya cibi mu ekeleeziya emu, anyi ní nganyi ní nganyi, ùmwimànyikè, ùyiikilè nende. Kwikadi ne dyambu to; kadi yêyè kàyi muswe kuteeleja to, akula mu mushindu wa yêyè kumanya ne cyùdì wamba ncikampanda. Nwamonu anyi? Nwamonu's, byenze bu mùdì mwa kwambila mwànà mutekete, wamba ne: "Alukila kuntwaku," kadi yêyè ùdìtwala bibi. Nwènù balami, shààlaayi pa kaaba keenu! Teekaayi. . . Nudi banaayi, shààlaayi babidi lwà kumpala ne babidi lwà mundekeelu, mu matumba emu anyi mwaba kampanda wa mushindu awu. Ne nwikalàayi nutangila ne ntema yònsò, bwalu bantu bapidye diitabuuja ne bikwabo byònsò bàtu babwela anu mushindu ewu, nudi numona's. Nenku nwikalàayi batalame, nuyaayi ku kaaba keenu kàà mudimu ne nùshaalàayiku, ki keenu kaaba kàà kusòmba nkòkò aku; anyi nùshaalàayi biimane pabwìpì ne cimanu menemene biikàle nujooja bantu bònsò bàdì bàbwelà.

¹³¹ Mulami ùdì ùkùba nzubu wa Nzambi. Muntu kampanda yêyè mubwele, yikila nende; ikalà mwaba awu bwa kumwelaku mwoyi, kumulabula ku cianza. Mbwená kwamba ne, wêwè udi mpulushi: "Tudikù mwa kukuleeja cibambalu cya dikùdikila bizaku anyi?" anyi ne: "Udi mwa kusòmbelaku panshi anyi?" "Tudikù mwa kukupeesha mukanda wa misambu anyi cintu kampanda anyi?" anyi ne: "Mpindyewu tudi baswe bwa mwaba ewu wukusankisheku, ne—ne usambile, nenku—nenku tudi ne disanka bwa mùdìku neetu mwab'ewu diloolo edi." Umulombole buludi too ne ku mwaba kampanda, wambè ne: "Udi muswe bwa wikadile pabwìpì menemene anyi udi muswe bwa wikadile lwà paanyima apa?" anyi mu mwaba mukwabo kanà wònsò. Ki dyakidila dya beenyi ndyòdì adi.

¹³² Mpulushi (anyi mulami) udi mbumpulushi bwa basalaayi mu cilwilu, nsòmbelu wa bukalanga, kadi pende mwikàle ne dīyì dya bukookeshi. Nwamonu anyi? Nudi bamanye cidì mpulushi wa basalaayi, mu bushuwa bwa bwalu, yêyè uteeka mu cyenzi makenji ende, ngeela meeji ne yêyè ùdì anu bu mùdì muyiishi wa basalaayi. Nudi numona anyi? Nnsòmbelu wa bukalanga ne bikwabo byònsò, kadi pende's ne dīyì dya bukookeshi. Nwamonu's, nudi ne cya kumutumikila. Nwamonu's, yêyè ùdì uteeka. . . Baadiikidì aba bàdì bàpàtuka kwaka bàkakwàcika maala, mona's, yêyè's ùdì ubateeka pa kaaba kààbò. Ki mùdìbì kabidì bikengela bwa mulami kubateekaye pa kaaba kààbò.

¹³³ Mpindyewu, vùlukàayi ne, mulami mmpulushi, ne mudimu wa mulami mu bushuwa bwa bwalu ngùdì wa dīsù dyumisha kutamba mudimu kanà wònsò mu ekeleeziya. Mèmè ncitukù mumanye mudimu wa dīsù dyumisha kutamba mudimu wa mulami nansha. Ncya bushuwa's, bwalu yêyè ùdì ne—ùdì ne mudimu wa bushuwa, ne yêyè mmulume wa Nzambi. Yêyè mmulume wa Nzambi menemene anu mùdì mpaasata

mwikàle mulume wa Nzambi amu. Cya bushuwa, ncidiye. Yèyè mmusadidi wa Nzambi.

¹³⁴ Mpindyewu balubuludi, cintu cimwepele, mbapete kùdì Nzambi mudimu wa kutangila mpetu ne kutabaleela cyòci aci, bintu bidì byènzekà mushindu awu abi. Ndi munwàmbile bwa mikaba ya mèyi ayi, ne—ne bwa bikwabo bintu mwaba ewu bidì byènzekà, bwa citanda ne midimu ya dicilongolola, ne kusangisha kwa mpetu ne bikwabo, aci—aci ncidìbo biikàdile balubuludi: bintu byetu, mpetu ne bikwabo. Balami kabeena ne cya dyenza mu abi nanku to. Ne ki mùdìbi kabidi ne—ne mulubuludi kèna ne cya dyenza mu mudimu wa balami nansha.

¹³⁵ Mpindyewu, balami bôbò baswe kulomba dikwacisha dya balubuludi pa cintu kanà cyònsò, anyi—anyi balubuludi balomba dikwacisha dya balami, nenku nwènù bònsò nudi nukwata mudimu pamwe. . . Kadi ki midimu yenu nyôyi ayi, midisungulujè. Nwamonu anyi? Eyo.

¹³⁶ Mpindyewu, to, kanulumbu Mwaneetu Neville to. Mwaneetu Neville yèyè munulombe bwa kwenza cintu kampanda, dîbà adi awu's—awu's mmpaasata wenu, ne nsòmbelu wa bukalinga ne dinanga ne bikwabo byònsò. . . Bu yèyè mwa kwamba ne: “Mwaneetu Collins, Mwaneetu Hickerson, Mwaneetu Tony, anyi muntu *kampanda*, ùdikù mwa kumona ne ncinyi cidì kaciyi cyenda bilenga paanyima pààpa mu ditumba mwamwa anyi?” Ku mwaba wa mudimu bu nanku, nudi bamanye's, bu mulume wa Nzambi wa bushuwa.

¹³⁷ Vùlukàayi ne, unùdì nukwacila mudimu kî m'Branham Tabernacle, anyi kî m'Mwaneetu Neville anyi mèmè unùdì nukwacila mudimu nansha, unùdì nukwacila mudimu n'Yesu Kilisto. Nwamonu anyi? Nudi. . . Ki Yèyè udi ukengela bwa nwènù. . . Ne Yèyè—Yèyè ùdi uneemeka lulamatu lwenu alu mushindu anu wumwewumwe wùdì Ye uneemeka lwa mpaasata wawa anyi nî ndwà nganyi mukwabo kanà yònsò, Yèyè mmwindile lulamatu lwenu alu! Nenku tudi baswe kuleeja lulamatu lwetu.

¹³⁸ Mpindyewu, mîngà misangu bitu bilwa bikole boo. Mbinkolele mèmè bwa kumona mwambi kampanda musòmbè mwaba awu ùndì munange ne mwoyi wanyi wònsò, bwa bulelela bikengela mèmè mmwambile; nwamonu's, kadi mu mushindu kampanda wa dinanga, ndi mèmè ne cyanza cyolola bwa kumwambulwisha. Kadi, nwamonu's, bôbò bàtu bàlwa kùndì bàmba ne: “Mwaneetu Branham, wèwè udi muntu mulenga be, bwa cinyi kuyi mwa kudyaku cibanga kakese pa dibatiiza adi, ne pa *cikampanda*, *cikansanga*, ne *cikankenga*, ne dikubiibwa adi, ne dimiinu dya nyoka?”

¹³⁹ Mèmè ndi ngamba ne: “Mwaneetu, ndi mukunange, kadi mpindyewu twànjiku kwangat-. . . twangatebi anu Mifundu bwa

tumone ne udi mubinge nganyi anyi udi mupiile nganyi.” Nwamonu’s, bìdi bikengela ngiikalè mukumbane bwa . . .

¹⁴⁰ “Kaa, mpindyewu, Mwaneetu Branham, ndi nkwabwila ne, wêwè ngudi mupiile mu byònsò.” Nwamonu’s, ùbìnduluka.

¹⁴¹ “Kaa,” ndi ngamba ne, “ee, pàmwápa ní ndi mupiile’s. Dìbà adi, piikalàbi ne ndi mupiile, ncyá bushuwa ne (nenku wêwè ungambile, bu mùdì . . . udi mumanye ne mpa mwaba kampanda pàndì mupiile), dìbà adi ndeejààku wêwè ne mpa mwaba kampanda pàndì mupiile.” Nenukù mêmè ndi muswe kuciitaba, nwamonu’s.

¹⁴² Ncintu cimwecimwe aci ne: “Ê, kî mbwalu bwebè bwa kwambwila mwànà awu bwa kusòmbayè to.” Mpindyewu, mulami ngudi—ngudi mukubi ku nzubu wa Nzambi. Nwamonu anyi? Mpindyewu bu wêwè mwa . . . Yèyè ùdi ùkùba nzubu wa Nzambi nè ùmulama mu bulongame. Aci ncidi Mufundu wamba, kadi wêwè ne cikwabo cintu cìvwà cikèngelà bwa mulami kwenzaye, ulwe ungambile. Nwamonu’s, kùdi cintu cimwecimwe aci, kadi aci—aci’s mmudimu wenu bwa kwenza cyòci aci, eyowa, anu bwa kutwa nyama ku mikolo.

¹⁴³ Nenukù kabivwa bikengela bwa nwênù kukonka muntu nansha umwe to, awu’s—awu’s mmudimu anu wenu nwênù. Mwaneetu Neville kèna ukonka muntu nansha umwe to, kabyena bikengela bwa ekeleeziya kukonkaye . . . Ndi njinga kwamba ne, kabyena bikengela bwa—bwa—bwa balubuludi kuyabo kakonka Mwaneetu Neville nî—nî mmuswe bwa kwelabo musaka ku tabernacle to. Nwamonu anyi? To, to, aci kaciyena ne cintu nansha cimwe cya citangila Mwaneetu Neville to, kaciyena ne cintu nansha cimwe cya cintangila mêmè to, aci ncinutangile nwênù. Kabyena bikengela bwa balami . . .

¹⁴⁴ Mbya mwomumwe kabidi ne mpaasata. “Newikalè mwa kuyiisha pa cinyi? Mêmè ncyèna muswe bwa wêwè kwenza *cikampanda* to.” Abu kî mbwalu bwabo bôbò bwa kwambabo nanku to, yèyè ùdi mwinshi mwa bukookeshi bwa Nzambi, nwamonu’s, mpaasata wabo awu. Nenukù dìbà adi bu ne—bu ne—bu ne . . . Mwaneetu Neville, yèyè ùdi ùyiisha diyiisha didì Nzambi mutupeeshe, ne twètù bònsò pamwe tudi mu cyòci eci. Ne mêmè mwambwile Mwaneetu Neville cintu kampanda cya cibi, Nzambi ùdi ùngoomekela bujitu bwàci. Ncyá bushuwa. Nwamonu anyi? Pa nanku Nzambi ngudi Mfumu waci cyònsò. Nwamonu anyi? Nenukù twètù tudi tukwata mudimu anu bu milòpò Yende, nudi numona’s, panwapa mu midimu eyi.

232. Bu wêwè mwa kuswa umvwij- . . .

Lukonko lùdi lùlondà, ne pashiishe ndi ngeela meeji ne tudi ne lukwabo kabidi, ne pashiishe netwi—netwimanyiike.

Bu wêwè mwa kuswa umvwijàku menemene mùdibi bikèngela bwa mapà a dyakula dya mu myakulu kwikalawu àkwàta mudimu mu ekeleeziya wetu. Aci

nkàadi mucyūmvwije. **Ndibà kaayi didi ekeleeziya mwa kuteekiibwa mu bulongame pàdi . . . anyi mmwaba kaayi menemene wùdibi bikengela bwa mapà kwikalawu akwacila mudimu?** Aci twafumu ku dicyumvwija.

- 233. Anu ne mbûngì kaayi bwa m-a-l-e-d-i-i-b-w-a . . .** Udikù mwa kumona ne ncinyi aci anyi? [Mwaneetu Billy Paul ùdi wàmba ne: **“Byombelu.”**—Muf.] Kaa. **Byombelu. Mbyombelu bûngì kaayi bìdì bikengela bwa twètù kwikala naabi mu ekeleeziya pa kuumusha cisanji cya orgue ne cya pyànô?**

¹⁴⁵ Ee, mbilondeshile kunùdi panwikalà ne cisumbu cya bimbi bàà ne byombelu bya nshinga anyi cyònsò cinwikalà naaci aci, nudi numona’s. Ncyêna mumanye ne cinùdi naaci ncinyi to, cidi eci cyumvwija, ncyêna ncyumvwa to. Kadi cisanji cya orgue ne cya pyànô aci mbintu bya bende bya ekeleeziya. Mpindyewu, bu mulombodi wa misambu mwa kupeta meeji a kwikala ne mpungi ne mpandalala ne bikwabo bya mushindu awu, kadi bantu balwe mu ekeleeziya ne bimba ne biine byombelu ebi . . . Ne biikàle mu cisumbu kampanda cya bimbi, ne—ne pashiishe, mu bushuwa bwa bwalu, dîbà adi aci ncyà balubuludi beenu, bwa kucitangila pamwe ne balubuludi bwa kumona ní bàdi ne mfranga bwa kusùmbabò byombelu byabo abi ne bikwabo, anyi ní ncinyi cyònsò cya mushindu awu. Ngeela meeji ne ki cidi lukonko lwabo.

¹⁴⁶ Kadi bôbò biikàle ne byombelu byabo bôbò, mbilenga be. Bôbò kabàyi ne byombelu byabo bôbò to, kadi biikàle bidimba bya cisumbu cya misambu mwab’ewu, kàyi anu muntu wa ùbwela mwab’ewu ne wimbakù anu kasangu kamwe nanku, ùpàtuka lubilu nyèyè uyààya wawa mushindu awu to, bivwa bikengela kwikalaci cisumbu cya bimbi bàà misambu mu ekeleeziya. Ekeleeziya kî mmufwanyine kusùmba mpungi bwa—bwa—bwa muntu udi umwimba kaaba aka bwa mààlabà diloolo ùtùpuka ùkaadi mungà mwaba, ne mungà mwaba, cibi mwikàle ùlwa ku misangu wimbakù ndambu to. To, mukalenge. Bìdi bikengela cìikalè cisumbu cya bimbi bàà misambu cya kaaba aka mene, cisumbu cya bimbi bàà misambu cilongolola cìikalè ne—ne mulombodi, ne dîbà adi ekeleeziya, kuyiikila naabo pa bìdi bitàngilà kusùmba kwa byombelu.

- 234. Bu wèwè mwa kuswa umvwijaku bimpè mùdibi bikengela bwa twètù ku- . . . mushindu kaayi wutùdiku twètù balami mwa kulama cisàmbà anu mu mwaba wa cijila emu kumpala anyi paanyima pàà . . . Bu wèwè mwa kuswa umvwijaku.** [Mwaneetu Billy Paul ùdi ùbala lukonko alu: **“Balami bàdi balama cisàmbà mu cinyàànyà mushindu kaayi mu mwaba wa cijila ewu kumpala ne paanyima pàà ekeleeziya?”**—Muf.] Kaa. Eyo.

147 Ndi mufwanyineku kwanji kwamba nenku, bânà beetu. Mpindyewu, aci ncintu cinene. Mvw'a kujinga bwa twikalaku ne dîbà dyàbûngì dya kupicishilapu, bwalu cìdi—cìdi . . . cìdi—cìdi ne mushinga wàbûngì kutùdì, nwamonu's. Mpindyewu, ekeleeziya kèna . . .

148 Nwênù baswe bwa . . . Nwênù baswe bwa kwendesha mukaba wa mèyi ewu diloolo kampanda bwa kuwèla kumpala kwa masangisha, bwa bantu kuwumvwabo, nùwèlààyi wòwò ewu; anu katupa kàà mukaba wa mèyi aka kadi kanùyì nupicisha to, anu aka nkààyaakù. Katupa kanà kònsò kàà wòwò ewu kanùdì baswe kwela bwa cintu kampanda, nutungunuka anu ne kuwendesha too ne panùdì nukacipeta, nenku pashiishe nùwèlààyi. Nwamonu's, bwalu nnkonko.

149 Mpindyewu, balami bàà ekeleeziya, ne bu—bu mûngãmbi, bòbò mbampulushi bàà ekeleeziya. Kadi ekeleeziya kí nnzubu wa dilwa kutwilangana bwa maalu ônsò naka bwa—bwa bwobumwe ne bulunda ne disàngala dya kanùyì nucyuka maalu to. Ekeleeziya mmwaba wa cijila wa Nzambi! Tudi tulwa mwaba ewu . . . Mpindyewu, patwikalà baswe bwa kutwilangana muntu ne mukwende, lekela ndwile kwebe kumbelu, wèwè ulwile kwanyi kumbelu, anyi nuyaaayi kumbelu kwa muntu ne mukwende ne nukatwilanganaayi muntu ne mukwende. Kadi bya kulwa kusangeela mu ekeleeziya bya kanùyì nucyuka maalu abi, ne miyiiki ne bintu bya mushindu awu, kí mbîmpè to, bânà beetu; patùdì tulwa mwab'ewu, tudi tuumusha cintu cyònsò nkòong mu meeji etu. Patwikalà baswe kulwa mwab'ewu . . .

150 Tàngilààyi numone mushindu wutùvwà ne ciibidilu cya kubyenza kùkaadi bidimu. Mwaneetu wa bakaji Gertie nguvwa mwimbi wa cisanji cya pyànò. Pâncìvwà mêmè mpaasata kaaba aka, byàkakèngela bwa mêmè—mêmè kwikala mpaasata, mulami, mulubuludi, bikwabo byònsò musangu wumwe, nwamonu's, kadi bìvwa bikengela mêmè—mêmè kucyenza. Bwa mpindyewu kaayi kabicyena bikengela bwa nwênù kucyenza mushindu awu to, nwamonu's, bwalu nukààdi ne bantu bwa kubyenza. Kadi pàdì . . . Mvwa ne baawisiyè, Mwaneetu Seward ne bònsò abu ku ciibi. Bàvwa ne mikanda myungwija mishiki lwà mwaba wawa, ku ciibi aku, miteeka pa nkwasu, anyi cintu kampanda cikwabo. Nenku pàvwà anu muntu ùvwà, bàvwa bamuleeja mwaba wa kukùdikayè cizaku cyende anyi bamwambulwisha bwa kuya pa kaaba kàà kusòmbayè, bamupeesha mukanda wa misambu ne bamulomba bwa “kwikalaye mu disambila.” Nenku dîbà adi muntu yònsò ùvwà ùsòmba mu nkwasu wende ne ùsambidila mundamunda too ne pa dîbà dya kubanga. Nwamonu anyi? Nenku pashiishe pa dîbà dya kubanga, Mwaneetu wa bakaji Gertie, mwimbi wa cisanji cya pyànò awu, ùvwà ùjuuka mwaba awu ne ùbanga mujiki kumpala kwa . . . pàvwà bantu benda—benda badisangisha apu.

151 Ndi mufwanyineku kwanji kwamba bwa nwênù kwambila mwimbi wenu wa cisanji cya orgue bwa kubàndayè kuntwaku ne kwimbaye mujiki wa mulenga menemene awu. Yèyè kàyi mwa kwikalapu to, nwikalè bakwate mujiki awu pa mukaba wa mèyi ne pashiishe nùwèlè mu cisanji, anyi cintu kampanda cikwabo. Nenku nwèlè mujiki, mujiki munsantu menemene wènda wimba ne kalolo kònsò. Pa nanku. . . Ne kulomba bantu. . . Kadi bantu bôbò baditwe mu miyiiki ne mu dyenza dya bintu bya lukutukutu mushindu awu, umwe wa ku balami ajuuke aye ku cikolokolo ku cyambilu kwaka àmbè ne, “sh, sh, sh,” mushindu awu. Àmbè ne: “Mu tabernacle emu, tudi—tudi baswe bwa nwikalè nulwa bwa kukuukwila. Mpindyewu katwenjiku mutooyi to, teejejaayi mujiki awu. Nda pa nkwaswa webe, sòmbelà panshi, ikàlà mu kaneemu, wamonu’s, ikàlà usambila anyi ubala Bible. Apa, mu mwaba wa cijila ewu, ki mùdi Mukalenge musòmbèle. Nenku tudi baswe bwa bantu bônso bìikalè mu kaneemu kàà menemene ne mu dikuukwila, kabiyi bya kwikala kunyeemakana eku ne eku, bya diyiikilangana kumpala kwa masangisha abi to. Ikalaayi badikungwije, ne nudi nulwa mwab’ewu bwa kuyiikila ne Mukalenge. Nwamonu anyi? Anyi udi mu disambila dya usambidila mundamunda, wamonu’s, anyi udi ubala Bible webe.”

152 Pàngààkabwelà mu Ekeleeziya wa Marble kwaka ku. . . mwa Norman Vincent Peale mwamwa, nukàadi bumvwe bàmba bwa bwalu bwende, nudi numona’s. Nenku mèmè kubwela mu. . . Mumanyi mupiluke, wa maalù a nsòmbelu, nudi bamanye’s. Nenku mèmè kubwela mu ekeleeziya wende awu, ki mèmè kudyambidila anu mwômò amu, ne: “Mvw’a kujingaku bwa wanyi tabernacle kwenzaye cyakabidi nanku.” Balami abu bàdi bàkiimana buludi ku ciibi aku panùdi anu ne nwàbwedi. Bôbò, mu bushuwa bwa bwalu, bàdi bàkwambika dibèji dya bya mu kalaasa kàà Dyalumingu mu cyanza, ne bàya neebe buludi bàkakusòmbesha panshi. Bivwa bikengela bwa yèyè kumùshiya munda mutupu misangu yisatu, nudi bamanye’s, mùvwa mukumbana anu bantu bàmba kutwa ku nkama yinaayi anyi nkama yitaanu, nudi bamanye’s; ne New York pende ùtu mwaba munene, ne yèyè wa bwalu muntu mumanyike. Ne ndi ngeela meeji ne bìvwa bikengela bwa kwenzabo kalaasa kamwe pa dîbà dikumi jaajaaja ne kakwabo pa dîbà dikumi ne umwe, diyiiisha anu dimwedimwe adi badyambulula, disangisha anu dimwedimwe adi menemene, dibèji dimwedimwe adi. Kadi pàvwàbo bàtangalaka, bàvwa (ngeela meeji) ne tusunsa tutaanu bwa ekeleeziya kwikalaye menemene. . . Muntu mukwabo nansha umwe kàvwa mwa kubwelamu to pàvwàbo kabàyi banji kupatuka, dîbà adi balami bàvwa bàfila njila ne ekeleeziya mukwabo ùvwa ùpàtamù tente. Bàvwa ne bya disòmbela bya kale bya bisheetesheete ebi, nudi bamanye’s, babwelamu mushindu awu, ne bàvwa basòmba mu bibasa mùvwàbo bunzulula ciibi amu. Wa cyena kale, mmushààle

mwimane mwaba awu kacya—kacya kùkaadi bidimu nkama yibidi bulubulu, ngeela meeji, mwine Ekeleeziya wa kale wa Marble awu.

¹⁵³ Ne nuvwa mwa kuumvwa mùvwà mpengela wetu ewu ùmata panshi mwaba kanà wònsò mu ekeleeziya amu, ne bantu bònsò munkaci mwa kusambila munda mwa tusunsa twòtò tukese mmakumi asatu kumpala kwa kaacyona kamwepele kàà musambu kufidiibwaku ku cisanji cya orgue aku, kaamusambu kàà dibanga naaku aku. Nwamonu anyi? Nenku bantu bònsò anu munkaci mwa kusambila. Mémè kudyambidila ne: “Bilenga bya kacya’s!” Pashiishe pàvwà mwambi awu. . . Kaamusambu kàà dibanga naaku aku, kàà ne. . . Ngeela meeji ne bàvwa bimba kaamusambu kàà dibanga naaku kamwepele munda mwa tusunsa bu tusatu anyi tutaanu nanku awu ne: *Mùshindù Mwine Wùdì Wèwè Munène’s Wè*, anyi cintu kampanda cya mushindu awu, bitùngùnùke mushindu awu. Ne pashiishe pàvwàbo bàmana kwenza nanku, bantu bònsò bàvwa biimanyika kusambila, bàshààla batèèlèje kaamusambu kàà dibanga naaku aku. Nwamonu’s, ki cìvwà cìfila dishintuluka, bùùmuka ku disambila bàya ku kaamusambu kàà dibanga naaku aku. Nenku dîbà adi pàvwàbo bàkimba kòkò aku apu, pashiishe mulombodi wa korale ùvwa ulombola korale awu. Pashiishe bàvwa bimba musambu wa disangisha mu ciibùngì *pamwe ne* korale. Ne pashiishe bàvwa bàshaala badilongòlòle bwa kalaasa kààbò kàà Dyalumingu. Nwamonu anyi? Ne pashiishe—ne pashiishe pàvwàku kùjika, kakùvwa cintu nansha cimwe cìvwà cyènzekà to pa kuumusha dikuukwila dya Nzambi, dîbà dyònsò adi, ne cyòci aci ki citùvwà bayiilemu.

¹⁵⁴ Nenku ndi ngeela meeji ne mbifwanyineku kwikala cintu cìmpè bu ekeleeziya wetu ewu. . . Kadi mémè ngudi wamba pàànyì anu nunku ewu ne, twètù, tukàadi, ki citwènzà twètù. Nwamonu anyi? Tùcyènzàayi. Muntu yèyè wènza cintu kampanda, ne wamba, ne: “Ndi ngeela meeji ne ncifwanyine kwikala cintu cìmpè.” Cyòci ciikàle cintu cìmpè, dîbà adi tùcyènzàayi. Nwamonu anyi? Katwena baswe kulààdikija cintu cìmpè kanà cyònsò eci to, netùcyènzè, nansha bya munyi. Nwamonu anyi? Nenku ndàayi anu kumpala ne—ne imanyinaayipu ne—ne bu bòbò mwa kubanga mu dinda kampanda, anyi cintu kampanda cya mushindu awu, bantu biikàle bayiikilangana, muntu kampanda alwe anu cyanàànà, anyi umwe wa ku—umwe wa ku balami, anyi muntu kampanda aseemene mwaba awu àmbè ne: “Nkwediibwe mukandu mu tabernacle emu. . .”

¹⁵⁵ Ncyèna mumanye ní bàdi bàcyènza’s; bàdi mwa—mwa kwikala bacyenza. Mémè ncitukù mwaba ewu to, nudi numona’s, ncyèna mumanye to. Kacya ncitukù mémè mwaba ewu kumpala kwa masangisha to.

¹⁵⁶ Nenku pàdìbo bàbwela bàbanga miyiiki, muntu kampanda abande kwaka àmbè ne: “Sh, sh, sh, indilaayi kakese.” Nwamonu anyi? Kwikalè—kwikalè. . . Nwangate mwaneetu wa bakaji mutekete, numutume kuntwaku ne numwambile bwa kwimbaye mujiki awu. Kanùyi benze nanku to, nuwukwate pa mukaba wa mèyi nùwèlèmu, nwamonu’s, wa ku cisanji cya orgue awu. Nenku nwàmbè ne: “Mpindyewu tudi. . . Kùdi mukandu mupyamupya mu tabernacle. Pàdi bantu babwela muneemu emu, katwena ne cya kunungana, anyi kuyiikila to, anu kukuukwila. Nwamonu anyi? Mpindyewu, anu mu tusunsa tukese emu disangisha nediikalè mwa kubanga. Patwamba kufika dîbà adi, udi anyi ubala anu Bible webe anyi mwinyike mutu usambidila mundamunda.” Nenku ndambu wa misangu mushindu awu, bônso nebayiile. Nwamonu anyi? Nwamonu anyi?

¹⁵⁷ Panùdi nuumvwa muntu kampanda uyiikila, dîbà adi aci’s cìdi cipweka bwa. . . paanyima pàà misangu mikese mushindu awu, paanyima pàà mutanci nudi nukafika mu mwaba wa ne muntu kampanda, twàmbè ne, numona muntu kampanda uyiikila, muntu mukwabo nansha umwe kàyi uyiikila to, nudi numona’s, ee, dîbà adi umwe wa ku balami aseemene mwaba awu àmbè ne: “Tudi—tudi baswe bwa wèwè kukuukwila mu cikondo cya disangisha.” Nudi numona anyi? Nwamonu anyi? Nwamonu’s, kî nnzubu wa dyoshila miyiiki to, nnzubu wa dikuukwila. Nudi bumvwe anyi?

Ngeela meeji ne cìvwa ncyôci aci. **Bu wèwè mwa kuswa umvwijaku. . . Eyowa. Twánjì tumonebi. Eyowa. Bu wèwè mwa kuswa umvwijaku mushindu wa. . . wùvwàbi bikengela bwa balami. . . mu mwaba wa cijila.** Eyowa, ki cyônso aci. Ncya bushuwa. Ncyôci aci.

Eyo, mpindyewu, lwa ndekeelu ndwòlò elu.

235. Mwaneetu Branham, patùtù bapete mpunga pa bìdì bìtàngilà ntwàdijilu wa disangisha. . . Ndi—ndi. . . didyabakeen-. . . To, . . . tudi bapete madyabakeenyi. . .

Mbafunde ne tuumaleeta tukese twa menemene. Ne **“bapete madyabakeenyi,”** kî mmwòmò anyi? [Mwaneetu Billy Paul ùdi wàmba ne: “Uh-huh,” ne ùtùnguka ne kwambulwisha Mwaneetu Branham bwa kubala bìdìbo bafunde mu tuumaleeta tukese atu—Muf.]

. . . **bapete madyabakeenyi ku ntwàdijilu kwa disangisha. Tudi ne. . . Twánjì tumonebi. Tudi—tudi—tudi ne misambu, majaadiki, ne masambila, ne malomba a masambila, misambu ya pabwàyi, ne p-à-. . . pàmwàpa byòbì abi biikàle byàngata. . . kubwela mu diyishi pa dîbà dikumi ne dimwe, bwa. . . anyi paanyima, kadi katùciyi tupeta dîbà bùngì bukumbane bwa Dìyi to. Bamwe bàà ku bantu badi bàpàngila lutuulu ne bikengela bwa. . . kuumukabo kumpala kwa dyòdi—dyòdi kwikala,**

kwikala . . . kumpala kwa—kumpala kwa kujikadi. Bidi . . . Bu wêwê mwa kuswa umvwijaku búngì bwa misambu, ne ndìbà kaayi dya kubanga diyiisha. Ne mîngà—mîngà misangu tutu ne disambila—malomba a masambila ne bikuupuka ku disangisha dya majaadiki, bintu kampanda bìdì—bìdì kabiyi . . . kabiyi bimweka bîmpè pa dîbà adi to.

¹⁵⁸ Mpindyewu, ndi ntekemena ne ndi muumvwe aci. Billy ngudikù uteeta bwa kungambulwisha kaaba aka. Bwa bàdì bàtèèleja mukaba wa mêmè, bìdì byenzeka ne nwênù . . . muntu kampanda mu disangisha, mu disangisha, munkaci mwa kuteeleja eci ne cìvwa ncinganyi, Billy ngudikù uteeta bwa kungambulwisha bwa kubibala awu bwalu mbifundiibwe ne tuumaleeta tukese, tukese twa menemene, ne mêmè ncìvwakù mufwanyine kutujandula to. Ngààpeci cingenyinyenyi cya byònsò abi, bìdì, ne: “Bìvwa bikengela bwa twikalè twimba misambu búngì kaayi kumpala kwa kubanga disangisha, ne disangisha diine bìvwa bikengela bwa kubangadi dîbà kaayi?”

¹⁵⁹ Mpindyewu, cintu cya kumpala cîndì muswe kwenza kaaba aka nditonda. Nenu pândi mupiile, ndi muswe kwitaba ne “Ndi mupiile.” Nwamonu anyi? Nenu ndi—nenu ndi—nêngènzè ditonda kaaba aka ne “mu mushindu kampanda mêmè ngudi mufikishe ku ciine aci.” Bwalu mêmè ngutu wenza miine masangisha a maleemale awu ne bikwabo, ki cìdì cilwe kubweja ekeleeziya mu ciine ciibidilu eci, nwamonu’s, cya dyenza nanku awu aci, kadi kabìvwa bikengela kwikalabi nanku to. Nenu mpindyewu, vùlukàayi ne, mêmè ntu ne . . . ndi . . . Mvwa nzwambila bònsò ne: “Mu dyalumingu diloolo, bu Mukalenge mwa kwanyisha, mu dyalumingu diloolo, ne, ndi nteeta bwa kukosa ntanta wa dinenga dya masangisha àànyì kubangila ku mpindyewu, pìikalàbi bikengela bwa ne nshaale lumingu lukwabo lwa pamutu, bwa ashaadila mu tusunsa tutwe ku makumi asatu anyi makumi anaayi bwa masangisha àànyì òwò mapitepite bule.”

¹⁶⁰ Bwalu ndi musangane ne, disangisha dîdì . . . Dyôdì diikàle dilongolola bîmpè, diyiisha dîdì difidiibwa mu bukole bwàdì; wêwê mutambe kuleepesha maalù, udi ucyokeshà bantu ne bôbò biine kabeenaku badyumvwa to. Cìdì cyenze ne mêmè mvwa mfila . . . Nkààvwa mumanye cyôci aci anu kwine kwònsò aku. Nwamonu anyi? Baakudi bàkaadì batambe kutuutatuuta dyakalenga ng’aba bàkaadì menemene . . . Yesu ùvwa Muntu wa tuumèyi tukese, tàngilàayi numone mayiisha Ende. Tàngilàayi numone mayiisha a Pòlò. Mu Dituku dya Mpenta, pàmwàpa byakamwangata tusunsa dikumi ne tutaanu, ne yêyè wàkatuuta ne bukole bwònsò . . . mwaba awu, cintu kampanda cyà—cyà—cyàkatumà misuuka binunu bisatu mu Bukalenge bwa Nzambi. Nwamonu’s, muye anu buludi ku bwalu. Nwamonu anyi?

¹⁶¹ Nenu mêmè—mêmè ngudi mupiile. Bwalu, cîndì mwenzele cyôci eci, kí mbwà ne bwalu ncìvwa mumanye cìvwa bwalu to,

kadi ndi munkaci mwa kwenza mikaba ya mëyi, nwamonu's, ne mikaba eyi neyeediibwe mu nzu bu munda mwa mëbà ne mëbà ne mëbà. Kadi anu munwàanganà, mu dyalumingu dilwalwà, cidi cyenzè ne ngiikalè mwenzè, nanku mu dyalumingu dilwalwà edi, cidi cyenze ne ngiikalè mwenze bintu ebi. . . ndi mufwanyine kubyamba anu patùdi twakulangana apa pa mukaba wa mëyi apa. Cidi cyenze ne ngiikalè mwenze cyôci eci mbwalu bwa bujitu bwa bunènaanènààlè bwa Mukenji wa dîbà edi bùdi pambidi pàanyi apa ebu, bwa kuWupatula. Mpindyewu ukàadi Mukenji mumane kupatuka ewu, mpindyewu nkàadi ngangata tusunsa makumi asatu anyi cintu kampanda cya mushindu awu, paanyima pàà dituku dya kumpala dya cidimu, mu masangisha àanyi a pambelu mu. . . myaba yònsò yinyaayà, ndi nteeta ne mene ndongolola ne dîbà dyanyi dya ku diboko pa tusunsa makumi asatu, anyi nciyi ntamba kupicishaku pa makumi anaayi to; kutuuta ne Mukenji ewu ne bukole bwònsò, ne kwenza dibiikila dya ku cyoshelu piikalàbi ne ndi. . . anyi cyònsò cîngiikalà mwa kwenza aci, anyi kubiikila mulongo wa babeedi; ne kubenga kwangata ntanta wa dîbà bule abu, bwalu ncyà bushuwa ne udi ucyokeshà bantu. Aci kaayi ndi mumanye.

¹⁶² Kadi tàngilàayi kuneeku. Ngeela meeji ne, mu cidimu cijimà, katwenaku bapete bantu dikumi ne babidi bàdi bajuuke bapatuke to, pààbi misangu mikwabo's ntu mbalama apa munda mwa mëbà abidi anyi asatu majima. Nwamonu anyi? Aci's ncyà bushuwa. Bwalu mbwà dyenza dya mikaba ya mëyi eyi yidi yiya pa buloba bujima, nwamonu's. Ne bantu bàà kuntwaku, bôbò nebashale basômbe mëbà ne mëbà bwa kuteeleja Cyôci aci; bambi, ne bikwabo, mu Allemagne, mu Suisse, mu Afrike, mu Asie, ne mu myaba yònsò, nwamonu's, munkaci mwa kuteeleja Cyôci aci.

¹⁶³ Kadi, nwamonu's, bwa mu mwaba wa cijila, bwa mu ekeleeziya. . . Nenu aci kaayi mbîmpè. Panwikalà kaaba aka nwenza mukaba wa mëyi, ne biikalè ne mukaba wa mëyi wa mëbà abidi, elàayipù diyishi dya mëbà abidi; kadi panwikalà kanüyi nwenza mukaba wa mëyi bwa cintu kampanda cya mushindu awu to, dîbà adi kôsolojàayi diyishi dyetu adi tutupa tutupa, nwamonu's, tukôsolojàayi dyetu diyishi adi. Ndi nnwambila bwa cinyi, kùdi aba bàtù buukuta anu bipeepele nunku, bakwabo bôbò batu buukuta anu pààdyàbo ntanta mule, nwamonu's, mushindu awu, nenu bikengela wèwè kwikalaku mwimanyine pankaci menemene.

¹⁶⁴ Nenu mpindyewu, misangu yàbûngi twètù tutu tunyangakaja masangisha etu mu dyenza dya disangisha dya majaadiki a muleebuleebu, ne ndi mumanye ne mèmè ngudi mupiile bwa dibyenza. Kadi nuwà nupatuka panùvwà ne ciibidilu cya kwenza masangisha a mu misèèsù, ne nulekela mwaneetu wa balume kampanda mukulakaji wimana pàapa, nenu yèyè neimane kwaka. . . Ne numulomba bwa kwambaye

mwaku wa disambila, kadi yêyè neàditwe mu disambidila mulombodi wa cimenga, ne bwa nguvena wa ditunga, ne bwa Mfumu wa Cisangilu, ne—ne bwa bantu bônso mushindu awu, ne bwa bampaasata bônso bàà mu nyungulukilu abu, nudi bamanye's, ubateela ku muntu ku muntu, ne bwa Mwaneetu wa bakaji Jones udi mu lupitaadi, ne bintu bya mushindu awu; ne bantu bàvwà biimane, bàvwà bendakana mu masangisha a mu mùsèèsù abu, bàvwà anu, bàvwà bôbò batungunuka—bàvwà bôbò batungunuka anu ne kwendakana. Nwamonu anyi? Yêyè ùvwa anu ubacyokesha cyanààna. Tudi anu, nansha nanku . . .

¹⁶⁵ Nwamonu's, cintu cya mushinga mpindyewu, bidi bikengela bwa disambila dyebe diikalè dya mu musokoko, disambila dyebe dya mushinga, dya dileedile adi. Sambilà . . . dijimà. Bwela mu kazùbù kàà cisokomenu, injila ciibi. Mwômò amu ki mùdì mùkèngelà wèwè kusambila dituku dijima, bufuku bujima, anyi mèbà abidi, usambidile mwômò amu. Kadi bwa muneemu, mùdì ne ntema ya bantu bônso mituma kùdì emu, ipìdijàku disambila dyebe, diikalè dya lukasalukasa, nda buludi ku bwalu. Enza bwa ne disangisha dyebe dijima . . . Nenku ela citupa cinene cya dîbà dya disangisha dyebe mu Dîyì adi. Ki cintu cya mushinga ncyôci aci! Tuuta ne bukole bwônso pa Dîyì adi ne mwebe mwônso, wamonu's, fikisha Dîyì kùdì bantu.

¹⁶⁶ Mpindyewu, cîndì nganji kwamba ncyôci eci. Mpindyewu, mpindyewu vùlukàayi ne, ngàatondù ne mèmè ngudi mupiile bwa dikafikisha ku cyôci eci. Kadi pashiishe ngânwambìdì ne mbwà cinyi ndi mucyènzèje, ndi ngenza mikaba ya mèyi ya mèbà abidi ya dituma dyamwamwa dya mbû ne ku myaba mikwabo yônso, ya Mukenji, nudi numona's. Kadi kabìvwa bikengela bwa ekeleeziya kutentulaye aci to (diyiisha dya mu tabernacle emu) biikàle nulonda mikaba ya mèyi (mèbà abidi) yidì ne cya kutumiibwa ku myaba kampanda ayi, nwamonu's, ne yipatuka mushindu awu.

¹⁶⁷ Mpindyewu, monaayi cìdì bulongame bwenu . . . Ngànji nnupeesheku anu cileejilu. Aci ncifwanyine kwikala cîmpè anyi, cîndì nganji kwamba aci? Ndi mufwanyine kwamba ne bìvwa bikengela bwa ekeleeziya kwikalaye ne biibi byende byunzulula pa dîbà kampanda, beena mu disangisha biikalè benda babwela, misambu yikalè yimbiibwa. Nenku bantu bônso babwele bwa kukuukwila, kî mbwa kuyiikilangana to. Ne kanubalekedi bwa kuyiikilanganabo paanyima to, nùbàmbilè bwa “Kutangalakabo ne kupatukilabo pambelu, kabàyi bayiikilangana to. Nwènù baswe kuyiikilangana, ki pambelu pônso mpôpò pààpa. Kadi ewu mmwaba wa cijila, wulamiibweku mukezuke.” Mpindyewu, piikalà Nyuma wa Mukalenge ukwata mudimu kaaba aka, tùcìlamàayi ciikàle Nyuma wa Mukalenge awu. Nwamonu anyi? Nenku—nenku Yêyè neatungunuke ne kukwata mudimu. Nwènù kanùyì nwenza nanku to, fundaaayi nulame, nebyupuke; ncyà bushuwa ne nebyupuke. Nenku tulamàayi bwalu abu, ki wetu

mudimu ngwôwò awu, ki bwa cinyi mêmè ndi kaaba aka diloolo edi. Lamàayi anu cintu eci cikumbanangane ne—ne mêyi matuma aa.

¹⁶⁸ Mpindyewu tàngilàayi, ndi mufwanyine kwamba nenku. Pa ciibidilu, amba anu twètù tufila dimanyisha dya pabwàdi. . . ne nubambila ne nenwikalè mwa kukwata diyiiisha kampanda pa mukaba wa mêyi. Nwamonu anyi? Mpindyewu, Mwaneetu Neville yêyè mwikalè ne diyiiisha mwaba ewu diikalàye mwa. . . yêyè ne diyiiisha didiye muswe bwa kupatula bwa bantu kupetabo, pa mukaba wa mêyi, anyi cintu kampanda, nwâmbè ne: “Mpindyewu, mu diloolo dya dyalumingu dilwalwà edi netwikalè mwa kukwata mukaba wa mêyi wa mèbà abidi,” mukaba wa mêyi wa mèbà asatu, anyi nî ngwà—nî ngwà bishi awu. “Netwikalè mwa kukwata mukaba wa mêyi wa mèbà abidi anyi asatu,” anyi cyônsò cidì cifwanyine kwikalaku aci, “mu diloolo dya dyalumingu dilwalwà edi.” Ne dîbà adi bantu mbamanye. Ne pashiishe pààlwàbo, wâmbè ne: “Mpindyewu, netwikalè mwa kukwata diyiiisha kampanda pa mukaba wa mêyi diloolo edi. Nenku ndi ne diyiiisha kaaba aka dîndî muswe bwa kukwaciibwadi pa mukaba wa mêyi bwa kudituminangana. Ndi. . . Ndi ndyumvwa mulombodiibwe bwa kutuminangana diyiiisha edi. Nenku nedîikalè mwa kukwaciibwa pa mukaba wa mêyi, didi mwa kwikala dya mèbà abidi, mèbà asatu, anyi cyônsò ciikalàku aci.” Nwâmbè nanku awu.

¹⁶⁹ Kadi, bu pa ciibidilu, anu mûntù mêmè ngenza pântù nya mu mwaba kampanda bu mùdì mu dimwe dya ku masangisha a Beena Kantu-ku-byanza awu, anyi pântù mpatuka nya mu masangisha àànyi mwamwa bwa mulongo wa babeedi. Bu mêmè mwa kwimana mwaba awu bwa kufila diyiiisha dya mèbà asatu diloolo kampanda kumpala kwa kwenza kwa mudimu wa dyondopa, nudi numona kùdîbi bikamfikisha aku anyi? Nwamonu anyi? Mona’s, bantu, diloolo dyàlondà disangisha dyebe didi dishààla cyabibidi cimwe cya mùvwàdi amu. Nwamonu anyi? Bwalu kabeena anu mwa kukumbanaku to, bidi bikengela bwa baye ku midimu ne bikwabo byônsò.

¹⁷⁰ Ndi mufwanyine kwanji kwamba nunku ne, pa ciibidilu. . . Mpindyewu, mvwa mutangile Mwaneetu Neville makeelela diloolo awu pàvwàye uyiisha. Mpindyewu, ndi mumanye ne twètù bônsò tudi bamanye ne civwa ndiyiiisha dya dipapulangana. Ndi mufunde tuntu pa bidiye mwambe abi, ndi naatu mu mpaaya mwanyi emu, bwa kukwataku naatu mudimu mu mayiisha makwabo àànyi mêmè mwine. Aci’s neya bushuwa. *Njila Wa Dipàndukila*, nwamonu’s, ne aci’s civwa diyiiisha dilenga dya dikema. Nuvwa bamone mùvwàye mudijikije ne lukasa lwônsò anyi? Nwamonu’s, mu tusunsa tutwe ku makumi asatu ne tutaanu, nwamonu’s, yêyè—yêyè mumbe mudijikije. Nwamonu anyi? Mpindyewu, aci’s civwa cilenga cya dikema. Mpindyewu, ne Mwaneetu Neville mwine,

pa ciibidilu ende mayiisha atu anu mushindu awu. Nwamonu's, kɪ mmalepa menemene to. Nwamonu anyi? Kadi mwaba wunùdì nukashebeela disangisha dyenu mpa bintu byònsò bya bileepakanangane bya kumpala kwa kufika ku bwalu abi. Nwamonu anyi?

¹⁷¹ Mpindyewu, ne—ne panùdì nwenza aci. . . Mpindyewu, ndi mumanye, kadi mpindyewu tàngilààyi, ncyèna—ncyèna ngamba nanku mu mushindu wa kufwishangana bundu to, kunùdì nwènù balubuludi, anyi balami, anyi—anyi mpaasata, kadi ndi anu nwwambila pàànyi cyanààna ne: nùmonààyi cìdì Bulelela, ne eci ki cìdici ne cya kwikala. Mpindyewu, nwènù. . . Cìdì cìcyèna ncinini? Mpindyewu, bantu bònsò, nwènù bònsò, bàà ngiikàdìlù mwîmpè, muntu ne muntu wa ku kunùdì nwènù balume bàdì ne ngiikàdìlù mwîmpè abu. Bu kabìyi nanku to, mwwa mufwanyine kwamba ne: “Bònsò pa kuumusha Mwaneetu *Kampanda*, yèyè kèna ne ngiikàdìlù mwîmpè to, tudi bònsò tumusambidila.” Kadi nudi—nudi bushuwa ne ngiikàdìlù mîmpè, kabidi nudi ne mwoyi mule, ne kalolo, bantu bàà mushindu wa batalale maalu. Abi mbilenga, kadi kwikadi cilùmaacikàjì bwa ciine aci to.

¹⁷² Yesu pende, ùvwa ne ngiikàdìlù mwîmpè, kadi pàvwà dîbà dîlwa dya kwamba maalu anyi: “Bààkafùnda ne: ‘Nzubu wa Taatù Wanyi mmwenza nzubu wa disambila,’ kadi nwènù nudi numuwija cisòmbedi cya bìvì.” Nwamonu anyi? Nwamonu's, Yèyè—Yèyè ùvwa mumanye dîbà dîvwà dîkèngelà kwakula ne dîvwà kadiyi dikengela kwakula to. Ki—ki—ki cìdì cìkèngelà bwa twètù kwenza ncyòci aci. Nwamonu anyi? Kakùvwakù, kacya kakùtukù kwanji kwikala muntu bu Yesu to, Yèyè ùvwa Nzambi. Ne vùlukààyi ne, Yèyè ùvwa mene. . . Nwènù bàdì bàmba bwa kwikala mulami mu ekeleeziya, Yèyè's—Yèyè's wàkangata bukookeshi! Wàkaluka bipya bya myonji, ne Yèyè kààkindila bwa kubapatula ne kalolo kònsò to, Wàkabàpàtula pambelu wènda ùbàtuuta, nwamonu's, bu mùvwabi ne mmu nzubu wa Nzambi. Nenku Yèyè ùvwa wàngata kaaba kàà mulami, bu cileejilu cyenu *nwènù* balami. Nwamonu's, Yèyè ùvwa Cileejilu cyenu. “Nenku mpindyewu, bààka—bààkafùnda ne: ‘Nzubu wa Taatù Wanyi mmwenza nzubu wa disambila.’” Mpindyewu, vùlukààyi ne, Yesu ùvwa Mulami dîbà adi, nudi bamanye aci, Yesu ùvwa wàngata kaaba kàà mulami.

¹⁷³ PààkafikàYe pa kaaba kàà mpaasata, cyakambaYe ncinini? “Nwènù Bafaalesa bafobo, balombodi bàà bampofu!” Nwamonu's, Yèyè ùvwa wàngata kaaba kàà mpaasata, dîbà adi.

¹⁷⁴ Kadi pààkabàmbilàYe bìvwà ne cya kwenzeka apu, Yèyè wàkangata kaaba kàà muprofeeta. Nwamonu anyi?

¹⁷⁵ Kadi pààkalòmbàbo bwa ne kùvwa ne cya kwikala difuta dya citàdì, Yèyè wàkangata kaaba kàà mulubuludi ne: “Peetelo, pwekàku ukeele ndobo mu musulu amu, ne mushipa wa kumpala wuwàtùpulà awu wùdì ne cinjanja cya mfranga mukana mwàwù

amu. Ufafute, wamonu's, ufute anu mabanza ebe àdì àkèngelà kufuta awu." KutwambilaYe twètù, ne: "Nupeeshe Kaayisà cidì cya Kaayisà, Nzambi cidì cya Nzambi."

¹⁷⁶ Yèyè ùvwa byònsò Mpaasata, Muprofeta, Mulubuludi, ne Mulami. NcìvwàYe cya bushuwa! Pa nanku nudi numona dîbà adì cyakenzaYe aci, cyôci aci ciikalè cileejilu cyenu mu nzubu emu mu Branham Tabernacle, utùdì baswe bwa ikalè nzubu kampanda mwikalàYe mwa kutwibwa mushinga mu kantu ne kantu kònsò, mu mudimu ne mudimu wònsò, mu kaaba ne kaaba kònsò, bwa kamwikadiku ditwa dya cimpingà nansha dikese to. Mwikalè kalolo, ne bupole, ne musangeelu, kadi biikàle anu buludi pa bwalu, muntu ne muntu pa kaaba kende kàà mudimu. Nwamonu anyi? Ki mushindu ngwòwò awu, ki mushindu ngwòwò awu wùdiYe muciswe. Kacya Yèyè kàvwaku ne ngaakwilù wa makayabwa to. Pàvwà dîbà dilwa dya kwakula, dya kubiikila *cikampanda* anu ne *ncikampanda*, mmùvwàYe ucibiikila. Pàvwà dîbà dilwa bwa kuleeja kalolo, dîbà adì Yèyè ùvwa uleeja kalolo. Yèyè ùvwa ne bupole, ne kalolo, ne luumvu; kadi ne dîsù dyumisha, ne kantu ne kantu kàvwa anu pa kaaba kààkù kùdiYe Yèyè, ne Yèyè wàkenza aci bu cileejilu cyenu. Mpindyewu, aci ki cidì Nyuma Mwimpè mufume ku dimpeesha. Pa nanku mèmè ncìvwaku mudyèlèlè meeji a cyôci aci to, bwa ne Yèyè ùvwa Mulami, kwònsò aku, kadi ki cìvwàYe. Nwamonu anyi? Yèyè—Yèyè wàkenza maalù bu mulami, dîbà adì.

¹⁷⁷ Mpindyewu, ndi mufwanyine kwamba nenku, kwamba ne piikalà masangisha enu abanga pa dîbà mwandamutekete ne tusunsa makumi asatu, piikalàbi ne ki dîbà ndyôdì adì, nùkangulàayi ekeleeziya wenu tusunsa makumi asatu kumpala kwa dîbà, pa dîbà mwandamutekete jaajaaja. Mwimbi wa cisanji cya pyànò yèyè. . . Nwambile mwimbi wa cisanji cya orgue. . . Nutu numufuta anyi? Nwènù nutu nufuta mwimbi wa cisanji cya orgue anyi? Batu bamufuta anyi, anyi mwimbi wa cisanji cya pyànò? Útu wimba bya kabàyi bamufuta anyi? Numulombaayi ne kalolo kònsò. Nansha yèyè muswe bwa kwikalabo bamufuta bwa cyôci aci, bwa kwikalabo bamupesha kantu kampanda bwa cyôci aci, mwambilaayi ne tudi baswe bwa yèyè kwikalapu tusunsa makumi asatu kumpala kwa disangisha. Kadi yèyè mwambe ne: "Ee, ncyèna ne mushindu wa kwikalapu to," anyi cintu kampanda, didyabakeena, dîbà adì numulombaayi anu cyanààna bwa alwe mwaba ewu bwa kwenzaye mukaba wa mèyi wa mujiki kampanda wa mutalale wa ku cisanji cya orgue. Nudi numona anyi? Nenku. . . nwèlàayi aci pa. . . Kabyena bikengela anu bwa kwikalaye pòpò dîbà dyònsò to, elàayi mukaba wenu wa mèyi awu. Nwamonu anyi? Umwe wa ku balami, mulubuludi, anyi nî nganyi yònsò udi unzulula ciibi awu, mulami wa ku ntempelu, àwèlè muntwamu, mwine mukaba wa mèyi awu, nenku wikalè wimba pàdì bantu benda balwa apu. Nwamonu anyi? Bwalu balami bóbò kabàyipù to, anyi

muntu kampanda, nenku, mulubuludi anyi muntu kampanda ikalèpu bwa kucyenza, dībà adi bàwèlè munda mwa tusunsa makumi asatu.

¹⁷⁸ Kadi anu pa dībà mwandamutekete ne tusunsa makumi asatu menemene apu, ngonga udi ku mùsongà wa citanda awu àdilé. Nwamonu anyi? Nucitu ne ngonga wenu awu kuntwaku anyi? Eyowa. Eyo, ngonga wenu awu àdilé pa dībà mwandamutekete ne tusunsa makumi asatu, nenku aci cidi cyumvwija ne katwena mwa kubànda kupweka mu ekeleeziya ne kulabulangana ku byanza ne ba-Jones ne bakwabo abu to. Mulombodi wa misambu abange mudimu wende! Kwòkò kakùyi mulombodi wa misambu to, balami bènzèku ne . . . anyi kùdì . . . bènzèku bwa kwikalè muntu kampanda bwa kubanga dilombola misambu pàdì ngonga awu ubanga kudila apu. “Buululaayi mu mukanda wenu wa misambu amu, nomba *kampanda*.” Nwamonu anyi? Cyènzekè anu pa—pa dībà mwandamutekete ne tusunsa makumi asatu menemene.

¹⁷⁹ Eyo, pashiishe nutume musambu wa disangisha mu ciibûngì, ne pashiishe pàmwäpa musambu mwibîdì wa disangisha mu ciibûngì, ne pashiishe kwambila muntu kampanda unukaavwa bamane kutwa munu, panwikalà mwa kwenza nanku, bwa alombole mu disambila. Mpaasata yêyè—yêyè, anyi, nansha mene . . . Ee, kabìvwa bikengela bwa mpaasata kwikalayepu to, bìvwa bikengela bwa mulombodi wa—wa misambu kwenzaye yêyè aci. M’Mwaneetu Capps, ngeela meeji. Nwamonu’s, yêyè ngudi mufwanyine kumanya cya dyenza, yêyè—yêyè ambile muntu ukaavwabo bamane kutwa munu awu . . . anyi mene alombole yêyè mwine mu disambila. Kwambila disangisha bwa kjuukilabo kuulu bwa disambila, nwamonu’s, kjuukila anu kuulu cyanàànà, nenku kwambila muntu kampanda bwa kulombolaye mu disambila. Mpindyewu, nwènù kanùyi batangile bilenga to . . .

¹⁸⁰ Mpindyewu, tudi twitabuuja ne bìvwa bikengela bwa muntu yònsò kulwaye ku nzubu wa Nzambi bwa kusambila, ki—ki mwaba wa kwikala kusambidila ngwòwò awu. Kadi panùdì mu mwaba wa cijila awu, ikalaayiku nulaminyina dībà dyenu. Nwamonu anyi? Paùdì ubabiikidila bònsò mu nyungulukilu wa cyoshelu amu, neujandule ne nekwikalè muntu kampanda washàalakù munda mwa tusunsa dikumi ne tutaanu, makumi abidi; dībà dyebe dyumba diya dyònsò.

¹⁸¹ Aci’s ki, nwamonu’s, disambila dyenu nkumbelu kwenu. Yesu mmwambe ne: “Paùdì usambila, kwikadi wimana mùtù beena lubombo benza amu to, ne—ne ntanta mule . . . benza disambila dileedile, bàmba *bikampanda*, *bikansanga*, anyi *bikankenga*, ne—ne byònsò bya mushindu awu bwa didileea.” Nwamonu anyi? Kwamba Ye ne: “Paùdì wèwè disambila . . . usambila, bwela mu kazùbù, kazùbù kàà cisokomenu, injila ciibi paanyima peebe; sambila Tatwèbè ùdì ùmòna mu musokoko awu, Yèyè

neakufute pa bùtòkà.” Mpindyewu, ki mushindu ngwòwò awu wa kwenza disambila dya mu musokoko, ki cyakambaYe bwa kwenza ncyôci aci.

¹⁸² Kadi panùdi nwènù, muntu kampanda, pàdìbo babwela, mulombodi wa misambu, àmbè ne: “Eyo . . .” Paanyima pàà musambu wa kumpala, dîbà adi muntu kampanda énzè disambila, nansha yèyè nganyi, kaadisambila kípì cyanàànà. Kwikadi wàjuuka kuulu kadi kubanga kusambidila banguvena bônso, ne bikwabo byônso mushindu awu to. Kwòkò kwikàle malomba kampanda a disambila, ikalè mamanyishiibwe, biikalè baatùme, bààfùndè. Bámbe ne: “Monaayi, bwa diloolo edi, mu kusambila, netùvulukàayi Mwaneetu wa bakaji *Kampanda*, Mwaneetu wa balume *Kansanga* mu lupitaadi, *Kampanda*, ne *Kansanga*, ne *Kankenga*. Nwabavulukaayiku mu masambila enu panùdi nusambila apu. Mwaneetu Jones, swaku utulomboleku mu disambila. Tùjuukilàayaaku kuulu.” Nwamonu anyi? Diteekiibwe pa cyambilu. Nùbàmbilè, biibidilanganè ne cyôci aci ne: “Wèwè ne dilomba dya disambila, lwà ùditèkè *apa*, *apa* nunku.” Kanwikadi nwamba ne: “Nganyi udi ne dilomba mpindyewu, swaku ùdìmanyishè mu . . .” Ne pashiishe, katanci aka anyi, muntu kampanda ùdi ùjuuka kuulu wàmba ne: “Butumbi kùdi Nzambi’s we!” Nudi bamanye’s, bibanga nanku awu, katanci aka anyi, misangu mikwabo bikaadi byangate tusunsa makumi asatu kumpala kwa kusòmbabò. Nwamonu anyi?

¹⁸³ Twètù tudi bambule bujitu bwa ekeleeziya ewu, kí mbwa mikwabo nansha; ebu mbwetu bujitu butùdi bambule kumpala kwa Nzambi. Midimu eyi mbwenu bujitu bunùdi bambule kumpala kwa Nzambi. Nwamonu anyi? Kabingila kàdi kenza ne ngámbe nunku mwaba ewu diloolo edi, pàndi nnwambila byônso ebi apa, mbwalu mbujitu bwanyi kumpala kwa Nzambi; mbujitu bwenu: Kubikumbajaayi. Nwamonu anyi?

¹⁸⁴ Mpindyewu, ne pàdi cintu bu nanku awu . . . muntu kampanda alombole mu disambila, ne pàdiye usambila apu, mbímpè be, alombole mu disambila, pashiishe nusombe.

¹⁸⁵ Kadi wèwè ne musambu wa pabwàwù . . . Mpindyewu, ncyèna mufwanyine kwamba eci to, ncyèna mufwanyine kuya mumwe ne . . . Kadi muntu yèyè ùjinga kwimba musambu wa pabwàwù, nucimanyishe mu ekeleeziya. Nùbàmbilè ne: “Misambu yônso ya pabwàyi, anyi cyônso cidì muntu muswe kwimba aci, amonangane ne mulombodi wa misambu kumpala mene kwa ekeleeziya kàyi mwanji kubanga to.” Nenku nùwàngàte . . . Nwámbe ne: “Ee, umfwileku luse, Mwaneetu wa balume, ndi muswe . . . ndi bushuwa muswe kucyenza, kadi ndi—nkàadi ne musambu wa pabwàwù diloolo edi. Pàmwàpa wèwè mwa kungambila ne newikalèku mwab’ewu diloolo kampanda, nèngwélè mu ndongamu bwebe wèwè. Wamonu’s, nkàadi ne ndongamu wanyi mumana kufunda mwaba ewu.”

¹⁸⁶ Mwaneetu Capps anyi nî—nî nganyi udi ulombola misambu awu. . . Nenku nwikalè ne mulombodi wa misambu, nansha yêye mwikàlè nganyi. Kadi kanumulekedi wimana kadi kwamba, anyi kubanga kuditwala byenze bu ne ùkaadi muyiishi to, nwamonu's. Imane anu mwaba awu alombole misambu, ki wèndè mudimu ngwòwò awu.

¹⁸⁷ Mudimu wa kuyiisha ngwà mpaasata, nwamonu's, kî ngwà kulombola misambu to. Kabyena bikengela bwa kulombolaye misambu to, mulombodi wa misambu ngudi ulombola misambu. Yêye mwambule bujitu, ne bìvwa bikengela bwa kupatukaye ne citaleela cyònsò mu dilaabiibwa dya Nyuma Mwîmpè, ùpâtuka mu birò mwamwa, mu mwaba kampanda, pàdi anu dîbà ne dyàkùmbanyi. Kabyena mene bikengela bwa yêye kwikala pa cibumba cya ku cyambilu, pàdi biine ebi munkaci mwa kwenzeka apu to. Yêye ashaale anu mu birò paanyima pàapa, nwamonu's, anyi paanyima lwà munda emu, anyi ní mpenyi pàdibi mwa kwikala apu, ndongolwelu wa maatelefone udi apa ewu neamubiikidishè, nwamonu's, pàdi dîbà dikumbana. Pàdiye ùmvwa musambu wa ndekeelu awu. . . pìikalàku musambu wa pabwàwù, bu mùdì musambu wa muntu wimba nkààyendè, wà babidi, anyi cintu kampanda, bwa musambu wenu mwisàtù. Nwamonu anyi?

¹⁸⁸ Apu nenwikalè bamane kwimba misambu yibidi ya disangisha mu ciibungì ayi, disambila, milambu yenu panwikalà mwa kuyisangisha. Nenku muntu ne muntu ikalè pa kaaba kende kàà mudimu. Nwàmbè ne: “Eyo, patùdi munkaci mwa kwimba musambu wa ndekeelu ewu apa, mpindyewu, bu baawisiyè mwa kuswa, balweku kumpala eku bwa milambu ya diloolo edi.” Nwamonu anyi? Nenku pàdibo munkaci mwa kujikija dimba dya musambu awu apu, ki baawisiyè bàkaadi biimane apa aba. Nwàmbè ne: “Eyo, mpindyewu netwikalè mwa kwenza disambila, ne mu kwenza kwa disambila amu, tudi baswe kuvulukaku *Kampanda* mwab'ewu, ne *Kansanga*,” nubala cyòci aci, nudi bamanye's, mushindu awu, mushindu awu. “Eyo, muntu yònsò ajuukile kuulu. Mwaneetu wa balume, udikù mwa kutulombola mu disambila anyi?” Pashiishe byònsò bijika.

¹⁸⁹ Dîbà adi pàdibo munkaci mwa kwimba musambu mwibìdì ewu apu, anyi wònsò wunùdì munkaci mwa kwimba awu, bìdi bikengela bwa nwènù, kumpala, kusangisha milambu yenu, panwikalà mwa kusangisha milambu yenu. Nùyìshìyaayi. . . Ndi mufwanyine mèmè kwangata musambu wenu wa kumpala awu, ne pashiishe kusangisha milambu yenu ya diloolo, ne pashiishe kutungunuka ne musambu wenu mwibìdì, ne pashiishe kutungunuka too ne ku ndekeelu kwàwù. Pashiishe musambu wenu wa ndekeelu ewu, musambu wenu wa ndekeelu ewu, nwamonu's, wikalè wà dibiikila naawu mpaasata. Nenku pàdi anu musambu wa ndekeelu awu wumana kwimbiibwa,

cisanji cyenu cya orgue aci cibangè ne kaamusambu keenu—keenu—keenu kàà dibanga naaku aku, mpaasata wenu ùmba ùpàtuka. Nwamonu's, maalu ônsò àdi mu bulongame. Bantu bônsò bàdi mu cinyàànyà. Kakücyèna kabidi cintu cya dyamba to. Mulami ne mulami yônsò ùdi pa kaaba kende kàà mudimu. Mpaasata ùdi wìmana mwaba awu.

¹⁹⁰ Ùdi ùpàtuka, ùsekelela bateeleji bende, ùbuulula Mukanda wende ne wàmba ne: “Diloolo edi, netubale mu Bible.” Nwamonu's, paanyima pàà yéyè mumane kucilongolola ne: “Netubale mu Bible.” Ne misangu mikwabo ncintu cìmpè bu wêwè mwa kwamba ne: “Bwa kuneemeka Díyì dya Nzambi, tujukilaayiku kuulu patùdi tubala Díyì apa.” Nwamonu's, pashiishe ubala ne: “Diloolo edi, nêmbalè mu Mukanda wa Misambu,” anyi cyônsò cìidiku aci. Anyi muntu wa cyanàànà acibale yéyè, mulombodi wa misambu, anyi mukwacishi, muntu kampanda unùdi nende mwaba awu, acibale yéyè, nansha ciikàle cinganyi; kadi mbitambe bwîmpè bu wêwè mwine mwa kudibadilaci, pawikalà ne mushindu. Dìbà adi ucibala mushindu awu, pashiishe wangata cyena-bwalu cyebe. Nwamonu anyi? Mu mutanci wônsò awu, ukàadi mwangate tusunsa tutwe ku makumi asatu, ne dîbà adi nukàadi bu pa dîbà mwandamukulu nanku awu.

¹⁹¹ Ne kuumukila ku dîbà mwandamukulu too ne ku dîbà diipacila ku tusunsa dikumi ne tutaanu kumpala kwa dîbà citeema, mwaba kampanda pankaci pàà tusunsa makumi asatu ne makumi anaayi ne tutaanu, wàdijè Díyì adi mwaba awu menemene anu mùdi Nyuma Mwîmpè ukupeeshaDi amu, wamonu's, anu mushindu awu, uDîteeka muntwamu anu mushindu wùdiYe wàmba bwa kucyenza awu, wamonu's, mu dilaabiibwa adi.

¹⁹² Pashiishe enza dibiikila dyebe dya ku cyoshelu, wámbe ne: “Kwôkò muntu kampanda kaaba aka mu ekeleeziya emu muswe bwa kwitaba Kilisto bu Musungidi, tudi tukulomba, tukubiikila bwa kulwa ku cyoshelu anu patùdi twakulangana apa, juukila wêwè anu kuulu cyanàànà.” Nwamonu anyi?

¹⁹³ Kadi muntu nansha umwe yéyè—yéyè kàyi mujuuke to, wámbe ne: “Kùdikù muntu kampanda kaaba aka mwikàle mudilongolole bwa dibatiiza, mwikàle mumane kunyingalala, ne muswe bwa kubatiijiibwaye mu màyi bwa dilekelediibwa dya mpekaatu anyi? Yéyè ùjinga kulwa, nyewu tukupeesha mpunga awu mpindyewu. Udikù mwa kulwa pàcìdi cisanji cya orgue munkaci mwa kwimba apa anyi?” Nudi numona anyi?

¹⁹⁴ Muntu nansha umwe yéyè kàyi mulwe to, dîbà adi amba ne: “Kùdikù muntu kampanda kaaba aka udi muswe...utu kàyikù mwanji kupeta dibatiiza dya Nyuma Mwîmpè kadi muswe bwa kwenza nanku diloolo edi, muswe bwa twètù kumusambidila anyi?” Ee, pàmwàpa muntu kampanda ùdi

ulwa, dîbà adi bantu babidi anyi basatu bàmutentèkèlè byanza, bàmusambidilè. Umutumè buludi mu cimwe cya ku bibambalu bìdì paanyima pààpa byabya, muntu kampana mwikàle nende muntwamu, ùmuleeja njila wa mwa kuya kafika too ne ku dibatiiza dya Nyuma Mwîmpè. Beena mu disangisha bônso bàdi basanganyiibwa kule naabo.

¹⁹⁵ Muntu kampana yêyè mulwe bwa kwikala . . . muswe bwa kwitaba Kilisto ne mwimane ku cyoshelu aku bwa bôbò kumusambidila, enza . . . asambile. Ne pàdiye usambila apu, amba anu ne: “Inyikaayi mitu yenu mpindyewu, tudi baswe kusambila.” Nenku amba ne: “Udi witabuuja anyi?”

¹⁹⁶ Kantu nansha kakese kàà bishi kôkò kafwanyine kujanguluja disangisha mu mushindu kanà wônso, umutumè buludi mu cibambalu cya masambila, nenku wêwè ubwelemu nende, anyi umutumemu ne muntu. Kadi disangisha ditungunuke dyôdi, wamonu’s, mushindu awu, dîbà adi kwêna mubalame pa kaaba nansha kamwe to. Nwamonu anyi?

¹⁹⁷ Nenku pashiishe pàcìdì . . . kumpala kwa . . . Mu—mu ndambu wa . . . dîbà adi bôbò, wâmbè, muntu nansha umwe yêyè kâyi mulwe to, dîbà adi wâmbè ne: “Nkufwanyineku kwikala muntu muswe bwa kumulaababo maanyi diloolo edi, bwa kusaama kwende anyi? Tutu tusambidila babeedi kaaba aka.”

¹⁹⁸ “Ee, ndi muswe mmonanganeku neebe pàà nkààyetù, Mwaneetu Neville.”

“Ee, umonanganeku naanyi mu bìrô. Monangana ne umwe wa ku balami, bôbò nebatangile bwalu abu.” Nwamonu anyi?

“Kadi’s ndiku ne kaabwalu kândi njinga kukwambila, Mwaneetu wa balume.”

“Ee, umwe wa ku balami mwab’ewu neaye neebe ku bìrô, nenku netu- . . . Nêmmonanganè neebe dyakamwe paanyima pàà disangisha.”

¹⁹⁹ “Mpindyewu, patwikalà mwa kujuuka mpindyewu bwa kutangalaka apa.” Nwamonu’s, nenku kanwena bapicishe dîbà dijima ne tusuna makumi anaayi ne tutaanu bwa byônso bisanga to. Nwamonu anyi? Nwamonu’s, dîbà dimwe ne tusuna makumi asatu, disangisha dyenu dyumbe dijike. Nudi bapete kaacikuma kakese, kàà lukasalukasa; udi—udi mucipeeshe cìdici cyenze aci; wêwè wenji . . . ne bantu bônso mbasankishiibwe, ne bàdi bàalukila mu màabò badyúmvwè bilenga. Nwamonu anyi? Wêwè kùyi wenza nanku to, dîbà adi, udi umona’s, wêwè mulekele . . . Wamonu’s, udi—udi—udi ne meeji malenga, wamonu’s, kadi mona ne . . .

²⁰⁰ Nudi bamanye’s, mbidimu bitwe ku makumi asatu ne bisatu ebi mu cyambilu eci bwanyi mêmè, bidimu makumi asatu ne bisatu, ne pa buloba bujima. S’udi uyila kaacintu kampana

mu ciine cikondo cyònsò aci, cya bushuwa's. Nwamonu anyi? Kabiyi nanku to, s'mbipiciibwe ne wêwê mubilekele. Nanku dibà adi, nwamonu's, ndi mujandule eci nunku: Mpindyewu, wêwê ukwata mudimu ne Bansantu anu bôbò pa bôbò, balumyana wa yààyà, wêwê's udi mufwanyine anu kushààla bufuku bujima bu wêwê muswe kushààla. Kadi udi . . . Nwamonu's, kwèna ukwata naabo mudimu anu bôbò pa bôbò to, udi uteeta bwa kubakula aba bàdì pambelu apa aba. Baùdì munkaci mwa kubakula mbôbò aba, bikengela ukwacile mudimu mu cyabo citùpà. Nwamonu anyi? Nenku kanwikadi . . . Lwâyi naabo muneemu ne pashiishe Dîyì dilwe, ne pashiishe, nwamonu's, kakwena cintu nansha cimwe cidì mwa kwikala cya badyabakeena to. Ní kùdì bwalu kampanda bùdìbo baswe kukumwena, ee, s'mbilenga, bǎngàtè ukabwele naabo buludi mu bìrô mushindu awu, kadi kushaadi mulame disangisha to.

²⁰¹ Dibà adi, nudi bamanye's, bantu nebajuuke bàmba ne: "Ee, ndi nkwambila's, twènzèku disangisha dîmpè dya majaadiki's." Nwamonu anyi? Ncyèna ne meeji a kwenza didyulangana nansha dikese pa bwalu ebu to, ndi anu ne meeji a kunwambila Bulelela. Ndi ne meeji a kunwambila Bulelela. Nwamonu anyi? Nkààdikù musangane masangisha a majaadiki a mapite . . . atu—atu mîngà misangu enzelangana bibi kutamba kwenza kwa bîmpè. Nwamonu's, mmùtùwu enza cya bushuwa.

²⁰² Mpindyewu, muntu yêyè ne bujaadiki bwa kapyà mu cikondo cya ditabuluja, nudi bamanye's, panùdì munkaci mwa kwenza ditabuluja apu, nudi bamanye's, disangisha, ne muntu kampanda musungidiibwe ne ùjinga kwambaku anu dîyì kampanda, ee, Nzambi abeneshiibwe, numulekelaayi apeepejeku bujitu bwa mu musuuka wende. Nudi numona anyi? Yêyè—yêyè muswe—yêyè muswe kwenza aci, nwamonu's, anu mu cikondo menemene cya ditabuluja aci, wàmba ne: "Ndi muswe kwamba anu cyanàànà ne: 'Ndi nsakidila Mukalenge bwa bìdìYe mungenzele.' Yêyè mmunsungile lumingu lushààle elu, ne mwoyi wanyi wùdì wùlàkuka kapyà ne butumbi bwa Nzambi. Twasakidila kùdì Nzambi," ùsòmba panshi. Amen! Aci's ncilenga, tùngunukàayi. Nwamonu's, aci ncîmpè.

²⁰³ Kadi paùkaadì wamba ne: "Mpindyewu lwàyaaku. Udi mulondele nganyi? Udi mulondele nganyi? Mpindyewu twǎnjì kuumvwayiku dîyì, twǎnjì kuumvwayiku dîyì dya bujaadiki." Mpindyewu, nwènù ne disangisha dimana kulongolola, diloolo kampanda bwa ciine aci, nwamonu's, nenwikalè mwa kuteeleja: "Diloolo edi . . . mu diloolo dya diisâtù dilwalwà edi, pamutu pàà disangisha dya milombo, neciikalè disangisha dya majaadiki. Tudi baswe bwa muntu ne muntu alwemu, nenku neciikalè disangisha dya majaadiki." Nenku dibà adi pàdìbo balwa pa—pa mwaba awu bwa kufila majaadiki, bala Dîyì, enza disambila, ne pashiishe amba ne: "Mpindyewu tudi bamanyishe ne edi ndiloolo dya majaadiki." Pa nanku bantu bafile majaadiki

mu dîbà dimwe adi anyi tusunsa makumi anaayi ne tutaanu, anyi tusunsa makumi asatu, anyi cyònsò cìikalàku aci, ne pashiishe—pashiishe nutungunuke mushindu awu. Nudi bamone cîndì njinga kwamba aci anyi? Nenku ndi ngeela meeji ne necyambulwishe disangisha dyenu adi, necyambulwishe kantu ne kantu, byònsò, bu nwènù mwa kubyenza mushindu awu.

²⁰⁴ Mpindyewu, cìdì . . . Dîbà ndyedi dikaadi dyenda dimpita, pa nanku . . . Bânà beetu—bânà beetu, ebi ki bya ku dyanyi pàànyì dimanya. Ndi mmona cìdì pa mwoyi wenu, eci ki dyanyi pàànyì dimanya pa bìdì bitàngilà nkonko yinùdì beele. Mpindyewu, bwa kubangila leelu kaayi nwàmányì. Nenku bu cyòcì mwa kunuvwilaku mu meeji, lwâyì ku mukaba wa mēyì. Konkààyi aci . . . Nùteelejààyi mukaba wa mēyì. Nî mbwà balami, bwa balubuludi, anyi bwa nî ncinyi nî ncinyi, mukaba wa mēyì awu wediibwe. Bâwélèlè disangisha mwaba awu pìikalàbo baswe kuciteeleja. Eyo. Nenku ki—ki dyanyi pàànyì dimanya ndyòdì adi pa bìdì bitàngilà diswa dya Nzambi bwa tabernacle ewu wa mu masangu a Mùsèèsù wa Mwandamukulu ne wa Penn, ne wòwò awu ki mushindu wúndì mèmè nnutuma nwènù bânà beetu ne mudimu wa kukumbaja cyòcì eci mu bulombodi bwa Nyuma Mwîmpè, ne musangeelu wònsò ne dinanga, nuleeja ngàsà wenu kumpala kwa bantu ne nwènù nudi beena Kilisto. Kadi *mwena Kilisto* kèna ùmvwija ne mmwànà udibo mwa kwikala batumakaja eku ne eku myaba kanà yònsò to, awu ùdì ùmvwija “muntu udi mùle tente ne dinanga, kadi nansha nanku, mùle tente ne dinanga bwa Nzambi anu mùdiye naadi bwa disangisha amu.” Nudi bamone cîndì njinga kwamba aci anyi?

²⁰⁵ Kùdì lukonko anyi? Mukaba wa mēyì wùkaadi wàmba kutwa ku ntengu mwab’ewu, ne mèmè pàànyì ndi ne muntu mungindile kuntu kwaka. Yèyè mwine ùvwa ne cya kwikala kuntwaku pa dîbà kaayi? [Billy Paul ùdì wàndamuna ne: “Mpindyewu mene.”—Muf.] Mpindyewu mene. Ùdì ùdìvwila anyi? [“Mèmè nguyààya kamwangata.”] Eyo. Eyo, mukalenge.

²⁰⁶ Mpindyewu, ndi mumanye ne tukààdì tupatuka mpindyewu pìikalàku kakùyi dîyì nansha dimwe—nansha dimwe dya kusakidila. Huh? Mpindyewu, dyòdì kadiyikù, tütangalakààyi. Eyowa. Eyowa, Mwaneetu Collins? [Mwaneetu Collins ùdì wàmba ne: “Bìvwa mwa kwikala bîmpè bu bòbò mwa kwimanyika mikaba ya mēyì.”—Muf.] Eyo. [Katupa kàà mukaba wa mēyì munda mutupu.]

²⁰⁷ Ee, bânà beetu, ngányishì diikalanganaku neenu mwab’ewu diloolo edi, ne Mwaneetu Neville, ne kùdì balami, ne balubuludi, ne mutangidi wa kalaasa kàà Dyalumingu, nwènù bònsò. Tudi batwishiibwe ne Mukalenge neànwàmbùlwishèku mpindyewu bwa kukumbaja mēyì matuma aa bwa Bukalenge bwa Nzambi. Cìdì cyenze ne ngàmbè cyòcì eci mbwalu ndi ngeela meeji ne nukààdì bakole buumuke ku bwànà butekete baye ku buntu bukole. Paùciwà mwànà mutekete, ùvwa wàkula bu mwànà

mutekete, ne ùvwa ùmvwa maalu bu mwânà mutekete. Kadi mpindyewu ukààdi muntu mukole, pa nanku twënzàayi maalu bu bantu bakole mu nzubu wa Nzambi, biikàle tuditwala mu mushindu mulenga, ne biikàle tutwa midimu yetu mushinga, ne tutwa mudimu ne mudimu wònsò mushinga. Dipà dyònsò dìdì Mukalenge mutupeeshe, tùdìtèèkaayi mu bulongame, ne tutwayi Nzambi mushinga ku mapà etu ne midimu yetu.

Tùsambilàayi.

²⁰⁸ Taatù wa mu Dyulu, tudi tuKusakidila diloolo edi bwa dikungwila dyetu pamwe edi dya bantu bàdi bateekiibwe mu midimu kaaba aka bwa kukumbaja mudimu wa Mukalenge wùdì munkaci mwa kutungunujiibwa muneemu mu Jeffersonville mu ekeleeziya ewu. Nzambi, swaku bwa cyanza Cyebe ciikalè pambidi pààbò, swaku bwa Wêwè ùbămbùlwishè ne ùbàbènèshè. Swaku bwa disangisha ne bantu bŭmvwè ne bamanye ne eci mbwà kuvwija Bukalenge bwa Nzambi butàmbe kulengela, bwa twamona mwa kulwa bantu bakole bàà luumvu ne kumanya Nyuma wa Nzambi, ne kumanya cya dyanza. Enzaku nanku, Taatù. Ututangalajeku mpindyewu ne mabeneshia Ebe, ne swaku bwa Nyuma Mwîmpè wàtùtâbaleelakù ne wàtùlombolakù, ne wàtùkùbakù, ne swaku bwa misangu yònsò twâsanganyiiwbakù bàà lulamatu pa kaaba kàà mudimu. Mu Dîná dya Yesu Kilisto, mmùndì ndomba emu. Amen.



BULONGÀMÈ BWA ÈKÈLEEZIYÀ LUA63-1226
(Church Order)

DILONDANGANA DYÀ BULOMBODI, BULONGÀMÈ NÈ DILONGESHA BYÀ ÈKÈLEEZIYÀ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diinâyì dilòdòlò, mu matùkù 26 a ngondo wa dikumi ne mwibìdi, cidimu cya 1963, mu cisangilu cya kasumbu kaa biimikila majitu mu Branham Tabernacle mu Jeffersonville, Indiana, U.S.A. Ndyumusha pa mukaba wa mêtì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org